

من حلاوة الروح

رواية بالعامية

صفاء عبد المنعم



من حلاوة الروح

المؤلف :
صفاء عبد المنعم

الطبعة الثانية :
يوليو 2005
رقم الإيداع :
٢٠٠٥/١١٢٥٣

الترقيم الدولي : I.S.B.N.
977-5634-18-0

حقوق الطبع محفوظة

رسم الغلاف :
مي مجدي الجابري
تصميم وتنفيذ الغلاف :
كامل جرافيك



الإشراف العام
د. طلعت شاهين

مدير التحرير
علي حامد

المراسلات :
ص.ب. : 22
الحي المتميز - مدينة 6 أكتوبر
مصر

Tel.:
(202) 835 40 69
Mob.:
(2012) 410 20 08
e-mail:
sanabook@maktoob.com
sanabook@hotmail.com

إهداء

إلى الذين رحلوا.

صفاء

...قاعـد لـوحدك، بين سبع بيان
متفتحـين عليـك، تـقرقش ملح العين
والعافيه، وتـفك زراير القميص من العرق،
وصهد الذكريات اللى ابتدى يقب عليك
فجأة..

دا من حلة الروح

... ياه الدنيا برد قوي!

وبالعافية حطيت الحجر التؤيله وراء الباب، ودخلت أوضستي.
الدنيا بتشتي وبردان، الأوضة فاضية، وبتصفر. خفت، وفضلت أند
(زي المجنون) ع البيت نبويه، أنها ترد، ولا تقول أنا أه، أبدا! كأنها
فص ملح وداب، أو كأن الأرض انشقت وبلعتها. لميت شوية خشب
كسر، على حنتين قوالح، وقلت أولعهم، أدفَى بيهم. ولما صفيو، قعدت
على فرشتي، قول يجي ساعه، اتنين، إن البيت تظهر، أو بيان لها
أثر، أبدا! قمت مرّة ثانيه، أدعبس عليها، يمكن تكون راحت هنا ولا
هنا. مش عتّان فيها. تكون نامت ع السطح؟ آخر ما زهقت، قلت
أعمل دور شاي. ادعبس ع السكر، ع الشاي، فين وفين، لقيت مَجْمَع
السُكَّر تحت السرير، وشوية شاي يدوب يكحلّو عين عيل، حطيتهم
على بعض في البراد وسيبتهم ع الجمر، وكل شويه انده:
يا نبويه،
يا بت.

آه يابنت الواطي، هربتني على فين؟

قعدت حيران، أعد السنين وليّام، وحبّتين وقادت في جتتي النار.
- يا خرابي، يا اهل البيت، يا حسن، يا حُسَنَه، يا زَنَه، يا اولاد،
نبوية هربت، نبوية هربت، وانتو هربتو. وَفَضِلْت اجري زي
المجنون في البيت، ألفّ وادور، حوالين نفسي، في الإوض، ع
السطح، ما خلّيتش مطرح، البيت فص ملح وداب.

الله يجازيكي يا شيخه، دوختيني وراكي. سنين وِيام وَاَنَا
متغمي، سنين وَاِيَام وَاَنَا ساكت، سنين وَاِيَام وَاَنَا بَلَف.
سنين وَاَنَا باعشقك بابت!

... نسييت أن البيت فيضي!

فيضي من زمان، من يوم ما راح كل واحد منهم في حتّه
وسابوني.

بقي أنا، اللي ياما دوخت بنات ونسوان، أقع الوقعه دي؟

فينك يا حُسْنَه، إنتي وزنّه، فين البيت، والعيال واللّمه؟

هجيّتو، وسبيّتوني، هجيّتو يا ولاد الكلب؟

"وفضلت قاعد لوحداك، بين سبع ببيان متفتحين عليك، تفرّش

ملح العين والعافية، وتفك زراير القميص من العرق، وصهد

الذكريات اللي ابتدي يقب عليك فجأة".

آه بانّت المجنونه، إتّلّمي، واتركني على جنب.

آه منك يا هائجه.

دا من حلاوة الروح.

آخر ما زهقت

دعيت لي على سيجاره، وفي الآخر لميت لعقاب البايته،
ولقيتها، وقعدت اشرب.

- بقى يا بن الرفضي، أنت مش عايز تسيب البيت وتغور؟

- أغور فين بس بابا فرج.

أديني قرشين، وانا امشي، اشوف أوضه، ولا خرابه، اتاوى
فيها.

أنا وحيد، لا معايا مال، ولا مَرَه، ولا عيال، ولا حتى شُغله

- أنا كنت ولدتك ونسيتك؟

فارقنا بَقَى، حنتين العيال كبرو، ونفسي ألمهم. نفسي أهد البيت
وابنيه، نفسي افرح بيهم قبل ما موت.

- وانا بابا فرج، اروح فين؟ اهون عليك. أترمي في الشارع بعد
العمر ده!!

- الله، اللي خلقك يتكفل ببك ياخي. هو اللي هيرزقك.

- منين؟ وانا ولا ورايا، ولا قدامي.

- إيه.

دور على أيتها مطرح، هو أنا ولي أمرك
وبعزم ما بيه راح شايلى حنتين العفش، هبلا بيبلا، وراميهم بره.

يومها انا لا خُفْتُ ولا اِتهزَّيْتُ. بالعكس تَبَّتْ وعانَدْتُ، وقلْتُ
له: أعلَى ما في خيلِكَ اركبه. الله يخرِب بيتَكَ يا ابا فرج، خلَّتني سَقَّت
العند، وهو ساق عَلِيًّا طوب الأَرْض، اني اسيب له البيت. وعنها
وراح في ليله، مسلط عربيّه نقل كبيره تدخل الشارع، وتعمل إنها
بتدِير، وترح خَابطه البيت، حتّة خَبَطَه، موقعاه. تَبَّتْ وعانَدْتُ،
وقلْتُ له: مش هاسيب. أصل الخوف ده شيء كبير ، كبير قوي، وقد
ما نخاف يكبر. ورجع لي تاني، وتالت، وعاشر، ولما طهقت منه،
قلْتُ له: هات عشر تلاف جنيه، جنيه ينطح جنيه، وانا اسيب. الله
يخرِب بيتَكَ يا ابا فرج، ودني بِنُوش من ساعتها.

- خلاص، خَلِّيك، وخلي البيت. يارب يقع على دماغك.

- على دماغي، على دماغك، مش هاسيب، تعرف لو قربت لي،
أو سلطت عليا حد، أو عملت حركاتك الهايفه اياها، هاروح فيك في
داهيه. هاموَّت حد من عيالك. هاموَّتهم كلهم. وياروح ما بعدك روح.

* * *

... الدنيا برد، والهوا بيوش في ودانى.

وصوت العيال بيرن، والأرض بتغطس بيّا ونُقِب، والحيطان
بتقرّب عليّا. بآينك يا طوبه قاسيه السنه دي ! ولاّ انا اللي عجزت،
تعالو، تعالو، قربو يا عيال، دُفُوني:

بختك يا ابو بخت

كوم مين ده

كوم السلطان

فيه إيه

خوخ ورمان

هات حتّه

القطه كَلّتها

والقطه

ع الكوم الخضر

والكوم الخضر

عند البيت

والبيت

عايز ينباع

والبياع

واقف ع الباب

والباب

عند النجار

والنجار

عايز مسمار

والمسمار

عند الحداد

والحداد

عايز بيضه

والبيضه

عند الفرخه

والفرخه

عايزه قمحه

والقمحه

عند الفلاح

والفلاح

عايز مفتاح

والمفتاح

عند البواب

والبواب

واقف ع الباب

والباب

قافل ع البيت

والبيت

عايز يباع

والبياع

واقف واقف

مستنى اللى خايف

والخايف

مالوش مكان

ولسانه

اخرس جبان

- بس، بس.

دايره كبيره قوي يا واد ودخلتها، وياريتك قادر عليها. إلا، ميقاش
فيك، ولا وراك، ولا قدامك، ياريتك يانبويه سمعتي كلامي، ولا
هَجِيْتِيْش، وخليتك جنبي، مش كان زماننا بندقي بعض. ياترى انتي
فين يابت، وحناني.

النار انطفئت، والشاي خِلص، والجيب ما عدش فيه.

يا خسارتك يا واد في البهذه. هيه يلا، نتلف وننام.
بتبض للسقف وتبخلق بعنيك، بقي لك سنين ويام بتستتظر. لا
البيت انهذ، ولا انت فوتته. إيه اللي مخلّيك متمسك بيه ولا بد، تكونش
يا واد ناوي تورثه، ولا فكرك يعني اللي راح ممكن يرجع.
نبويه والهيصه، والعيال، واللّمّه.

في يوم من ذات ليّام، كان فيه:

فرّان، وصيّاد، وجزماتي، وحُسْنَه، عندها عيال (نبويه، وبطه، وعصفوره، وحسن وسعيد). جوزها طول النهار في المجاري، يبيعد. الوليّه حلوه، وعمّاله تُزْرَبُ في عيال. الله ينور عليك ياواد يا علوه يا فران، ياجوز زنه يا وسخ، مراتك زنّانه يا واد، والعيال ولاد حُسْنَه طلّعوها عليها (ياسوده ياكوده يا حُيَّ الهباب، يا زنه يا عفشه يابوز الغراب) حُسْنَه بيضه وحلوه. الله يخرب بيتك يا راجل. ليه هربان؟ تعالى شوف علّوه هيتهل على مراتك، كل يوم يضرب مراته علقه سخنه (نامي يا بنت المركوب، زرقه، ومثله نبيله، حتى بناتك زرق، مثيلين زيك). يا خبيبتك يا علّوه حتى اسمها لزق فيك، والعيال ولاد حُسْنَه طلّعوها (علّوه جوز زنه راح، علّوه جوز زنه جه).

السنين بتمر، وكان الكلام ده حصل امبارح، وكل ما افتكّره، افطس على روحي من الضحك، يوم ما علّوه زنق زنه على الطرمبه، ودب بوزها في الحوض، وفضلت تبقل، لحد ما لحقتها، كات هتفطس. اله يجازيك يا علّوه، كنت هتموتها. وهيا تصرخ وتولول (يا واكل ناسك، هو لما يقوم، يقطع الهدوم، الله يجازيك يا واد عمي) يومها اتلمينا عليه، ورحمناها من علقه وفضلت تشكي وتتشاكي. الجو برد قوي، والوقت سرقني، والفجر قرب يطلع. طوبه السنه دي شديده، والحيطان خربقت، ولاعدش نافع دهان ولا اسمنت. كل

السنين دي فانت، ولساك قاعد مطرحك، تفرقش ملح العين والعافية،
وتصبب الكلام في بحر مالوش قرار. وحيد، ووحداي، لوحذك، آه يا
انا أمّا اقوم، اجيب بطانيه اتلف بيها. آه يا رجّلي. رجّلي وقفت، بايّي
عجرت، مش قادر اتحرك. لِسّاك بتعافر، وبستتظر يابن ستيته. آه يا
رجّلي آه.

البيت واسع وكبير يجي فدان.

وبالعافية حطيت الحجر الثقيله ورا الباب الكبير، لما تخش تقابلك أول أوضة (أوضة أم رامي) قصاها بالظبط (أوضة بدر) تخش حبتين، تلاقي حوش كبير في وسطه طرميه خربانه، دايم حوضها مليان ميه منتنه، والعيال طول النهار يحدفوا فيه طوب، وعاملين سنابير خيط في طرفها قولاحه، مسمينها صياده. وطول النهار يحدفوها، قال ايه بيصطادو سمك. جنب الطرميه (أوضة زنّه) وقصاها (أوضة صغيرة) بيقولو كانت كابنيه قديم واتردم، دايم مسكوكه، مليانه كوابيس، اللي ينام فيها لوحده، تطلع عليه كوابيس تخنقه، ويفضل بنده على حد ينجده، لوحده سمعه يبقى نجا، ما حدش سمعه بفضل يرفس، ويرفس لما يصحى لوحده، ويبقى عرقه مرقه، ونفسه مقطوع ومش قادر. وبيقولو كمان كان ساكن فيها واحده وبنتها، ماتو جواها لحد ما نتتو، وريحتهم فاحت، ويمكن عشان كدا دايم اللي يقرب من الباب يشم ريحه وحشه هله عليه، تخش حبتين على جنب تلاقي (أوضة خسته) كبيره واسعه، أكبر أوضه في البيت، وليها منور، كانت خسته مأجراه، تنيم فيه العيال في الصيف. قدامك بالظبط، وبعرض البيت (أوضه لوزه) مرات عبده، أوضتها ليها شباك ع المنور، والعيال ولاد خسته، كانوا دايم يبصو عليها منه. تحوّد يمين، من بعد أوضه لوزه، تلاقي في آخرها أوضتي والحمام اللي مالوش باب، وعشان الواحد يروح له لازم يفضل يتكلم بصوت عالي من أول الطرقة، أو يتتحنح، أو يكح، لو حد رد يرجع،

بصوت عالي من أول الطُرقه، أو يتتحنج، أو يكج، لو حد رد يرجع،
ما ردّش، يكمل ويخُش. وكانت دايمن الميّه ملياه، وعشان كذا بنحط
قالبين طوب، وآخر ما زهقنا عمّالنا سقّاله من الطوب نمشى عليها،
صف طويل فوقه لوح خشب، يبقى الواحد ماشي والميّه حواليه، كأنه
هايعدي النيل، ويسلام لو حدّ حبّ يروح الحمام بالليل، وأصلن البيت
ما فهوش نور، تبقى حُوسّه، يعني لازم الواحد، يشمّر هدومه،
ويمسكها بسنانه، ويفضل يخوض في الميه، وهو عمّال يقول يا ساتر
استر يا رب. إن عدّى ووصل للعين بالسلامه، الفرجه تنسيه وهو
راجع ياخذ بالّه، فيروح واقع، مدبوب على بوزه، وتبقى ليله، يفضل
يصرخ، ويصرخ، وينده على حد بنجده. الكل يخاف ويكش، لحسن
تكون العفاريه اللي في الأوضه الصغيره طلعت وهيا اللي بتنده.
وفي يوم كان سراج، جوز ام رامي راجع باليل سكران، وحالته نيله،
دخل يعمل زى الناس، وهو عمّال يغنى ولا على بالّه. (زمر، كركر،
فرويك، طبل، طبل، مزيك، حته راجل/تيكا). لقي الباب راح داخل،
وكسل يتحنج أو ينده، ووقف بطرطر، أثارى زنه قاعده، وهو ما
شفهاش، لكن هيا عرفته، فضلت قاطعه خنس، وسابته لما خلّص،
وفي الآخر، راحت قايمه، ودابّه بوزه في عين الكابنيه من سكات،
وراحت جايه لوح الخشب وصنّرتّه، وحطّت وراه قالبين طوب،
ودخلت أوضتها، وفضل صاحبنا يبقل ويعافر، لحد النهار ما طلع.
ودخلت حُسّه، لفته مزروع، زرع بصل، وكان خلاص بيغفر،
وقرب بفتس، راحت مطلقاه، وفضّلت تصوّت، لحد البيت كله ما
صحي.

وقفت زنّه تضحك، وقالت: عشان يبقى يحرم يشخّ ع الملايكة وهو سكران، ما هو كل مكان وله ملايكة اللي حارساه. جت حُسْنَه جنبها، وراحت زغداها بكوعها، وقالت لها: حرام عليكى يا شيخه، الراجل كان هايفطس.

- ياريتّه كان فِطْس، كنا استريحنا منه، السُكْرَى أبو شَخّه، الراجل واقف يعمل زي العيال من ع الباب، ولا اختشى ولا خلاّ عنده دم. طب يقول إحّم، دستور ياسيادي، أعوذ بك من الخبيث والخبائث، يعمل أى حس، يقوم اللي جوه يعرف، فيقوم، أو يلم نفسه، أو يرد عليه، أو يخلي عنده دم، ويبعد لحد لما اللي جوه يخرج، مش يعمل زى العيال من ع الباب.

سمعها سراج من هنا، وراح فاق، وقام واقف على حيله، ما هو عرف أن هيّا اللي عملت فيه كده. وقف وعينيك ما تشوف إلا النور، قعد يزق، ويهلل: يامرّه يابنت الكلب. كنت عايزه تموتيني. الله يخرّب بينك، يا زنّه، ياسوده. انتّ فين يا عفش، ياجوز العفشه، لو كنت راجل اطلع برّه، وانا أورّيك.

هيّا شافته بيردح لها، راحت قالعه الشبشب البلاستيك اللي في رجلها، وطارت وراه.

هو يجري وهيّا تجري وراه، ويصرخ زي العيال. وينده على مراته، إلحقيني يا صباح إلحقيني يا مرّه، وزنّه تطير وراه:

- أنا عفشه يا عفش. أمّال، لو ماكنتش عبر الدنيا كلها فيك كنت عملت ايه؟ أعور، وبعين إزاز، وأصلع، وصغير، وقد عقله الصباغ، والواحد تكسرك على ركبتها، ولسانك زفر وعايذ قاطعُه، بتسب

الدين ع الصبح، يا نجس، يا سُكْرِي يا ابن الكلب، والله لا أُرِيكَ،
هاموَّتْكَ وارْيَح الدنيا مِنْكَ، عيني عليكي يام ام رامي، أنا عارفه بتنام
معاك أزاى، يازَمَر الكلب، والله لا أموتك، واكسب فيها ثواب،
وارْيَحها منك.

مرات سراج شافت زَنَّهُ، وهْيَا عَمَّالَه تلفُ ورا جوزها، وهو
يدخل أوضه، يخرج من التانيه، ويجري قدامها زي الفار، وكل ما
تطولُه، تدَّيْلُه بالشبشب على دماغه، والعيال واقفين يهَيَّصو، ويسقفو،
راحت خالعه الشبشب اللي في رجلها وطارت وراها، وكل ما تطولها
تديها بالشبشب على دماغها.

العيال ولاد زَنَّهُ شافو امهم، ومرات سراج بتجري وراها، طلعا
هما كمان يجرو، ويحدفوها بالطوب، وولاد سراج شافوا كدا، طلعا
يجرو همّا كمان وراهم، وتَنَّهُم يجروا ورا بعض لَحْدُ ما خرجو
الشارع.

وقفت حُسْنَه تضحك، وتخبط كف على كف. ونقوللي: شوف يا
وحيد يا ابني، هَم بِيكِّي وهَم يضحك. صدق اللي قال مجانين صحيح،
عقل صغار، مهاويس. ودقيقتين وتلاقهم بياكلُو فى طبق واحد.
العيال ولاد حُسْنَه شافوا كدا وطارو، يشوفو الأخبار، وكل
شويه عيِّل منهم يدخل ويحكي اللي حصل. والواد سعيد بيجي فرحان
ومظأطط.

- زَنَّهُ مسكت زَمَر، وضربته على قرعته لغاية ما جابت دَم.
- مرات زَمَر مسكت زَنَّهُ ووقعتها ع الأرض، وركبت فوقها
وفضلت تديها بالشبشب، وفين يوجعك، لغاية ما سخسخت.

- خذُ يا سعد. خذ يا ولّهُ، انت يا مخفي النّقا.
- اسكتي يا امّهُ، اما اروح اتفرّج.
- دخل أبو سعد من برّة، وهو راجع من الشغل، لقي مراته طايره ورا الواد سعد وفرّدة الشبشب في ايدها. ولمه وهيصة قدام الباب. وحسنّه بتنده ع الواد انه يرجع، وهو مش معبرها.
- هو فيه إيه ع لصبح؟
- اسكت يا ابو سعد. فانتك نص غمرك. معركه سبحان من يطفئها.
- إيه يا بوز النّحس ع الصبح.
- دي زنّه ماسكه في خناق ابو رامي.
- والله الراجل ده مهزأ نفسه مع انه غلبان، وبيصعب ع الواحد.
- أيوه يا خويا غلبان، بس وقع مع اللي ما يرحم.
- زنّه رخره غلبانه، بس لسانها عايز حشّه.
- أيوه يا خويا، وجوزها يا ما غلب وياها، لكن ما فيش فايده، دا طبع يا ابو سعيد، والطبع بيطلع بعد الروح.
- يا حسنّه. فين الفطار، عايز انا.
- أيوه، أيوه، جايه أهّه.
- فين وفين، دخلت زنّه، والعيال، بعد ما الشارع اتلم عليهم، والنار هذبت. كان ابو سعيد قاعد قدام أوضته، بيخطر، وانا معاه، وحسنّه بتخدّم علينا. تحط العيش، وتغسل الفجل والجرجير.
- راح ناده:
- تعالو يا اولاد افطرو، واخزو الشيطان، تعالي يازنّه، تعال يا ابو رامي تعالو كلكم.
- جُم كلهم، وراحو قاعدين، العيال والنسوان.

- الشاي يا حُسْنَه. إعملي براد شاي كبير وتَقْلِيه. نهاركم قشطه، افطرو.. افطرو.. عيش سخن، وجبنه قريش، خدو فجل وجرجير طازره، جاييه معايا من القصر. انتو عمّالين هنا، تتخانقو، والرئيس طوال الليل سهران، ربنا يعينه، أنا شفته. كان البكابورت اللي في الجنينه طافح، ورحت أسلُكُه.

بَصْ لى الرئيس من الشباك، وضحك، وشاورلي: (خَلِّي عنك).

يا سلام يا ولاد، الرئيس ضحكته حلوه، تُرْذُ الروح، وتشفي العليل. ربنا يحميك يا ريسنا ياغالي. أمّا انا فرحان بشكل. وسمعتَه بينده ع الجانيني وبيوشوشه، وبعد شوِيّه، لقيت الجانيني جِيّ وفي إيده كوابية شاي سُخْنَه، وبيضحك وبيقوللي: الرئيس باعِتْ لك دي. واذّاني سيجاره. تصدقو، انا فرحت وحسيت اني عايز آخذَه بالحضن، وارمي نفسي تحت رجليه، وفضلت ادعي له بنصرُه على مين يعاديه. لحد النهار ما طلع. وانا ماشي، بَصِيْتُ ورايا ع الشباك اللي كان واقف فيه وبيبُص منه، لقيتُه لسه صاحي، شاورت له بايدي وحيّيته، قام ضحك وحيّاني. وعند ما قربت من الباب لقيت الجانيني جاي يجري بالشوط، وبيحط في إيدى فلوس. ساعتها بس عرفت قد إيه ريسنا قلبه كبير وبيحب الناس الغلابه.

- يالهو بالي يا ابو سعيد، إنت كنت عريان وانت نايم.

- ايه ياوليّه انتي فاكراني باحلم، ولّا بنام أصلن في شغلتنا الخرا دي. والله العظيم دا حصل، واديّ الفلوس كمان آهَة.

- وخذت الفلوس؟

- طبعاً يا زنه، أُمّال كنت هاسيبيهم. حد يرفض حاجه مديها له
الرئيس. إنتي كنتي عايزَاهُم يودُونِي في داهيه. وعمرى ما هُصنِرُفُهُم،
هاخلِيهم كدا، بَرَكة، طول ما انا عايش.

- قوللي يابا يطلعو كام؟

- والله يا سعد يا ابني ما اني عارف. ومش هاعدُهُم، خَلِّيهم كدا
ببرِكْتهم.

- طَبْ ما تدِينِي بَرِيزه يابا، وادِّي امي تعمل لنا مَحْشِي. نَفْسِي في
المَحْشِي، شفته في ايد الواد ابن اُمُ فيفي.

- يا ابن الطُفْسَه محشي ايه. حد يصرف بركة الرئيس. دُول بَرَكة،
بَرَكة يا وَلَه.

ياه نَفْسُكَ دافِي، وَكَانَ الْكَلَامُ دَه كَانَ امْبَارَح

لما زنه ظبطت جوزها بيبص على حسنه من شق الحيطه وهي
عريانه في الطشت.

صرخت وهلت.

راح ماسكها وهابدها...

يابنت الكلب، الحيطه هيّا اللي محفوره، يا بنت المفحور. انت
ناسيه يامرّه إن البيت قديم ومُخَرَّبَق، داب زيّك، وبقي كُهنه.

- يالهوري ياجوزي. يا خراب بيتك يا زنه. نعزل. نعزل يا ابن
عمي، نعزل حرام، دي نار جهنم، وانا مش قادره، عندنا ولايا يا واد
عمي.

- اسمعي انا دماغي متكلفه، ولسه شارب لي حجرين، ومش
عايزهم يطيرو من دماغي. دول ولايا دول، دول معيز زيّك. ابقني
دوري على واحد أهبل جَوْزِيه بناتك السود.

- يالهوري، يالهوري، يا خرابي. يا ناس، يا خلق اشق هدومي، يا
حُسْنَه يا حراميه، يا بنت الكلب، ياللي جوزك هريان منك، كل يوم
تُحَكِّي وتُتَحَكِّكي لمين يا مرّه يا بايظه، ياللي من غير راجل. يا
خرابي، جوزي اتهبل.

- يامرّه نامي وانخمد، الفراخ نامت، الدنيا ليل، والصوت
بيسري. بطلي هَبْد غ الحيطه.

- عايزه اسمعها يا خويا، عايزه اصحّياها. بنت يا حُسنَه اسمعي، اصحي، قومي.
- الله يَخَيِّبْكَ مَرَّة. مَالِكُ يا زَنَّة. مَالِكُ يا اختي، نامي.
- مِلَّتِي وَمِلَّتِي يا حُسنَه. عامَلَه لَكِ شَقُ فِي الحَيْط، عشان جوزي، يُبَصِّنْ عَلَيْكِي، بِيصْنِيصْلِكُ يا اختي. جوزي ابو عيالي، راجلي، واذا عَمِّي، عَيْنُه مِنْكَ يا مَرَّة.
- بس يابنت جاكِي خَابِطُ، نامي، وقولي يا مَسَا.
- هه... مش مصدقه يامرات الهربان. طب لَفِّي وتعالِي، تعالِي بُصِّنْ، بُصِّنْ يا ولاد يا ولاد كُلُّكُمْ، تعالو بُصِّنْ واتفرجو.
- آه يابنت الفُضحِيه، لُمِيتِي البيت والدنيا ليل، والناس نامت.
- تعالو بُصِّنْ، قَرَّبُو، جوزي اللِّي قاعد ده، ببص علي بنت الكلب دي، من هنا، شاقِقِينَ شَق فِي الحَيْطه، وبِيصِّنْو لبعض. مَتَّقِينَ عَلِيًا يا عَجْر. هه وَاَدِي شعرك آهه. يا ناري، لازم أَكَل بطنها، أَكَلها أَكَل. هو قَاللي بطنها حلوه، هاتوها، هاتوها بنت الرَفْضِي دِي.
- خلاص. خلاص بقى يا ولاد، سيبِي يازَنَّة شعرها، حرام عَلَيْكِي، إِخْزُو الشَّيْطَان يا ولاد، يا واد يا رامي تعالِي سَلِّكَ معايا يا واد، أُو اَنْدَه عمك وحيد بِسَلِّكَ معاك.
- إوعِي يا خالتي أُم رامي كذا وَسْعِي، وسِيبِينِي عَلَيْها، إِيه يا زَنَّة يا شَبَطَه، يا سوده، أُمِّي مش كده.
- إِيه دا؟ ودي مين، مين اللِّي بَتَتَكَلَم؟ والله القوالِب نامت ولنُصاص قامت. تعالِي يا ست نبويه، تعالِي يا بنت الهربان، خُشِي يا بَت فِي عِبِّي خُشِي، ما هو اللِّي اخْتَشُو ماتو. أَمَك كل يوم بَتَسْتَحْمِي

لمين يا بت؟ وأبو كي فين؟ هربان ليه وساييكم زي الكلبه وعبالها؟
- وأنتي مالك يا زنّه، يا سوده، يا عفشه، أُمي حلوه، مَذْلُوله ليه؟
مفروسه ليه؟ قولو يا ولاد:

يا سُودَه يا كُودَه

يا حَقّ الباب

يا زنّه يا عفشه

يا بُوز العُراب

- يالهي. يا خرابي، خُشوهُم عني يا خلق، الوليّه وعبالها
بيضربوني. يا ناس، يا علّوه يا واكل ناسك، ياسي وحيد، خُشّه
عَنّي يا ابو عيالي، خُشّه يا واد عمي.

- واد عمك دلوقتي، وانتي عامّله لي جُرسه وفضيحه. وانا مالي
خَلّيهم ياكلو مصارين بطنك.

- بس يا زنّه بس. بس يا حُسنه بس. بس يا ولاد حرام عليكم.
الوليّه هتموت يا علّوه، وانت قاعد تتفرج.

- سيبهم، يا سي وحيد يَكْش يقطّوعها حتّ، ويخلّصوني منها،
المَرّه ام لسان زِفِر دي، وأدي الباب اهه. تعال يا واد يا حسن خُطّ
الحجر ورا الباب. اسمع يا واد يا حسن، لو قدرت تخلص عليها،
خلّص عليها.

- يا خويا يا قلبك. أُمّال لو ما كُنْتش جاييه مصارينها منك، كنت
علمت ايه؟

- يا ام رامي، هيّا دي فيها مصارين، دي ناشفه، دي فيها لسان
زي الكرباج، خليه بقي ينفعها، أبوه يا نبويه اديها، اديها جامد.

- كفاية بقى يا اختي فرفرتي، والدنيا حر، خلاص يا حُسنه قلبك
ابيض. صلُّ عَ النبي، واخزُو الشيطان . دا الشيطان شاطر يا ولاد.
قومي بابت يابُطَه، امثشي جنب الحيطان، في الشارع، ولمَّي شوية
شراميط، وهاتي خَرِيَّةُ كلب ناشفة. وانت يا واد يا حسن هات شوية
ملح أَمَّا ارقِيهِمْ، اتحَسَدتُو والنبي، كل اللي رايح واللي جاي يقول
البيت ده كله يد واحده، كلهم اخوات. بياكلو مع بعض، وينامو مع
بعض، حتَّى الولِيَّه أُمُّ رامي مرات زَمَرُ كأنها اختهم، ياختي روقي.
خُدي يا حُسنه شوية المِيَّه دُول، خُدي يازنَّه اشربي وراها، خُدو يا
ولاد اشربو عشان تحبُّو بعض. رَوِّقُو، رَوِّقُو، هِيَّا عين والله،
والشيطان قَدَرُ عليكم، ضِحِكُكُمْ وفَسَا في وسطكم. والله لا من
الصبح رايحه عند ولاد غِيَّتَه، وجايه منهم بخور، وعِرْقُ حلاوه،
وتقاوي رِجْلَه، وماسحه البيت أَوْضَه أَوْضَه، خَلِّي العين تمشي، ويم
الجمعة لَبْخَرُكم، وابخَرُ البيت والعيال، واطقطقش شوية ملح، أُمَّال
ايه، الشيطان سكن بينكم ولازم بمشي. العين فَلَقْتُ الحجر يا ولاد.
وبكره تقولو أُم رامي قالت.

هو انا يا ولاد بَتَحالا بحلاوتي.

ما أنتم شافين، وعارفين وقدام عنيكم. الراجل شقيان ليل ونهار، على تلاته جنيه، تلاته جنيه يا عالم يقضوا إليه ولا إليه؟ العيال، ولأ البيت، ولأ المدارس، ولأ الهدوم. دا الواد المخفي سعد امبارح واخذ خمسين قرش لوحده، والواد حسن عايز شورت للألعاب، والمخفيه بَطَّه عايزه تروح المدرسه السنه الجايه. ونبويه، بنت الحماره، الفَحْلَه، طول النهار، تتكش في الزباله، تلم صفيح وإزاز وورق، وتبيعه، أهو بتجيب قرش ولأ قرشين، وانا طول النهار زي التور المربوط في الساقيه، من دي لدي، عماله ألف مش ملاحقه، اجامل دي، اروح السوق لدي، اخش عند دي، واحده الاقيها بتغسل، اشطف عليها، واحده بتعمل حَبَّة محشي، ألف معاها، وكل دا ليه؟ عشان طبق طبيخ بابت، رغيين ناشفين، أهو اطلع بأيتها حاجه والسلام. دي مطاهره عيل اشيل عنها، دي عندها فرح ولأ سبوع أطبخ معاها. أهو أحنكش أي حاجه. طيب واللي خلق الخلق إمبراح الوليه أم فيفي اللي قصادنا طلبت مني أعمل لها حبة كسكسي، جابت الدقيق والسمن وعملتهم لها. خدت يدوب طبق وسابت الباقي، قالت: عشان خاطر العيال.

آهو ربنا بيدبرها، وبنقضيها، واهي ماشيه. يا ولاد هو انا بتعايق، ولا بدلل على حلاوتي. ما هو ذل، ذل اني اخدم عند حد، لكن كدا اسمي بساعد، وبجامل، خفيف، خفيف، وبكرامتي بدل ما دي

جوزها يبص لي، أو دي تخاف مني، انا بدخل بيوت كثير وقليل، الكل بيحترمني، ويبساعدوني من تحت لتحت، جوز شرابات، حنة كستور، طرحه نص نص، كله بينفع. وبعدين دا سابع بيت اسكن فيه، دا انا ياما شفت من السكان وعمالهم، اللي تخبي جوزها وتسك عليه الأوضة، اللي تضربه بالشبشب عشان شافني، واللي تسرقني، واللي تسبني. وبعدين ما هو كله على يدك يازنه. مش احنا في كل بيت سواء، ومطرح ما عزل واروح، الاقيكي ورايا، ولا اللي بقوله غلط؟ دي عشرة عمر يا ولاد، دا من عمر نبويه الفحله واحنا سوا. تعبتي قوي، وجوزي طيب مش بتاع خناق، اقول له: نقعد واللي مش عاجبه يشرب من البحر. يقوللي: يا ولئيه أرض الله واسعه، واحنا خفاف، هو حيلتنا ايه يعني، حصيره ولحاف، يالا بينا. ونلم هدومنا ونطلع. وبعدين ان كان على الحككه، اللي مزعلاكي يا زنه اتحككي. وقال على رأي المثل، إن خست عليك المؤنه، عليك بالليفه والصابونه. هو يبقى فقر وجرب.

- يا حبيبتي يا اختي. حقك عليا انا يا حسنه، حقك عليا يا زنه، والنبي يا ولاد اوغو تزعلو، واسكتي يا زنه الله يخليكي. انا قلت انتو اخواتي، وحبابي، ونضلل على بعض. لقينكم طيبين، قلت يابت اقعدي، ولما بشوف عيالي نايمين وسط العيال، افرح في سري وأجي اخذ العيل من دول، تحلفو وتتحلفو، سيبه سيبه نايم وسط اخواته. عرفت معنى الأهل، وحبيتكم. يا سلام يا زنه، ليه عايزه تفركشي اللّمه. وليه شرانيه، وطبعك حامي.

- خلاص يا ام رامي، خلاص. هيا كدا، سنين وايام واحنا معاشرين بعض، لا هيا دي أول مره، ولا دي آخر مره. هيا كدا نارها قش، تهب، تهب وتصفى على مافيش. دي عشرة عمر. وبعيدن يا زنه، انا ابص لجوزك ليه؟ هو انا معدومة الجوز! دا انا حتى عمري ما حقت في جوزك عاشرنا بعض علي قد ما عاشرنا، لكن عمرى ما رفعت عينى واتحققت منه، والراجل الشهاده لله في حاله، والله يخليه ويطول لنا في عمره، كل يوم يقابل السواد حسن ويدي له خمس ترغفه؟ ويدخل، من غير لا حس ولا خبر.

- يالهوي، يا خرابي. خمس ترغفه يامرہ كل يوم، وتقولي بينكم إيه!

- يوه يازنه، وحدي الله يا اختي بقى. انتي شبطه، حرام عليك انتي شرانيه كدا ليه. ما تهدي، وتروقي، خلي النار تهدا. يا واد يا رامي، يابت يا أوفه. هاتوا الأكل يا ولاد. هاتوا عيش وملح خلينا نغمس لقمتين، خلي الشيطان يمشي. والنبي لنفطر مع بعض، أنا لسه لحد دلوقتي ماكلتش وبقينا الضهر. إخزو الشيطان واتلمو، لحسن صوتنا طلع بره، وزمانهم بيقولو ياترى فيه إيه. وهما نفسهم يشوفونا واحنا بناكل بعض، وعايزين يعرفوا احنا ليه متجمعين. آديني سامعه صوت أم فيفي بتتده من بره. يا الله يا حسنه، يا الله يازنه، يا الله يا ولاد كلو، كلو باسم الله، كل يا سي وحيد، كل. الله ما اخزيك يا شيطان.

كانت ليله نكد.

بس الوليّه ام رامي، دي وليّه شاطره، قدرت تلم الموضوع
بسرعه. آه ما هيا رخره مجروحه، بس مش قادره تقول، هاتقول ايه،
تقول ان جوزها، هو راخر، ببص على حسنه، وديك النهار زنقته
ببص عليها من خرم الباب، ومطرح ما تروح عامل لها زي خيال
المقاته، في الرايحه والجايه، وهيا مطنشه وعامله مش واخده بالها.
ولما حسنه اشتكت لها منه، قالت لها: لما تلاقيه بيعمل كدا ا بقي دبي
بوزه في حوض الطرمبه. ما هو عندها حق، وليّه حلوه وصغيره،
ووشها الدم هيفط منه فط. أهي دنيا، يدي الحلق للي بلا ودان،
الراجل هربان في المجارى، والرجاله هتاكل مراته أكل. قال يعني
انت اللي مش هتاكلها، مش فاكر يا وحيد الكلب، لما الواد حسن
شافك مره وانت نايم على السطح، وعمال تزحزح فى قالب الطوب،
وبتبص من سقف الأوضه، ولما سألك قلت له: فيه جنينه وقع منك،
ضحك وقال: ياعم هو انت حيلتك مليم احمر. يومها انكسفت حته
كسفه، ووشك احمر، بصيت لقيت الواد راح مطلع من جيبه سيجاره،
وولعها، وقعد يشد نفس ورا نفس، كانه راجل كبير، ويخبط كف على
كف، وقاللي: ولع وطنش، يكش تولع، وفضل يضحك، لحد ما الواد
سعيد طلع على صوته.

- انتو بتعملو ايه؟

- الله يجازي شيطانك يا سعيد، مش ناوى تبطل الدحابه دي.

مش تتتحنح، ولا تقول يا ساتر.

- يا ساتر مين يابا. انسى، انسى، وطنش، وطنش تعيش، تاكل قراقيش.

وراح خاطف السيجاره من ايد الواد حسن، ونزل هاتك يا نفخ.
آل ايه العيال كبرو، وانت لسانك قاعد، تقرقش ملح العين والعافية.
لساك بتتظر. تستتظر ايه مش عارف؟ الدنيا مست والجو برد. أما
اقوم انزل من ع السطح، قبل ما الندى ينزل، ويرد الفجر يقرص ف
كتافي.

* * *

يا سعد، يا حسن ، ياولاد ، أنتوفين؟

- كنت فين يا مخفي النقا انت وهو؟
- أبدا يا امه، كنا في الطراوه ع السطح، بنتفرج.
- نتفرج على إيه يا مخفي انت وهو؟
- وانت مالك يا زنه. على فكره عمي علّوه بيقولك: امك في العش ولا طارت. وهو مش جاي الليله، عنده سهرة في الفرن.
- قول له طارت. وكفايه امك هيا اللي في العش ولسه قاعده يا ابن حسنه. إلهي وانت جاهي تطير رقبته ورقبته، قادر يا كريم.
- بس يا زنه بس.. إنشا الله تطير رقبة عيلتك كلها، اما انا وعمي علّوه لأ. فاهمه يا سوده. انتي ناسيه ان هو اللي مسميني سعد. وبعدين انت قاعده عندنا ليه، مش انتي اللي متخانقه مع امي الصبح يا زنانه.
- والله كبرت يا نمله وبقالك لسان. كنا في جره وخرجنا لبره يا سي سعد.
- بس ياواد اختشي، جاك قطع رقبته. آه يا مقصوف الرقبه، قوم فز نام، وانت عمال تحش زى الغنم، جتك قرف.
- قايم يا حسنه قايم. ومتززررش كدا، لحسن يطق لك عرق، واحنا مش ناقصين. كفايه العرق اللي طق في السقف. انا شفت عمي وحيد وهو ببص منه.

- الله يخرّب بيتك يا جلاب المصايب. إيه اللي بتقوله ده.
- وحيّاة خالتي سعده ام عمي علّوه، وانتي تموتي يا زنه. انا شفّته، حتّى اسألّي الواد حسن، ما هو كان ع السطح وشافه.
- بس يا فقري بس. دا كان بيدور على جنّيه وقع منه. إوعي تصدقي الواد سعيد، دا خباص.
- أيّوه يا حسن أيّوه. عَرَصْ عليه عَرَصْ، عشان ما قُولْش انك بتشرب سجّير.
- آه يا ابن المركوب، يابو لسان فالت، طب والله لا وريك.
- حوشهم يا سيّ وحيد الله ينجيك. حوشهم يا اخويا، العيال ديكو، مسكو ف بعض.

* * *

والله العيال كبرو ومسكو في بعض عشانك يا حسنه

يا ترى بكره هايجري إيه. يانبويه، يابت، انتي يا فحلّه، افقلي
الباب يا بت خاينا ننام. فينك يا ابو سعد تيجي تشوف الفحولا اللي
انت سايبهم عليا. خلاص صحتي راحت وما بقنش قادره. يا بت يا
نبويه. رحتي فين يا بنت حسنه، ياللا.

حطيت جنبى اليمين اتكلت على ربي العالمين.

حطيت جنبى الشمال اتكلت على ربي الرحمن.

العبد في التفكير والرب في التدبير.

تبات نار تصبح رماد.

اتكلت على الله.

* * *

ما كنتش اعرف ان في يوم راح أواجه حد بالشكل السافل ده.

الواد سعد باين عليه هيطلع واد واعر، يلعب بالبيضة والحجر،
اما الواد حسن ده هيليهلى زي امه، على نياته، بيفهم حاجات كتير
لكن ما يقدرش يقدر خطورتها، بيتعامل بطيبه، لكن سعد واد ما
جبتوش ولآده، سابق سنه، وبيفهمها وهيا طايره، إيليس زي ما قالت
عليه زنه.

زنه وسعد ونبويه وسراج عجينه واحده، عايشين يومهم، خراب
يا دنيا عمار يا مخي، لسانهم اطول منهم، جواهم نار قايده، بيطفوها
بالخناق والزعيق.

لكن حسنه وام رامي ولوزه، طيبين، بيبصو لبعيد لكن مش
قادرين يعملو حاجه، لا قدامهم ولا وراهم، تحس المسكنه ف
صوتهم، لكن جواهم قوه جباره.

أما حسن وابوه وعلوه، دول طينه تانيه خالص، طينه إحييني
النهاردا وموتني بكره، وياروح ما بعدك روح، عايشين يرمو
عصاتهم ويجرو وراها. كلهم غلابه بيكملو عشاها نوم.

طب وانت، انت يا ابن ستيته العمشه، زي مين، ومع مين، ومن
أنهي مله، تقدر تقوللي عملت إيه في دنيتك الزمان بيروح وبيجي
وانت زي ما انت، بكره العيال هاتكبر وانت قاعد مطرحك، تقررش
ملح العين والعافيه... يا سلام، الليله قمره وحلوه بشكل، وما يحلاش
القعاد والسهر إلا ع السطح، تحس انك سلطان وانت مع نفسك، لا

معاك عيل ولا تيل. ولحد امتي، هاتفضل كدا، لا أهل ولا خلان،
سايب نفسك للدنيا تشيل وتحط فيك. من تلميذ، لصبي في مطعم،
لقهوجي، لبياع عصير، كل ما تترنق تدور لك على شغله، لما القرش
يجري في إيدك تسببها وتجري، زي اللي معمول له عمل. ما
بتعمرش زي اللي مدعي عليك. الله يرحمك يا امه قولتيها، (هاتعيش
لوحديك وتموت لوحديك يا ابن بطني). كان كل يوم ابويا يصبحها
بعلقه ويمسبها بعلقه، مع انها غليانه وصوابها انقرطمت من الغسيل
في البيوت. كان مفترري، ربنا يهده، هيا راحت وهو قاعد على ثلها.
ياما نصحتني وقالت: شوف. بص لصواب امك اللي قرطمها الغسيل،
وعينا اللي عماله تسح فيه، ولا مية حنفية العمده. حاسب على نفسك
يا ابن بطني، واعمل قرش ينفحك، وبطل سرحه على السيم ولعب
الكوره.

الله يرحمك يا امه لو كنتي عايشه، كنت اترميت في حضنك
ونهنيت زي العيال ياما نفسي الاقي صدر حنين يضمني. الله
يسامحك بابا تنك تقول: خش ياساقط، اخرج يا ساقط. لما طفشتني،
وهيا حزنت عليا، وفضلت تسح من عينيها لما نظرها ضاع. وانا
كمان سبيتها ولا سألتش فيها. الله يسامح الكل بقي، اللي راحو واللي
قاعدين على وش الدنيا. الليل مسى. والجو برد، والندى قرب ينزل.
أما اقوم أخش العش وانكن، يمكن أنام، ولا السقف يقع عليا ياخذ
أجلي.

باين السجاير كمان خلصت، ومفلس. ياه الدنيا بردها شديد،
والحيطان خربقت، والهدوم ما عادتش تستر.
- مين، مين على السطح هناك؟ أنت يافقري لساك صاحي.

- إوعى يا عم وحيد، اما اربي الفالت ابو لسان عايز قطعه.
- يا اخي بدل ما تربيه، ربي نفسك الأول، مش كفايه زي الشحط ومش فالج ف المدرسه.
- إيه يا عم وحيد أنت معايا ولا معاه؟
- انا قلبي عليك يا حسن، هو ناصح وعارف مصلحته، أخوك سعد ده تعبان، الدور والباقي عليك، ما تخيبش خيبتى.
- أيوه متغاظ مني إكمني اشطر منه.
- جتكم نيله، شاده نيله، جاوره نيله، انتو لنتين، ما اسخم من ستي الا سيدى،
- شفت يا عم وحيد البت نبويه الفحله، طول النهار دايره ورا عربيات الزباله تنكش فيها.
- أنا شفته والله يا عم وحيد، الواد ابن ام لالو البقاله، كان عمال يضرب فيها، وزانقها جوه اليرميل، وراكب فوقها. وبتعيط زي الفحله.
- يهدكو ربنا.. وانت عملت إيه يا مخفي؟
- كنت بتفرج على الفحله وهو نازل فيها دب.
- يخيبيك ولد، وازاي تسببه يضربها؟
- ما هيا ما سكتتش، قامت منفوضه زي المارد، وراحت ماسكه في خناقه وهات يا رزع فيه، لغياية لما سيحت دمه.
- عفارم عليها. نبويه بت فحله ما يتخافش عليها. الدور والباقي على الخيخه حسن، والواد رامى ماسكه من رقبتة ونازل فيه خنق لما كان هيفطس.

- امتی حصل ده یا خباص.
- امبارح في المدرسه، كان راكب عليك في الحوش، ولولا انا
وأصحابي، كان موتك.
- بس، بس وانت معار وكداب.
- أنا معار وكداب يا فطيره بتعملها كل يوم قد كدا على السرير،
تعرف يا عم وحيد العجل ده بيشخ على نفسه.
- قال يعني انت اللي ما بتشخس.
- أنا يا مصنن، طب شم كدا هدومي، وشم هدومه، وشوف مين اللي
ريحته صنان.
- بس، بس، انا نازل جاتكو الهم، جوز بغال وبشخه.

* * *

دب، دب، دب...

- يا ساتر يا رب. مين اللي بيدب على الباب الساعة دي؟
- لازم حد عارف اتنا بئاكل.
- قوم يا مخفي يا سعد شوف مين؟
- وانا مالي، هو مافيش إلا انا في المخروب ده. طول النهار روح يا سعد، تعالى يا سعد.
- قومي يا مخفية النقا يا بطه افتحي.
- لأ يا اختي أنا خايفه، والدنيا برد.
- اقوم انا يا امه.
- مين، عصفوره، انشانه تكسبي.
- اقوم انا مدام عجرتم، والعجز جالك. حاضر ياللي ع الباب، اصبر شويه. مين، خالتي سعده. يا أهلا يا أهلا، حمدا لله على سلامتكم.
- الله يسلمك يا حسنه يابتي، كيف حالك؟ أمال فين زنه والولاد؟
- تلاقىها نامت.
- هيّا ام فشله نايمه تفشل لحد دلوقتي، وكل الخبط ده وما سمعتش؟
- روح يا سعد خبط على خالتك زنه، وانداه عليها. جابري الزاد يا خاله. غيري ريقك.
- تسلمي يابتي، انا فطرت ف القطر من بدري.
- آهي زنه صحيت.
- أهلا يا خاله. شرفتي.

- يا ساتر، مالك بتتكلمي من غير نفس، هو انا جايه استعطى منك.
دانا حماتك، وخالنك، ام البغل اللي قانيكي يعني تقومي واقفه زنههار
لما تشوفيني، تقفي على طراطيف صوابك، وتبوسي يدي كمان.
- يوه يا خالتي، الدنيا نور وبركة. اقدر، دانتي الخير والبركة.
- الله يبارك فيكي يا حسنه يا بتي. ويحلي لك دينتك. طول عمرك يا
مرات ابني وانت كدا تسدي النفس، ومقابلتك زي وشك، عكره. آمال
فين البغل اللي قانيكي، وبينه راح؟
- جرى إيه يا خاله، انتي جايه تقولي، يا شر إشتري، ولا بايته في
القطر تعديهم ع السبحه. قال يا قاعدين يكفيكم شر الجابين .
- قعدت عليكي حيطه يا بنت خيتي، يا فقريه، يا واكله ناسك. جاتها
داهيه البطن اللي جابتك.
- جرى إيه يا خاله، انتي قاطعه مشوار طويل عريض، من هناك
لهنا مخصوص عشان البقين دول. دا حتى الزياره اللي انتي جايهاها
تقبله عليكي.
- بتتنأوزي يا بنت خضره، كفايه الشيل اللي امك عماله تبعتها، الحق
عليًا وحشوني، جيت اشوقكم.
- يا خاله، قاطعه مشوار يهد الحيل، وليله سفر في القطر، عشان
تشوفينا! شفتي النبي!
- آه يا عرة النسايين، طول عمرك ولسانك ينقط زفت. عيني عليك
يا ولدي، وانا اللي جايه مشتاقه، وبايته اخبز في الرغفان، وانضف
في الزقّر، وقاطعه الطريق على ملا وشي.
- معلش يا حاجّه... معلش ، هيا زنه كدا، بس والله قلبها ابيض.

- انتي اللي قلبك ابيض يابتي. دي بت خيتي وانا عارفاهما، عمر قلبها ما هايصفي من يمتي، قدمها شوم من يوم ما خدناها، وشها يقطع الخميره من البيت. سلعوه، وزى الحدايه، سوده وجربوعه، الله يسامحه ابوها بقی. بنت خضره خلفتها كلها شخايل. والله ان الواد ما سمع كلامي، واتجوز غيرها، وفرح قلبي بصي ما أني عاملاه ولدي، ولا يمشي في جنازتي.

- أيوه، اظهر وبان عليك الأمان. قللي بقي ان انتي جايه لكدا، جايه تجوزي المحروس. آهو عندك، جوزيه واشبعي بيه. هو حيلته حاجه. قال اللي خدته القرعه تاخده ام الشعور.

- روقي يازنه روقي واشربي الشاي، قومو ياولاد العبو بره شويه.

- صباح الخير يا حسنه. مين؟ خاله سعده، ازيك، ليكي وحشه.

- اقعدي يا ام رامي، وحياة دينك يا شيخه، دي مره يقنيها راجل؟

- ايه يا حاجه، أمال لو ماكنتيش وليه كباره، وعارفه الأصول. ومهما كان دي لحمك، بنت أختك. والضرع عمره ما يطلع م اللحم.

- وحياة الشاي ده ولا اطفحه يا ولاد، اني ما كنت رايده بت خيتي تتمدد ف طول ولدي، وكنت رايده بت مليحه، دا ولدي الوحيد، بت يعبط عليها تملي الحزن، دش ناشفه ومعرقبه.

- بس ، بس يا خاله، ما حدش بيختار نصيبه.

- يا حسنه يابتي، دا وحيدي، وانا رجلي والقبر، بدّي اشيل له صبي، طول عمري كنت أدعي واطلب من ربنا عشر صبيان، لكن اقول إيه، ربنا يهدي.

- أيوه كده ادعي لهم وانتي نفسك طاهره. وهي زنه شايله، ويمكن ربنا يكرمها.

- والنبی یا حسنه لو ربنا کرمها، وجابت ولد، لاروح لام هاشم مشی
ع القدم، واعمل ليله لأهل الله، واقول لها: یا طاهره، أنا وفیت النذر
وجیت لیکی ع القدم ماشیه. واکنس ضریحها بطرحتی، وأقبل عتبتھا،
وابات ليله عندها، اسبح واصلي. شانه یا اهل الله شانه یا اهل بیت
النبی، وکت اسمیه سعد، علی اسم ولدك الصغیر، حاکم انا احبه
موت، أصله واد زین، عفی واعر، یحبني، واحبه، ربنا یخلیه لك
ویطرح البركه فيه.

ابو علوه لما مات الولد الكبير، وجه علوه، راح السيد البدوي مشي

من القصر للسيد، ربنا خلى الولد لكن هو افتركه، كان ضل، وكان سند، اتهلجت عليه من بدري، وكان اخوه ابو بخيته، اللي هيا زنه بنته، كان صغير قالو: يا داهيه نجوزك بخيت. قلت لا والله ما اتمد فى طول راجل واصل بعد ابو سعد. سعد ده ولدي الكبير، وانا اسمي الحقيقي، داهيه، والحمارة اللي هناك دي اسمها بخيته، المهم جوزوه خيتي الصغيره، وقعد معايا في الدار. حاجيت على ولدي كثير، وشقيت، اكرت كان لا ورايا ولا قدامي، وجوز اختي فقير ما يقدر على الهمة، ولا يقدر على شيل لحمال.

ربطت وسطي كيف الرجال، واشتغلت، خدت ولدي وهجيت من بلد لبلد، بلاد تشيلنى وبلاد تحطني. اشتغلت في الفاعل، كنت اشيل قصعة المونه كيف الرجال، غيرت اسمي وسميت نفسي سعده، عشان ما خلي حدن يعرفني، وكنت كل ما شوف حد يقرب مني، اخذ ولدي واهرب، شلت قوالح، شلت دره، صيفت قمح في الغيطان، شربت البرد والمطر وشفت الشرد وشرأويد الصيف، في عز بؤونه وفي عز الحر، كنت انزل الغيط، واعبط حمل الحطب ولا عشر رجاله يقدرو عليه. واخرج من بيت لبيت، عمري ما عمرت في مطرح، لجل ما آخذ على حد، ولاحد ياخذ عليا. حظيته في عيني، وما خليته يحتاج لصنف حاجه. ولما كبر وخضر شنبه، قلت اجوزه، وما في أحلى من لحم الواحد، عاودت البلد، بعد سنين وسنين، لقيت خيتي جوزها مات،

واتجوزت اخوه، وكان فايت بخيته، ومات اخوه الثاني واتجوزت
التالت، خلصت ع لخوات وهيا لساها بحالها كيف الفرع. بخيته ما
هيا شكل امها، بخيته، نشفانه كيف جدتها، وطبعها وكأنها هيا. وبعد
كدا جايين تقولم، ليش انا بدي اجوزه، معي حق ولا لاه؟

- ربنا بيعت يا خاله ويرزق، ويصلح الحال. اما اقوم اروح السوق
قبل العصر ما يدن.

- فتك بالعافيه.

- عافيتك معاكى يا ام رامي. اما اقوم آنى كمان الحق اصلي
الضهر، عن اذنك يا حسنه يا بتي.

* * *

ما حد خالي من الهم ولا قلوع المراكب.

الهم في الدنيا مفروق، يا حول الله يا رب. الحمد لله ع الصحة اما اقوم
اصحي ابو سعد، الراجل نايم في أوضة وحيد من امبارح، انقلب زي
الجمل مطرحة، الراجل بيشقى يا ولداه، لا اللي معاه مرتاح، ولا اللي
ما معاه مرتاح.

- يا أهل الله ياللي هنا.

- مين؟ مين اللي بره؟

- انا يا ام حسن، يعني يعجبك كدا العيال، ولادكم يمسكوا الواد
ويعدموه العافيه.

- اتفضللي يا اختي، ادخلي. واقفه ع الباب ليه؟ ادخلي يا ام فيفي،
بيتك ومطرحك.

- سالخير عليكم.

- يسعد مساكلي يا اختي.

- ماهو حرام كدا يا جماعه، الولاد، ولادكم مسكو الواد وهات فيين
يوجعك. بصي يا ام حسن يرضيكي كدا.

- يا حبيب امك يا ابني، مين اللي عمل فيك كدا؟

- ولادكم. حسن وسعد ورامي كلهم، كلهم.

- سالخير يابنيتي.

- مين خالتي ام علوه، ازيك يا حاجه، عاش من شافك، والله ليكي وحشه. ازيك، وازي حبايبك.
- حقك علي، اقعدي.
- ولا حق ولا حاجه، دول اخوات، انا بس قلت اما اقول لكم عشان تأرطو على العيال شويه.
- قومي يا حسنه يابتي، مدي يدك في الققه، وهاتي للولد قرقوشتين.
- لما تيجي زنه يا خاله.
- قومي بلاش عبط، ولا اقولك، اقوم انا.
- * * *

مَسِيكِي بِالْخَيْرِ يَا لَيْلَةَ الْجُمُعَةِ، يَا سِتَّ اللَّيَالِي.

مَسِيلِي عَلَى سَيِّدِنَا مُحَمَّدٍ
أَلْفَيْنِ وَتَسْعِينَ سَلَامِي،
وَحَيَاةَ الْكَعْبَةِ الشَّرِيفَةِ،
وَحَيَاةَ الرُّكْنِ الْيَمَانِيِّ،
تَغْفِرْ لِي كُلَّ مَا طَلَعُ..
مِنْ فَمِي وَمِنْ لِسَانِي،
لِسَانِي سَبَبَ الْبَلَاءِ،
وَفَمِي مِنَ الذَّنُوبِ اِتِّمَلَا.
يَا بَاسِطَ الْأَرْضِ يَا رَافِعَ السَّمَاءِ
تَغْفِرْ لِي، أَنَا كَثِيرُ النَّوْمِ، وَقَلِيلُ الصَّلَاةِ.
- سَالِخِيرِ يَا أُمَّه.

- سَالْنُورِ يَا وَلَدِي. كَيْفَ حَالُكَ، حَبِيبُكَ الْعَافِيهِ. اسْمَعْ يَا وَلَدُ، أَنَا
مِنَ الْفَجْرِ مَبْدَرُهُ عَلَى أَوْلِيَاءِ اللَّهِ الصَّالِحِينَ، هَاخِذْهَا جَوْلَهُ، وَهَادِعِي
رَبَّنَا يَجْعَلُ اللَّهُ فِي بَطْنِ مِرَاتِكَ دَهْ وَلَدًا. إِنْ حَصَلَ خَيْرٌ، وَإِنْ مَا
حَصَلَ، أَنْتِ وَحِيدَةٌ، وَطَاعَةُ الْوَالِدَيْنِ وَاجِبٌ، وَأَنَا بَدِي أَشُوفُ لَكَ ذِكْرَ
قَبْلِ مَا أَمُوتُ، أَحْنَا بَدْنَا نَرْبِي ذِكْرَهُ، فَاهُمْ يَا أَبُو الشَّخَالِيلِ. إِيْشْ
قَوْلُكَ.

- زنه غلبانه يامته.
- تروح تقعد جنب امها ، ما هيا أمات البنات يقعدو جنب بعض.
- يا ام. دلوك زنه تجيب الوكل، ناكل لقمه وبعدين نفكرو.
- وكل، آه يا ابن سعده يا واكل ناسك، بدك تضحك علي. فينك يا شيخ سليمان، الله يرحمك، تعالى شوف ولدك عامل كيف الحرمة، بده يسد خشمي.

.....

- أبوه حسن. يا أبو حسن.
- إيه يا حسنه.
- المغارب غربت، والعشا قربت، ميعاد الشغل ياللا.
- ياسلام يا حسنه، لحق النهار خلص، ولا انتي عايزه تتخلصي مني؟
- واخلص منك ليه يا راجلي، انا بس، قلت تقوم تاكل لك لقمه، وتشرب لك كوبايه شاي. تشوف علوه ماله. لحسن قاعد في الحوش بين لعتاب، ومتكد آخر نكد.
- هيا وصلت؟
- دي امه.
- أمه تتكد عليه؟ هيا ماورهاش غير النكد؟ هما الستات كدا .
- الله يسامحك.
- يسامحني إيه، ما وراكمش غير قلة الراحه، هاتي لقمه، واعملني الشاي، وحصليني بيه، جاتكم الهم من يوم ما خرجتونا م الجنه، واحنا في نكد. فين الشبشب؟ فين الأكل؟ فين الشاي؟ شهلي.
- والله ما حد عارف مين اللي خرج مين؟ وبعدين جنة إيه اللي أبو ظرطه بيقول عليها، جنة امه ناعسه اللي طول النهار رابطته الشاش على راسها ودائره تولول في البلد، ولا جنة أبوه نفاخ المعيز، دا هم مستني اصحابه.

* * *

كنت عترة، ومتدلع.

الله يخرّب بيت ابوكي وابويا تمام، جاحدين قوي (الفرن يا علوه
حافظ عليه، اتجوزها وخده) آديني خدتك. راح الفرن، وفضل القرد.
والله يابنت الكلب لا أتجوز.

- سالخير يا علوه، مالك، بتكلم نفسك؟ الشاي يا حسنه.
- خليه تلاته يا ام حسن. ازيك يا ابو حسن، فينك يا راجل.
- ازيك ياسي وحيد.
- الله... الله مالك يا علوه؟ ايه زرعته قته طرحت بطيخ.
- لا وحياتك زرعته زنّه، طرحت شخاليل، على رأي امي.
ها... ها.

- أيوه كدا يا راجل اضحك، انسى الهم ينساك. ولع... ولع .
- خد الشاي يا ابو حسن.
- فين سعد يا حسنه.
- تلاقيه بيتسرمح مع العيال في الشارع. عايزه ليه يا سي
وحيد؟

- ابدأ، يشوف لنا قولحتين ع السطح، نولعهم، خلي القعدة
تسهل. أما انا جايب حتّه، انما ايه، هتعجبك قوي، شم يا علوه شم،
صنف هاينسيك زنه وامك وشخاليلها.
- ياواد يا سعد، ياسعد.. هما اختفو فين؟ ولع .. ولع يا راجل،
ولا يهملك.

- ايوه يا عم وحيد امي بتقول انك عاوزني.
- اطلع لنا على السطح، وهات لنا قولحتين وروق المسائل.
- حالا... حمامه.
- ياولد.
- قصدي فريره
- جن مصور سعد، انا باحبه، خفيف مش زى العجل الكبير حسن، عامل زي الطوبه.
- وياريته فالح يا وحيد يا ابني.
- بكره يفلح يا ابو حسن ويجيب شخايل.
- الله يحظك ياسي وحيد دمك شربات. عن اذنكم انا بقى عندي شغل.
- يا راجل حد يسيب ام حسن ويروح الشغل، وبعدين النهاردا فيه حفله، حبيبك رشدى هيبدع، ويمكن يغني تحت السجر يا وهيبه، ولا يقول يا عرباوي.
- يا بختك يا عم ما هو حبيبك انت كمان.
- يا عم اقعد دا انا حتى جبت حجاره جديده للراديو، والمزاج هيبقي آخر غرام، ويمكن يجي عمك سراج آخر الليل سكران طينه ويعمل زي كل يوم، ويقف وسط الحوش ويشخر ويجعر ويسب ويعلن ابو خاش الدنيا. وتبقى ليله ويفضل ينادي يا صباح، للصبح. وفي الآخر تطلع بالشبشب وما ينامش إلا لما ياخذ الطريحه التمام.
- كان الله في عونك هيعمل ايه، العيشه صعبه، وحمله ثقيل. تصبحو على خير.
- وانت من أهله يا سيدى، ابقى سلم لنا ع القصر واللي فيه.

الحفلة يا ولاد، الحفلة

- يازنه، يا حسنه، يا ام رامي، الحفلة ابتدت تعالو يا ولاد ياللا.
- يا ترى يا وحيد مين اللي هيغني الأول.
- يوه يا زنه اقعدي، وانت هتسمعي.
- أول أغنيه بختي، والثانيه بخت أم رامي والثالثه حسنه. إلا قوليلي
- يا ام رامي.
- خير يازنه.
- جوزك ليه اسمه زمر؟
- وده جوز ده، جوز الندامه بعيد عنك. أهلي الله يجازيهم، كان عنده ورشه كبيره، ورشه جزم، وكان فرفور حيلة امه وابوه، وبتاع نسوان، وانا كنت بطه، حسنه دي ولا حاجه، كنت بنت خير وعز، وحدانيه، بت على سبع صبيان، أبويا قال: نجوزه صباح، يساعدنا واهي تتاوى، والبت كبرت، واتدورت. وجوزوني عمك سراج، لا شفته، ولا اعرفه، كنت اسمع انه هلاس، وبتاع يوه، بتاع كلام فارغ، لكن قلت يمكن يتوب.
- واتجوزته. اتجوزت سراج عشان الورشه. انا شفته من هنا، ولهايب قادت في جتتي، قطعت هدومي، وشعري، وكبيت جاز على نفسي، وصوتت ولميت الدنيا. لكن كان سهم الله نفذ.
- أبويا قال: احنا ما عندناش طلاق.
- خلاص يا صباح، امر الله نفد يابنتي. واهو عنده ورشه، وبكره تخلفي، وربنا يهديكي، وتعيشي عشان العيال.

صوتت، قلت له: يا با حرام عليك، دا زمر، أنا اتجوز زمر، هو ده راجل، دا زى قصب زمر، دا مفهوش حاجه.

يومها وبعزم ما عنده، راح مديني حته قلم، تولني، وقال لي: يابنت الفاجره، احنا عندنا بنات تقول كلام زي ده. دا راجل وبكره نشوف بطنك قدامك قد البطيخه.

وسابني ومشني. ومن يومها، لحد ما مات ماشفتوش. خيو عليا. اخويا قاللي بعدها بشهر ابوكي مات. عشانك مشي يكلم نفسه، وقع، ابوكي وقع. كنت عارفه ان اخواتي صغار، وانا الكبيره وجه عليا الدور اشوف حالهم. وجه رامي، وجت ألفت في رجليه. رغم أنه صغير وزى النوايه. لكن ابن الكلب مفتري.

بُصي، شوفي الجرح اللي في رقبتى ده، عشان مره رفضت ضربني ببوز الجزمه، ومره مسك غطا الحله، ونزل علي دماغى ضرب، ضرب. الله يخرّب بيتك. الله يخرّب بيتك يا زمر. أتاري المخفي، خسر الورشه في القمار من مده، وشغال فيها ومخبي عليا، لحسن اسبيه. اسبيه واروح فين؟ اتنتين وامهم مين يشيل همهم. بعدها عزلت من البيت، وفضلت من بيت لبيت وبقيت اشتغل معاه. اعمل له الجزم في البيت، وهو يقعد على الناصيه يصلح نعل، كعب، يدق مسمار، كدا، طشاش، ماهو محدش بينام من غير عشا.

- يا سلام يا ولاد الدنيا دي على قد ما هيتا واسعه، صغيره، وبتلف، تلف، وترجع تدي الواحد على قد ما زرع. أنا بقى هجيت من ابويا وطهقت من المدرسه ونسيت الدنيا كلها، عشانها.

- هيتا مين يا اخويا؟.

- السيماء.
- سيماء اسم النبي حارسك.
- آه والله يا زنه. كنت غاوي وعائز ابقى زي فريد شوقي. شفت كل أفلامه، هربت، سرقت، وانفجرت، ولقيت.
وأبوا، ياما ضربني وقاللي: عايز تبقى فريد شوقي يابن الكلب.
آه بابا، هو مش بنى آدم زي زيه.
يومها ضحك وقاللي: آه بس امه مش زي امك يابن الكلب. هو ابن ناس، وانت ابوك عربجي. وضربني بجلدة الحمار.
يومها كان فيه فيلم جديد في سيماء عماد الدين، وعرفت إن فريد شوقي هيكون هناك. رحت وصدغي مشقوق، وقابلته، وقلت له: أنا بحبك يا سي فريد. وعائز اشتغل معاك.
قال بسخريه: تشتغل إيه يا بابا. روح مدرستك احسن. يومها رجعت زي اللي شاخخ على نفسه، والعيال زفوني في الشارع، وقعدو يضحكو عليا، كانوا بيسموني شجيع السيماء. ما انا قلت لهم اني قابلت فريد شوقي، وهاشتغل معاه.
أبوا ضحك وقال لي: يا شيخ اتلهي. روح دور لك على كتاب امسكه، ولا شد لك عربييه، ما انت بغل آهه.
ومن ساعتها مبقاش يقوللي غير روح يا بغل، تعال يا بغل. والعيال في الشارع سموني بغل السرجه.
طهقت، سبت الدنيا، وسيبت فريد، والسيماء. ودورت السف في الشوارع ليل نهار، مره اشيل زباله، ومره ابيع جرايد، ومره واحده خدتنى عندها، أتاها بنت الكلب نصابه، لبستى بيه، وحطت لي

ريحه، واتحفظت، وبقيت إيه، على سنجة عشره. واتجوزتني كدا وكدا.

هربت منها، صحيح انا ممكن اعاكس، أستم، أحياناً اسرق عشان أكل، لكن اشتغل ميس، بقرون... لا. أعمل معصيه. استغفر الله العظيم.

- أنا حسنه حسان عبدالمحسن حسن، من جروان منوفيه.
وده ابو السعود ابن عمي، راجل ولا كل الرجاله. كان أبوه يطلع مع جده عبدالمحسن السوق، وينفخو المعيز. المعزه بعد ما تبقى ناشفه وعدمانه، تصبح بقدره قادر، مليانه، وساعات كانوا يبيعوها على انها عشار. وجه ابن عمي زعل من أبوه وجده، وقال لهم: ده نصب، ده حرام.
ضحكو، وقالو له: بس يابن نفاخ المعيز، روح شوف لك معزّه اتجوزها. بس اوعى تكون مغشوشه.
واتجوزته.

وفضلت بلاد تشيلنا، وبلاد تحطنا. كنت فلاحه وصغيره ولسه بحلاوتي. أول بيت سكنت فيه كنت عروسه.

جات صاحبة البيت خدتني الكوافير معاها.

وعرف، طلعتني من الكوافير بحاجب وحاجب، وحلف أن خرجت من غير إذن، لايبعتني البلد. كان يخرج الصبح، يروح قافل عليا بالقل، ويحط الأكل والشرب: يا ابن عمي، حقك عليا: خايف عليك يا حسنه. البلد دي واعره، واحنا أغراب ملناش فيها أهل ولا سند. إحنا في غربه يا بنت عمي.

سكت. ويوم، وراه يوم، وراه يوم. خلفت العيال. حسن وراه نبويه، وراها سعد، ووراه بطه، وهو ما شالش القفل إلا لما العيال ابتدت تكبر، وتخرج للشارع ويروحو المدرسه. واحنا كبرنا والحلوه انطفت.

- ولا انطفت ولا حاجه. وإن دبلت الورده ريحتها فيها.
- الله يجبر بخاطرك يا علوه. ما انا بقول انتو اخواتي، وعيالكم عيالي. انا معتبراكم أهلي وحبائبي. واللي تشكه شوكة منكم، كإنها شكتني في قلبي.
- بس، بس الحفله ابتدت، بتعملي إيه يا زنه؟
- ها اغسل يا سي وحيد، مننا وسهرانين، اغسل، وأدي انتو مونسيني.
- والله فكره أما اقوم أنا كمان اغسل. يابت يا بطه، يا عصفوره، شوفو نبويه فين تيجي تساعدني.
- يعني انا اللي هاتفرج عليكم، أما اقوم انا كمان اجيب الحنتين اللي جوه واغسلهم زيكو يا بت يا ألفت.
- الصُرم ولع حالا.
- حسنه جرجرت الطشت. وام رامي قرفصت على العتبه وسحبت الغسيل.
- جاتكم خيبه نسوان يعني هو الغسيل هايجمض، اقعدو اسمعو وانسو الشغل شويه.
- يوه يا علوه طالما قاعدين وصاحبين، آدينا بنتسلي.
- الواد سعد ولع الولعه، والليله هنتللع.

هو حد خاب خييتي، ولا شاف اللي شفته.

حد يبيع الغالي بالرخيص؟ عشان إيه والله ما انا عارفه. هو كان عبط، ولا باينه كان عبط. خدتنني خالتي لابنها. وخيروني عماتي، قالولي: تخدي ابن عمك؟ ولا ابن خالتك؟ قالت لهم اروح مصر. واتجوزنا. جابولي عماتي شىء وشويات. سرير نحاس بعواميد، ولحافين حرير أطلس خالص، وإيش، وإيش، ملولي الدنيا حاجات من اللي قلبك يحبها. حرير على رمش العين، هدوم، وهدوم، لو فضلت ألبس فيها العمر كله ماتخلصش. ومضوني وكتبوني. وجاءت عمتي بعد الفرح بجمعتين، وقالت لي: مبسوطه يا بنت اخويا. قلت لها: مبسوطه يا عمتي، ربنا ما يحرمنيش منكم، وازي عمتي صفيه، نفسي اشوفها، هيا عينها لسه تعبها؟

ضحكت عمتي ندا وقالت لي: عمك صفيه خلاص نظرها راح، وما بقتش تقدر تمشي، وانا بايني كمان قربت احصلها. الدنيا قدامي عماله تفتح وتقف، ياالله بقى حسن الختام، فتك بعافيه ياابنتي وخلي بالك من روحك ما اوصكيش، انتي فى بلد غريبه وكل شىء فيها صعب، وان غبت عليكى، أو طولت، متزعليش، ابقى تعالي انتي بقى، فتك بعافيه.

عنها وراحت عمتي ندا ماشيه، خدها ابن عمي، عرفت بعدها بشهرين ان عماتي جوزوه بنت خاله، وقعد معاها فى البيت، وان عمتي ندا رخره نظرها راح. وقعد ابن عمي ع البيت وع الغيط. وانا

فضلت سنين وسنين. ليام تجبيني، وليام توديني، لحد ما ف يوم لقيت
عبده جوزي راجع من الشغل يجري.
مالك يا عبده؟

الحقي يا بت، عماتك، لتتين ماتو. همي، شهلي، نلحق الدفن،
همي يا بت يا لوزة. رميت الجلابيه على جنتي وطررت، لقيت
النعشين خارجين من الدار ورا بعض طابرين. والناس بتهلل وتكبر.
(شهدنا لك ياختي، انتي وهيا شهدنا لك. ربو اليتيمه في دارهم،
عيشهم كانت شبعانه بيه الكلاب).

أنا اليتيمه، رقوبة البيت، ربوني عماتي، صفيه وندا. خدمتهم،
خدمة العبد للسيد، بعد ابويا ما راح في الفجريه وهو بيقص العنب
بالمقص، الكهريا شدته. مات. امي حصلته على الاربعين، وفضلت
عماتي، واحده منهم عاجزه، والتانيه شوفها على قدها. كبار، ما
اتجوزوش رغم اللي حيلتهم. ثاني سنه وفي نفس الميعاد، مات عمي
بنفس الطريقه، وفات قرني. خدوه عماتي، وبقي اخويا. وبقينا اربعة
في البيت اتنين يتم، واتنين عاجزه. حلمت عمتي صفيه بجوازنا.
وأمنت عمتي ندا عليها. بقو يقولولنا انتو اخوات. ومن ورانا يحلمو
يجوزونا لبعض. مرت ليام وكبرت. وكبر قرني.

وجات خالتي في يوم لزيارتنا، جوزها من ابشواي، وهيا من
طاميه، قالت: عايز أخذ بنت أختي لابني عويس. عايزه اوديه مصر
واستتها. زعقت عمتي صفيه وقالت: وي وي وي. ندي أرضنا
وعرضنا، لابن زاهيه يبرطع فيهم، واحنا اللي ربينا وكبرنا. احنا
عاوزين نجوزها قرني ابن عمها.

صرخت فيها وقلت لها: لأ يا عمه. عايزه ازور الحسين والسيدة.

ضحكت عمتي ندا وفهمت وقالت: خلاص يا صفيه يا ختي لوزه اختارت ابن خالتها، صحيح كنا عايزين نجوزها ابن اخونا. لكن هه، هيا وكيفها. احنا طول النهار والليل نقوللها: قرني اخوكي. ازاي أخت تتجوز اخوها؟!

عمتي ندا ناصحه، عندها نظر. جهزوني، واتجوزت. تاني اسبوع كان ابن عمي خاطب بنت خاله. بعد الاربعين. قلت له: فين حقي؟ ورثي في ابويا، ورثي في عماتي؟

ضحك قرني وقال: ... حقك خدتيه. ولولت: إمتي؟ كيف؟ طلع لي حجه كبيره، ووراني بصمتي. تنازل عن حقي ومستحقي. حقي في ابويا وعماتي. رجعت بقفه بلح وقفص عنب. لقيت الأمير جوزي قاعد م الشغل. وفضلت ابيع حاجه ورا حاجه. ومن أوضه لأوضه، لأوضه. لحد مارسيت هنا. شفتي يا حسنه، شفتو يا ولاد.

حد خاب خيبتني، ولا شاف اللي انا شفته.

يا اختي... خلي زكايب الهم مربوطه.

طب انا اقول إيه؟

وانا لا حيلتي ولا معايا. طلعونني من البيت يا مولاي كما خلقتني. كنت متجوزه ابن عمي، هو مش ابن عمي قوي، مش عصب يعني، لكن كان قريبي من بعيد، واحنا عندنا أي قريب من ناحية الأب يبقى عم. المهم، امه كانت قرشانه، وتلات اخوات بنات، اصغر واحده فيهم من دوري. طول النهار غسيل وطبخ وهريه، وآخر الليل ما قدرش اتلم على جوزي، ولا نقفل علينا باب. لو قفلت تبقى يا داهيه دقي.

امه كانت تشرشحلي «بتقولي له إيه؟ بتصلتيه علينا ليه؟ انت عايزه منه إيه؟

اروح متقيه شرها وافتح الباب على اخره. وياما أيام كثير دخلت علينا امه واحنا...

هو يشقى ويتعب طول النهار بره، وانا اشقى واتعب طول النهار جوه، وآخر الليل ما نعرفش ننلم على بعض. تفضل هيا وبناتها قاعدين زي قرد قطع في الأوضه، ولاتقوم ولاتخلي عندها دم، نبقي قاعدين انا وهو نسقط من النوم من التعب وهيا قاعده تحكي، كلمه من الشرق وكلمه من الغرب، المهم ماتسبناش الا لما تتأكد اننا رحنا في النوم خالص ومش قادرين، وساعات هيا اللي تغطيها قبل ماتخرج. ويا ويلي، لو لبست قميص نوم، ولا هدمه جديده، تبقى يا داهيه دقي، تدور نتغمز هيا وبناتها. وإن جيبنا نص كيلو لحمه، ولا

طببخنا حبة طبيبخ، يا طلّت اغمس لقمه، يا ماطلتش. ولما فاض بيا
الكيل، قلت له: نخرج، وآهي بلاد الله واسعه، ونعيش على قدنا.
يومها زغرلي وعلمي فيها عنتر، وقاللي: واسيب امي واخواتي
لمين، انتي ناسيه ان مالهمش حد غيري.
قلت له: نخرج، ونبعث لهم اللي فيه القسمه، وطل عليهم، انا
مش حاشاك. بس اعرف اتم عليك، ويبقى لنا باب نرده علينا. احس
اني مرّه وليا جوز.
قاللي: بس، بس، نامي بلاش خيبه. ما تقفلي الباب حد منعك،
وقام رايح مفروود، وخبط الباب برجله، راح كسره.
أوضه، وصاله، فيها سبع تنفار نايمين زي الفراخ، على بعض،
امه وابوه وتلات بنات وانا وهو، تبقى دي عيشه. وكله كوم، واللي
حماتي كانت بتعمله كوم تاني!. طول النهار قاعده في الشارع هيا
وبناتها، تجر شكل دي، تلقح على دي، ما هي فاضيه، وعندها بنات
تنفقات لها بلاد. كل يوم عاملين لهم غاره مع حد من الجيران. كانوا
بمسكو الواحد من دول، يدوها العلقه، ولما تشتكيهم في القسم. كانت
حماتي تروج فكه ربع جينه تعاريف، ورايحه على القسم. تبكي
وتنهقه قدام الطابط.
وتقول له: شوف يا بيه، استلفتهم من كل بيت حبه. دانا غلبانه يا
بيه، وبجري على ولايا.
تدفع الربع جنيه الغرامه من هنا، وتروح طالعه من هنا، وقبل
ما توصل البيت تكون دقت المرّه اللي شكيها حته دين علقه، تخليها
تقول حقي برقبتي، ويمكن تسبب الحته وتعزل.
جوزها! كان لا حول له ولا قوه، غلبان، مش قدھا، عارف انه

لو فتح بقة بربع كلمه ياخذ على دماغه. ببسرح طول النهار، بعربيه
ترمس في الشوارع، وآخر الليل يتلم على جنب وبنام. كانوا عاملينه
فرخة البيت، يموله اللي فايض منهم، لقمه ناشفه، حبة طبيخ بايت،
شوية رز فاضلين. مع إنه عمره، ما كان يدخل فاضي، كان دايم
بيجي حضانه مليون، إشي برتقان، على استغندي، على لب، هما ياكلو
ويتشدقو، وهو يضحك، ومبسوط.

كان يصعب عليا، لما اشوفه بياكل وهو بيتصعب ويمصمص
في شفايفه. بعد ما ياكل، يشرب له نفسين من السجاره، ويحمد ربنا،
وان طلب كوباية شاي، ييه!! تذله، تقولله: ما تروح على القهوة،
ولا نام وريح جنتك أحسن.

كانت هيا وبناتها ينامو على السرير، وهو يفرش جنب الحيطه
في الزقر، وبنام. وكانوا عاملين له طبق لوحده، ولا ياكلش معاهم،
أصلهم كانوا بيقرفو منه، ومسمينه أبو ريال. أصله كان دايم حاطط
مضغه ف بقة، بتاعه كده كان يشتريها من البقال ويفضل يمضغ فيها.
هو صحيح كان يقرف، بس ربكم والحق، كان بيصعب عليا
قوي، لما كنت اشوف الدمعه تفر من عينيه، ويمسحها بكم جلبيته
وهو ساكت.

حماتي كانت مفترية، وبناتها أكثر، وماكنتش اطيق اشوف اللي
بيحصل ده. ومره عيي عيا جامد، تنه عليان بيه لحد ما مات. ما
كنش بيشكي من حاجه، أكثر من انه دايم نايم، وكان بيعملها على
نفسه زي العيال الصغيره. كنت فارشاله خيشه وحاطه مشمع زي
العيال. كنت اشيله، واقومه، وأكله بإيدي، واغير له الفرشه والهدوم.
وهيا قاعده زي الباشا، تقوللي اعلمي وسوي.

ومرة عيب، جامد، بايني من كتر القرف، بطني وجعتني قوي،
ورفضت الأكل لحمد ما اصفيت، ما هو بقى يعمل الثقيله رخره على
نفسه، كان خلاص برك وخط.

وجت في يوم تغير له، لما انا رقدت، واسمعها يا اولاد بتضربه
بالشيشب، وفين يوجعك على طيزه، وتقولله: مش عيب عليك راجل
شايب وعايب، وتعملها على نفسك زي العيال.

انا سمعت كده، الضرب حز في قلبي، والدمعه فرت من عيني،
قمت جريت من ع السرير، وخذته في حضني، وقعدت اطبطب
عليه، وابوس في راسه، واقول له: حقك عليا بابا، ماتزعلش، انا اللي
غلطانه، امسحها فيا انا، والله بعد النهارده ما هاسيبك أبدا، أنا اللي
هاشيلك، واحطك، واغير لك، انشالله اكون باموت. وفضلت وخداه
على صدري. وهو يعيط. وانا اعيط.

ليلتها يا اولاد لا نمت، ولا هوب النوم من عيني. وساعة الفجر
فضلت ادعي له واقول: يارب والنبى ياتشفيه، يا تاخده وترجه من
العذاب اللي هو فيه. دا حرام، حرام والله العظيم، وراحت عيني في
النوم، إلا وشفيت، خير الله اما اجعله خير، سيدي، أبو ابويا، ما هو
كان يبقى عم حمايا لزم. شفته واخذ حمايا بالحضن، وقعد يبوس فيه،
وراح ضمه لصدره، وواخده بين درعاته، وقام ماشي.

وانا انده، وأقول له: رايح على فين يا سيدي، فايتنا ورايح فين
بابا. وفضلت اصرخ واعيط واجري وراهم زي المجنونه. لحد ما
انفلقت من العياط.

لقيت عبيد بيزقني ويقول لي: قومي يا بت، مالك. انشاهدت،
وطلعت اجري على الصاله زي المجنونه. وبصيت على عمي، لقيت

سر الإله طلع، فضلت اصوت، واصرخ، لحد ما كل اللي في البيت
صحيو على صريخي. واقول: يا حبيبي بابا. لغاية لما حسي اتحاش،
واترميت ع الأرض، ورحت ف دنيا غير الدنيا.

ساعات كنت اسأل نفسي واقول: يا ترى لما تكبر هاعمل في
جوزي كدا، النار تقيد في جتتي. واخرج على بره هاجه، وافضل
اسح من عينيا. ربكم والحق البيت فضي علينا، الراجل كان ماليه،
كان له هله. كان طول بعرض، وبقيت مش طايقه البيت ولا اللي
فيه، وكل ما افتكر، نفسي تغم عليا. ومره نفسي هفتتي على رنجه،
اتاريني كنت باتوحم وما عرفتش، عبيطه بقي، أول مره، وكنت
محوشه قرش ومخبياه، ورحت عند ابو شراقي وجبت منه رنجايه،
وشويتها، وقعدت أكل. لو انتو كنتو دقتوها، يبقى انا دقتها.

وتيجي بنت الكلب من ورايا، وتروح لاويه شعري على إيدها
وبالشبشب وفين يوجعك. يومها فرجت عليا أمة لا إله إلا الله.
وفضلت تشتم، وتدعي، وقالت: ان انا سرفقتها، سرقت منها بريزه.
مع ان القرش ده محوشاه من المليم، كنت كل ما مسك جلايه عبيد،
واجى اغسل ألقى في جيبه مليم، نكله، كنت احوشها. ولما جه
ولقاني عينا زي كاسات الدم، وشعري متبهدل، وقلت له.

قام ربنا مقدره على الطيب، وقاللي: مانتني اللي غلطانه، ليه ما
اديتيهاش القرش، وانتقيتي شرها، وقتلتلي انك نفسك ف الرنجه، وانا
اجيب لك بدل الكيلو، انتنين.

صرخت فيه وقلت له: يا انا، يا امك. قعادي معاك كوم، ومع
امك كوم ثاني. اختار، يا انا يا هيا. غضبت، شهر ورا شهر، إن
يسأل، ولا يقول ليا مره، أبداً. وجبت محمد، وجه يزورني، قلت له

تاني: نازل ونشوف سكن لوحدها، نبقى على حريتنا، ونربي عيالنا.
قاللي: هيا دي عيشتي، عاجبك!
سبيته وخذ مني الواد، وسنه وراها سنه، لما جيت اتجوز غيره،
راحو باعتين لي الولد، وقالولي: خدي ربييه.
واديني محتاسه. وجيبت امي من البلد، بعد ابويا ما مات،
وأجرت لها أوضه، كات بتقعد بشويه حلويات قدام مدرسة شجرة
مريم، لكن امي كبرت، والمصاريف كترت عليا، والدنيا غلا، أعمل
ايه. قعدت افكر جوزي مش راضي يصرف على امي والواد، ومش
معقول ارميهم. اشتغلت، الشغل مش عيب، باطلع من طلعتها،
لغطستها، نزلت مصر الجديدة، وادينني بالقط رزقي، اغسل عند دي،
انفض الشقه لدي.
المخفي جوزي لما عرف اني باشتغل، وباجيب قرش، راح
قاعد، وبطل يروح محل العصير اللي واقف فيه. وبلطج على قفايا.
تقدرو تقولو لي عملت ايه؟. قعدت، وشغلت الواد محمد في
ورشة نجاره، لكن مصروف الواد ما قضاش، رجعت الشغل تاني،
وقلت له: طلقني. عيب لما اجري عليك وانت شحط.
سابني، رحت جاييه امي والواد وقعدو معايا. إيه، وادينني
عائشه.

طب انتي بتقولي كده، أمال اني راح أقول إيه؟

الهم في الدنيا مفرق، قطعت الرجاله، وقطعت سيرتها. طب انتو عارفين علوه جوزي ده، اللي قاعد هناك، عمال يحشش، ويشد في الجوزه، وعامل ابو عرام. ده يبقى ابن خالتي بجد، وفي نفس الوقت ابن عمي، انا اكبر منه بكثير. انا من دور اخوه سعد الله، الله يرحمه، وكنا مخطوبين، وكان فرحنا قرب. وانا كنت حيلة ابوي، ومدلعي ع الآخر، أصله كان مبسوط وكان نزهي، صحيح انا وحشه لكن فلوس ابويا، خلت ابن عمي يطلب إيدي، ويتجوزني.

وفي يوم من ذات الأيام، قبل الفرح بيومين، يعني كان صباح الحنه، وكنا الضهر، آه والله فكراه زي ما يكون دلوقتي. وسعد كان جي لنا، وهو ماشي إتفاجئ بديب، ديب كبير طالع عليه من وسط القصب، راح سعد مطلع مطوه حاميه من جيبه وفضل، يلف والديب يلف وراه وعلى غفله راح شاطط رقبته وقاطع ديله، وجايه وجاي. امي فضلت تزغرت، تزغرت.

راح ابويا خارج البنديقه بتاعته، ونازل طاخ طيخ، ابن اخويا جاب الديب من ديله، ابن اخويا جاب الديب من ديله. الدنيا هاصت والبلد اتلمت، والطلق اشتغل وهات يا ضرب، وفجأ سعد الله وقع، وقع سايح في دمه. مات. شيلت النيله، وطفيت الشمع، وصبغت هدوم العرس، وفضلت على الحال ده كثير، عشرين سنه، لحد ما مرات عمي ولدت علوه وكبير، وأول ما بقى عمره ستاشر سنه جوزوهوني،

كان ابويا مات، وامي فضلت تتجوز، اخواته ده ورا ده، لحد ما
اتجوزت اربعة، وكل واحد خلفت منه أورطة بنات. ولما جات مرات
عمي، تجوز ابنها علوه، قالت آخذ واحده من بنات خيتي، اخف عنها
الحمل. عمي صدرني ليها، وقال لها، بخيته كبرت، وما حد راح
يتجوزها، اللحم يلزم اصحابه، وانا هديها كل ورثها من أبوها. الطمع
عمي عين ابن خالتي وخدني، لكن ربكم والحق خالتي ما كانت
راضيه، آمال هيا شيلاني على راسها وزاعقه ليه. لكن باقول إيه،
القسمه والنصيب. ومن يوم ما علوه خسر القرن في لعب القمار وهو
لا على حامي وعلى بارد، وكل يوم، يرزعني العلقه، وبدي اطفش
منه، لكن البننتين ذنبهم إيه. وهو نفسه يرميني للكلاب من الصبح.

* * *

كان يوم عيد الي شفتكم متجمعين.

- سالخير يا ولاد.
- خير عليكي يا خالتي ام عكاشه، فينك يا وليه، بقالك مده مش باينه ليه؟
- كنت عند ام هاشم يا ولاد، خدو بركة الست.
- ايه دا فول نابت. تعيشي وتفتكري، نظره ومدد يا ست.
- هو المولد جه.
- أيوه يا ولاد.
- مش كنتي تقولي يا خالتي كنا روحنا معاكي.
- يو..ه يا زنه يا بنتي دا يوم من السنه للسنه.
- ايه كنتي بتشحتي يا خاله؟
- أشحت ايه يا نبويه يابنتي، ودي كلمه برضه تقوليها. أنا عمري ما مديت ايدي إلا اللي خلقني. أبداً نبت شويه فول، وقلت حلوة ام هاشم، وجبت لكم حبه، وقلت ادعي ربنا يرجع الغايب.
- ياخالتي دا انتي وراكي رجاله يسدو عين الشمس، وهما يدورو ويسألو. انتي وليه كباره، وكفياكي شقا.
- كان يوم عيد يا زنه، كان يوم عيد، هو فيه حد ببسال على حد. انا كدا حلوه لا اميل على حد، ولاحد يتضرر مني. وحياتكم يا ولاد انا لما احب ازورهم، باخد غدايا معايا. خلاص خدت على كدا من يوم ابوهم ما مات، قولي يا عيني يا حيلي، ما يمسخش دمعتك إلا

إيدك. اتهلجت عليهم بدري، كبرت، وربيتهم، وعلمتهم، وربك اللي بيرزق. لكن مش حاشش ضهري، وهاموت ناقصه عمر، قبل ما اشوفه، إلا مهدي، ابني، أصغرهم، أبوهم مات وهو لسه صغير، علمتهم كلهم، لكن هو شد في العلام قوي. ولما خلص خدوه الجيش، وأهو من يومها لا حس ولا خير. ماحدش قادر يدلني. ناس يقولو تلاقيه راح حرب اليمن. ناس تقول دا لسه جديد وبكره بيجي، وأهو شهر ورا شهر، والعمر بيجري وأنا مش قادره، نفسي اشوفه قبل ما اموت. أعرف إن كان عايش ولا ميت. هاموت بحسرتك يا ولدي. قولت اعمل شويه نابت، وازور الست ام العواجز، وامسح ضريحها بطرحتي، واطلب وادعي، ربنا يرجعه لي سالم، غانم، يارب شالله يام ام العواجز يا طاهره، بردك ليا يا ولدي، انت وكل اللي زيك، ولا يسونيش فيك ربنا، ولا اشوفش يوم فيك يزعلني. رحت للكبار واحد واحد. اللي يقول اصبري، واللي يقول معرفش، واللي يرد الباب في وشي. قالوا اكتبني للريس، خلّيت ابني الكبير كتب له جواب، وحلفته بالعزير الغالي، قلت له: يا ابو خالد، يا حبيبي، انا وليّه هجاله. وربيت بنن العين، وسهر الليالي، وخلص قربت اموت، يهون عليك اموت قبل ما اشوفه، يهون عليك يا ريس.

- ربنا يصبرك.

- هاقول إيه يا ولاد، فردت حجري لكل اللي يديه لي. عوضني عليك يارب، عوضني في تعبني وشقايا وسهر الليالي. يا ضنايا يا ابني، يا حبيب امك يا ولدي. مهدي، يا مهدي، فين أراضيك، ولا فين قبرك وأنا ازوره.

- يا حبيبتي يا اختي، الوليّه هاتتجنن على ابنها، يا ولاد.
- أمال إيه يا ام رامي، ربنا مايكتبها على عدو ولا على حبيب، هو
بيولع القلب قدهم، خصوصا الغايب.

- عاجبك كدا زنة الكلب، آهي هتبات تجعر، طول الليل، ومش هنام منها يعني كان لازم تسألينها دايمن عامله زي الغراب تنكشي وتدوري على النكد.
- يوه يا علوه، يعني انا كان قصدي، كان بدي اتطمئن عليها، ما هو الهم في الدنيا مفرق، والبيوت قافله على بلاوي.
- جرى إيه يا مره، اتلمي وقولي يا مسا، لحسن اقوم امسيكي.
- ياخويا جاك هم، ماوراكش غير يا مره، يا مره.
- بتقولي إيه يا بنت المركوب.
- ولا حاجه يا خويا، ولا حاجه. ياللا نقوم ننام.
- ياللا يا ولاد تصبحو على خير، ياللا يا واد يا حسن لم اخواتك وياللا. تصبحو على خير، الحفله شطبت، والنهار قرب يطلع.
- وانتي من أهله يا حسنه، ياللا بنا احنا كمان يا ولاد. يا رامي يا ألفت، زمان ابوكم راجع، ولو لقاكم لسه صاحين هايطين عشيتنا، حاكم هو راخر نكدي.
- ياللا يا رامي، ياللا يا أوفه، قبل لما تقلب بغم. تصبحي على خير يا زنه، ياللا يا اختي لمي العيال وخشي، واخزي الشيطان وبلاش تقفي له ع الواحد، إبقى فوتي. بلاش تعملو لبعض زي ناقر ونقير.
- يا اختي، جاته داهيه فيه وفي امه، هو اللي قارش ملحتي، ما انتي

خابره البير وغطاه، بيتلكك ابن سعدة، تلاقىها قاعده جنب السيده،
تبكي، شكى. جاتهم الهم، عيله غم.
- على العموم يا اختي ما تديهومش فرصه، تصبحي على خير.
- وانتى من أهله يا ام رامي. الحقي، الحقي يا صباح جوزك بوز
الغراب وصل.

.....
زمر، کرکر، فرویکا.

طبل، طبل، مزیکا.

حتہ راجل انتیکا.

- شوفي يا اختي الراجل كإنه حاوي، وطلع العيال من الشقوق. بقى
يا راجل لامم الصغار ومضحكهم عليك. تعالى يا امه شوفي اللي
انا فيه. الراجل الشايب، العايب، عامل ضهره قنطره. والعيال تنط
من عليه.

- إتلمي يا مره، وقولي يا مسا، العيال أحباب الله.

- يا راجل اعمل لك هيبه وسطيهم، مش تأخذهم عليك.

- يامرہ یاأم مخ ضلم، ساعه لقلبك، وساعه لربك.

- ولما بتنزل فيهم دق، وتضرب العيل مطرح ما تطلع روحه، يبقى
حلو؟

- كذا يا صباح، قلبتي مزاجي. طب روعي، روعي، شوفي بدر
المجنونه قاعده فين واقعد ربحها. قولو يا ولاد قولو.

زمر، کرکر، فرویکا.

طبل، طبل، مزیکا.

حتہ راجل انتیکا.

أنا حسي غني وقوي، أنا حسي غني وعفيتي من النار.

أنا في حيرتي إلى يوم المات، ومن الدار للنار.

راح الجدع، آه يا وجع...

آه يا ذل القهر والمقهورين، والذل له أسرار.

آه يا زمن يا أبو البدع، لما الشايب والجدع يقعو ف غرام بنت عطيه،
واكله ناسها، وقالعه راسها، ونفسها تترمي في حزن حد حالق
راسه وعادم ناسه، زي ما كنت الأم بتدعي وتطلب ورب العباد
يسجل في دفاتره الكبيره. كنت ساعتها، يدوب الفستان ابتدي يترفع
من ع الصدر والبزاز تبرز، والعود بيتدور.

إيه الحلاوه دي يا بت؟ إيه النار دي يا دلع؟

إيه اللي صابني لما شفتك وانت بتدعي. رايح جاي، رايح جاي،
عيني منك يا راكب العجله، وفي حبك لا بيع المكنه.

- آهين وآه يا بت، آهين وآه ياعين، آهين وآه على الغمازات اللي
في الخد تنغز وتبان، والسن يضحك.

وجلابيته مكويه وإيديه نضيفه، بياضه يشق ينور في الضلمه.
ساعتها بس، حسيت أنا اليتيمه، بنت الناس الطيبين، ورقوبة البيت،
حياتي بتتور وتتجلي، وفي ليله من الليالي جه ودخل، فتح الباب،
شفت النور. كإن السما والأرض كانوا طابقين على الصدر. دلوقتي
بس حسيت إني ممكن اشوف أم الدنيا مصر. يا عنبي يا عنابي يا

فيومي وبلدي، لكتب عليه ويبقى حلالتي. وكانت الدنيا، والدوخه، والأوضه الحق، والشباك المقفول، والباب المتوارب، والعيال يتسرسبو عيل ورا الثاني، وافضل انا كدا، وحيد، باستنى لحظه ما يرجع ويدق الباب. كداب يا باب، كدابين يا خلق، الموت لا خد مني الواد، ولا خد مني البيت، الموت لا خد الأهل ولا خد الرجل، الرجل راجع، مسيره ييجي من الشغل.

هو قال: « يا بدر، يا بداره، يا نور عيني. إوعى تفتحي الباب، الناس غيلان بره، وانت غلبانه لا تعرفه تسدحي، ولا تعرفي تقدحي، خليك مستنيه، وانا في العشه راح اجيب الوكل، ونساهر يا بت. إوعاكي يا بدر إوعي الغرور ياخذك وتفتحي لحد، ولا الباب يشوف طولك، كل اللي تعوزيه يا بت أجيبه لك. بس اسمعي الكلام وانتاري، إياك يابت إياكي.

إياك انت يا حبيب القلب، وساكن النني تغيب عني، وتحرمني من إني اتلي بنورك واشوفك جنبي. الجواز ستر وغطا، والست الحره ما بيان ضالها بره إياك تحزن أو تخاف، خليك في شغلك صاحي، الناس تنام وانت عين المولى عليك حارس، واللي يختشي من بنت عمه ما يجيش منها عيال. وانا حامياك، وحاميه عرضك، وعلى الود والعهد باقيه، وروح الشغل، وماتحملش هم. الناس للناس، والجيران لبعضيهما، وانا نفسي هفتني على الخلاوه السمسيه، والليله مولد المطراوي رايحه آخذ، أي ولد من عيال حسنه وازوره، واحط الي فيه النصيب وادعي له: والنبي يا سيدي المطراوي انا سايقه عليك حبيبك النبي، تفك ضيقتي، تجعل بطني تعمّر، والشهور تكمل،

وينزل العيل، وتخليه، وطول لنا في عمره وانا عهد عليا ما اخطي البلد، ولا ادخلها برجلي طول ما العيل صغير، انا خلاص عرفت ان العين فلفت الحجر، وان عيالي زي القمر منورين، وانهم ولاد موت، يارب ارزقني بعيل ولو يكن عبيط، آهم يقول خلفت والعيل عاش، وزندن عليا والنذر يوفى الدين أطاهر العيل على بابك وامد ايدي واملس على شباكك، واحط على راسه، وان خليته، لا جيب فردة حلق واحطه في ودنه، ويوم الطهارة ارميها في صندوقك. واشحت سبع قروش بيض شحرومين، من سبع محمدات، والبسه لبس بنات. ولا اعمل سبع، ولا أبهرج، وافرق يادوب بلح، وان ماكتتش عايز بلاش، هفرق رز بالبن. "بس خليه لي يفتح عيني ع الدنيا".

دانا وحدانيه، وجوزي وحداني، والأهل راحو، وماشفتهمش، واللي ربوني اخوالي، نفسي ف قريب من دمي، ومن لحمي، وبفرّح قلبي. آه بطني انتفخت وولدت، وجه الولد وعاش، بس الراجل راح الشغل زي كل ليله ومن ساعتها لحد دلوقتي ما رجعتش، حد يقدر يقوللي راح فين، حد يقدر يقوللي مارجعتش ليه، يكون زعل، أو خد على خاطره، أو حد وقع ما بينا. لا... لا مستحيل يغيب كل ده، هو راجع.

إرجع بقى.

يا حبيبتى يا اختى، يا بدر البدور، الحلوة

الجميله نواره البيت، ناكشه شعرها وقاعده على العتبه، جنب
الحيط عماله تغزل في الهواء، وتفك، وتنده على جوزها، اللي غرق،
في الصيف، عند معديه عثمان ومارجعش.
كان هو وسبعه اصحابه من العمال، رايعين وردية الليل، وكانت
الدنيا قمره، لا كان القمر غايب، والمراكبي عمال يغط في النوم.
ندهو عليه: يا حسن يا مراكبي، قرب يا واد وهات المعديه
وتعالى ع الشط، الدنيا ليل، والقمر مش طالع، مش شايفين، وميعاد
الشغل قفز الريس صعب وكشر، ووشه يقطع الخميره م البيت. وكل
ما يشوف واحد منا غايب يخضم له يوم، واثنين قرب يا واد هات
ايدك يا حسن، هات ايدك يا ابو على. هيا الدنيا برد كدا ليه، الدنيا
كحل، ترعة الإسماعيليه ساكنه وهاديه ومكنونه. ما تولع يا واد شعله
ولا حتى عود كبريت.
إلحق يا واد، المركبه بتميل، إلحق يا واد المركبه بتغطس، إلحق
يا واد المركبه بتغرق! إلحق يا واد رحنا خلاص.
وراحو السبع جدعان في نوبه واحده. من يومها والغلبانه قاعده
قدام الباب. بتستني ومش قادره تصدق إن الحبيب راح، ان النور
انطفئ، والليل بيليل، والنهار بيضيع. يا حبة القلب يا بداره.
- اسمعي يا حسنه احنا لازم نساعدها ونرجعها لأهلها،
- اسكت يا ابو سعد الله لا يغلب لك وليه. ترجع فين ولا تروح فين،

- هيا يا ونداه ليها حد.
- ليها ربنا يا وليه، اللي ما أحسن منه حد.
 - دي يتيمه، ومقطوعه من شجره، والحتة العيل اللي عاش لها عبيط. ما بيعرفشي الفره من التره، ولا السما من العمى، وطول النهار العيال حاطينه جوه قفص وعمالين يجروه في الشارع.
 - يا حول الله يارب. ليها رب اسمه الكريم. خلي بالك منها. واوعي تخلي زنه ولا حد من العيال يزعلها. وابقى حنى عليها باللي وجود عليكي بيه ربنا. وياريت تحاولي تفهميها بالراحه إنها بتغزل في الهواء، واللي راح راح. انا رايع الشغل، تصبحي على خير.
 - روح يا اخويا يكفيك شر اللي في الغيب، وشر اللي متدارى، وكيفيك شر اللي ماتطبق شره.

* * *

ياللا يا ولاد الضهر إدن. ياللا المدرسه.

ونادو على اخواتكم سعد وبطه وولاد زنه، ياللا يا ألفت، ياللا يا رامي. وانتى يابت، إمسكي أخوكي في إيدك، وخلي بالك من العربيات وبصو كدا، وبصوا كدا، وانتو بتعدو. خد يا حبيبي قرش آهه. هات حاجه حلوه، وادي اختك تعريفه، وبلاش البمب ده، ولا العجل، وانتى بلاش مراجيح، لحسن تقعي، وتتكرس رقبته، مفهوم.

- حاضر. حاضر يا امه.

شاطر يا حبيبي. يجعلك حاضر، ما يجعلكش غايب أبداً. يا سلام، انتو حياتي، وعيني اللي باشوف بها.

- ماما... ماما.

- إيه يا مقصوفة الرقبه.

- إنتي صحيح هاتجيبني أخ تاني.

- يعني إيه يا بت.

- يعني هاتجيبني نونو.

- آه، مين اللي قالك؟

- خالتي، حسنه كانت بتقول لخالتي زنه، إن شهرك في العيد. وإنك سابقه زنه بأسبوع. راحت خالتي زنه ضاحكت، وقالت لها، هو انتي يا حسنه حاسبه لكل واحده، قالت لها: آه حاسبه، انا بحسب لكل واحده، وانتى هتولدي بعد العيد.

- يامقصوفة الرقبه، وانتى إيه حشرك، وسط النسوان، يا بنت سراج.

آه يا صَنَاتَه، عاده وحشه دي قوي يا أوفه، اسمعي يا حبيبتي، البنات الحلوه، اللي بتروح مدارس ما تقعدش مع ستات متجوزين، واحده تقول كلمه كدا، ولا كدا، يقولو بنت صباح صَنَاتَه؟ عيب يا ماما. البنات الحلوين ما يقعدوش مع الكبار. ولا يشتمو، ولا يلعبو مع الصبيان، ولا يضحكو، بيتسمو بس. لو جدك كان عايش، كان قطع رقبتك، دا أمك مره واحده ضحكت، لماعرفت إنها هتتجوز ابوكي، وقالت عليه زمر. جدك ضربها قلم، لسه يابنت الكلب سخن لحد دلوقتي، وودني بتوش منه.

- ياماما. جدي دا كان زمان. احنا دلوقتي في آخر سته وستين. وبعدين ولاد حسنه، وولاد زنه يلعبو سوا، بيطلعو فوق السطح، ويلعبو عروسه وعريس، أنا شفتهم. وكمان شفت ابنك بيبوس بطه.
- يابنت الوسخه. إيش عرفك يا بت.
- واد يا رامي غور، روح انت المدرسه وسيب لي بنت الكلب دي اربيها. تعالي. تعالي يا مقصوفة الرقبه.
- آه يا امه شعري، شعري، حرام عليك.
- اسمعي، رامي ولد، يعمل كل حاجه على مزاجه. هما عيالهم فجر، أوساخ، إنما انتي لأ. لازم تبعدي عنهم، سامعه.
- حاضر، حاضر، بس سيبني شعري.
- يابنت الوسخه، من النهارده ما فيش شارع. ما فيش خروج. مافيش لعب، من المدرسه للبيت، ومن البيت للمدرسه. رجلك على رجل اخوكي. وشيلي القُصه دي من على عنيك.
- حاضر، حاضر.

- وبعدين صدرك ملا، والواد سعد بصباص، إوعي أشوفك واقفه معاه أو تكلميه، ولا تروحي هناك. سامعه. يا خساره ماطلعتيش لامك. طلعتي هبله وعبيطه. يا بت انا نفسي اخليكي، احسن من امك، حظك ما بيقاش زي حظها، راجل نكدي، وخلفته تسد النفس. نفسي تاخدي واحد موظف، تبقي حلوه، وهدومك نضيفه، وتاكلني لقمه حلوه، وفرشه حلوه، مش تنامي بجلايبة البيت، وتقومي في نصاص الليالي، تتكفي، وانتني مع جوزك تبقي مسكوفه وتتدارى م العيال بستاره، يا بت افهمي، دا امك شاطره، وناصحه، بس يا خساره، قلة البخت، الله يسامحه جدك، جوزني الورشه، وفضل ابوكي.

بابت حسي بيا، وخلي عندك دم. البيت النضيف يحوي سكان نضيفه، والبيت الوسخ، يلم سكان من كل اشي إن كان، فران، وصياد، وخدامه، وآخر الليل يبصو على بعض من شقوق الحيط. انت فاكهه خالتك زنه كدابه، ابدأ دي بتتكلم صح، بس انا اللي بداري، ياما عمك علوه ده، جري ورايا لحد الكبنيه في الضلمه، وانا أزقه: بلاش فضايح يا راجل اختشي لامراتك تسمع.

- مراتي دي يا صباح رتل جاز يخلصني منها، بس انتني قولي آه، دانا مخليها عشان خاطر العيال، آهي تخدمهم، جاتها القرف فيها وفيهم. دي زنه، عارفه يعني إيه؟ زنانه.

- بس يا اخويا عيب، أنت ... وانا ...، وبعدين جوزي شراني، وهو صحيح يقرف اكثر من مراتك، بس انا مابصش لحد تاني، آهو مكفيني، وساترني، واهي ايام بنقضيها يا اخويا والبركه في الولاد،

- بكره يكبرو، ويعيشو أيامهم، إحنا أيامنا راحت.
- يا صباح انتي حلوه، وتتجوزي سيد سيده، انا اتجوزك، وتخلصي منه ومن قرفه، وبعدين دا سكرى، وقليل الأدب، وغلاط وفقرى.
- يالهوي، إوعى اسمع منك كذا تاني. وآخر مره تقف في طريقي يا ابن الناس. انت من سكه وأنا من سكه.
- شفتي يا بنت الحماره. لكن الصراحه من يومها ماهوبش ناحيتي. فاهمه يابنت العبيطه، الركب على الواحد، وانت كبرتني وبلاش تتطيظ، ولا اروح لخالك، واخليه يخرب بيتك.
- خلاص يا امه خلاص. انا سايقه عليكى العدرا بلاش خالي.
- خالك واعر زي ابوه، وبعدين اوعي تنسي خطبك لابنه طارق.
- يالهوي.
- ايوه يا بت طارق في المدرسه. وهيتعلم، وناصح، وطول عمره الأول، مش زى اخوكي الخايب ابو بطه.
- يا امه، اخويا اصغر مني. وابن خالي قده.
- آه لكن ناصح، فالج. إوعي من سكتي اوعي، وإياك اشوفك مع ولاد حسنه تاني. فاهمه. قال حسنه قال. إوعي يا بنت العميا حد يكون ضحك عليكى ولا باسك.
- لا.. لا.
- مالك يابت سهمتي.
- لا يا امه مافيش. بس انا شفت عمي وحيد مع نبويه.
- إمتى يابت؟
- كثير، كثير. كنت راجعه من المدرسه. وما فيش حد فى البيت.

- اشوفها واقفه معاه جوه الأوضه، يشدها ويروح قافل الباب واسمع
ضحك، واخاف واجري على بره.
- وبعدين.
- وبعدين خلاص.
- خلاص مين، خلصت روحك. احنا مالناش قعاد هنا ابدأ، البيت لم،
وبقى يخوف.
- يا حسنه. يا بت يا غلبانه. يا عيني عليكي يا اختي السوس في
بيتك وانتي بعيد، يا حسنه يا عبيطه. يا بت.
- إيه، إيه يا صباح. مالك.
- تعالي ادخلي يا اختي. تعالي يا غفلانه.
- يا امه بلاش فضايح.
- فضايح إيه، باللي تتفضحي على كلب اعمى، اسكتي. امشي اطلعي
بره، امشي وردي الباب. ردي يا جلابة المصايب.
- اسمعي يا حسنه، اسمعي يا اختي. إن كنتو ، انتو فلاحين
مابتغىروش على دمكم. احنا صعايده، ودمنا حامي.
- صعايده إيه، ولحم إيه؟ فهميني.
- بنتك نبويه.
- مالها.
- الواد وحيد، السهتان، ابن العرجي، ابوسما غاويها.
- ايه؟
- البيت ألفت، شافتهم بعينها.
- بس، بس. قولي كلام غير ده.

- لمي لحملك يا حسنه، قبل ما يعفن.
- يعفن ايه يا ام رامي. مجدي سيدك يا اختي.
- قدوس اسمه. وحيد مماشى مع بنتك. وانا قلت لك، وقبل الفاس ما
نقع في الراس، ونرجع نقول يا ريت اللي جرى ماكان. قصري لها
شويه، لميها.
- يالهوي دا كلام كبير قوي. ودي صغيره.
- صغيره، بنت تلاتاشر سنه صغيره، يا حسنه ليه ما حاضتش.
- جوزيها يا اختي، سترها. ولا اقولك هاتي ام سعودي الدايه، ولمي
عيالك وعيال زنه وطاهريهم. البنات هاجت.
- أروح فين بس، وأجي منين. ادور على مكان ثاني. يا لهوي.

* * *

كان فين متداري يا خرابي.

- سالخير يا حسنه. مالك.
- يا خرابي، يا خرابي يا ابوسعده. يا خراب بيتك يا حسنه. دي آخره
تعبك، وشقاكي.
- مالك يا وليه، عمرك ما ولولتي كدا!
- بنتك يا اخويا. الفاجره، القادره.
- مين؟
- نبويه، الفحلّه، هو فيه غيرها؟ أم عين باكسه. ديك النهار شخبطت
فيا، وضربتني، وبهدلتني، وملت اللي ما يشتري يتفرج؟
- وسكتي لها يا مَرّة؟
- لأ، وحياتك. مسكتها، عجنّتها. وقبل كده علوه، جوز زنه، قاللي: يا
حسنة بنتك بتروح الفرن كثير، لميها.
- قلت له: اسكت يا علوه والنبي، بلاش كلام فارغ، البت صغيره وبلاش
سمعه وحشه.
- قاللي: انتي حره. والنهاردا ام رامي مرات زمر، قالت لي: أنها
ماشيه مع وحيد، بنتها شافتهم، في الأوضه.
- يا بوز النحس، ألفت دي، خباصه، ونقاله كلام، تلاقي امها كانت
هتضربها، اخترعت الكلام ده عشان تسيبها. فين العيش يا وزه،
سيبك انتي النهاردا منوره، وعيني عليكي بارده، وانا راجع بدري
مخصوص، عارف انك قاعده لوحذك، والعيال بره. شوفي يا وليه،
شوفي جايب معايا فول وبصل اخضر، وطعميه سخنه، ياللا ناكل.

- يا راجل هو انت كدا بارد، زي الميه الساقعه مافيش مروه، فعلن ماكدبتش صباح لما قالت: انتو يا فلاحين دمكو بارد.
- بارد في عينيها مره ما تختشيش صحيح، اسم الله هيا اللي شريفه وطاهره، والعدرا بتلمس على راسها. هيا تقول بنتك مع وحيد، وزنه تقول جوزها ببيص عليك. والله عال، وانا نايم على وداني، نايم في المجارى. زي التور اللي بيلف في الساقيه ومغمي عنيه.
- وانت تصدق برضو.
- الله. مش انتي اللي بتقول، امبارح زنه، والنهاردا صباح. وبعدين يا هابله كل حاجه تحصل تصدقها، وزى الدبه تقولها على طول. جاتك القرف، عديمه التمييز، فيه مره هابله تقول لجوزها على كل حاجه.
- يا راجل أمال اخبي، احنا في بيت كله سكان، وكل واحد من بلد، وكل بلد شكل وطبع، واحنا غرب، غرب يا ابو سعد، لازم اقول لك، أمال يجرى حاجه، وتدرى من بره، اضيع انا... لأ، لازم تعرف كل حاجه، كل اللي بيحصل، احنا على الخير والشر سوا، والنهاردا اخوك ما هو اخوك، وابوك ما هو ابوك، ودي بلد غريبه.
- بالهوي يا حسنه، انتي بير غويط، غويط قوي، وانا اللي فكرت هبله، ما تعرفيش حاجه، اتاريكي ساهيه، ودايه ليا حق، أثق فيكي. لأ راجل يا بت، راجل. قومي هاتي لنا ناكل بقى، يا وزه لحسن انا على لحم بطني من الصبح.

نار. نار، نار يا ولاد الحقوني.

هه... هه، زقي يا صباح، زقي يا حسنه، الحق يا وحيد، يا ابو سعيد، الحقو يا ولاد، الأوضه ولعت والوليه مش قادره ع النار لوحدها.

- فيه إيه يا لوزه. مين اللي عمل كذا يا زنه؟
- آه يا ضنايا يا بني، آه يا قلبي، روعي عقلي، قلبي، ولدي، ضنايا، حشاشة كبدي، يا ولدي. يا خرابي، ياناري، نار... يا ولاد نار، نار في قلبي والعه، حريقه، حريقه يا خلق.
- ما تهدي يا زنه وتقوللي إيه اللي جري؟
- خلاص طفيناها.
- طفنتها يا لوزه، طفنتها يا ام رامي، لكنها قايده في قلبي.
- خلاص يا اختي، انا سابقه عليكى النبي لتهدي، وربنا يجازي اللي كان السبب.

- انا رحنت السوق وجيت، بفتح الأوضه لقيت ابن الكلب نايم ع السرير وماسك السيجاره وهاتك يا نفخ، والعرق نازل، مغطي الملايه، وعمال يشد وينفخ. ناديت، يا علوه، يا علوه. يا راجلي، يابو البنات، حطيت السبت من على راسي هابقع، يا واكل ناسك رد. رحنت شده من ديل الجلابيه.

راح قايم مفروود زي المارد وانداز عليا، دب... دب، وهرس
وراح شادد السبت من على راسي وهاتك يا هرس برجليه، والواد
على دراعي يصرخ، وهو ولا هنا. وقام جري على رتل الجاز،
ونزل رش في الأوضه، وع السرير والأرض، وراح شاطط عود
كبريت، وساكن الباب علينا.

شوف إيديا، شوفو صدري، نسيت الواد، رميته، وقعدت اطفئ،
والنار والعه وعماله تزغوط في الأوضه. انا اتحرقت خلاص، أنا
كنت عارفه أن دي آخرتها مع ابن الكلب. شفته كذا مره في السوق
مع البت الخضاريه ام عين واسعه، بنت الوليه بتاعة البطاطس
وعمالين يضحكو، ويمهمهو، وتحدفه بالبطاطس وتقولله: عشت يا
سبع، وعاشت مجايب إيديك. وانا واقفه وما اختشى. منك لله يا واد
عمي، منك لله حرقنتي وحرقنت قلبي، ضيعتني، وضيعت نفسك،
وضاعت الدنيا يا ولاد، خلصت خلاص.

- ولاخلصت ولا حاجه، الراجل ومراته زي القبر وافعاله. قومي،
قومي، دلوقتي يرجع.

- يرجع. جوزي ما هوش راجع يا حسنه، جوزي طلقني رمى عليا
اليمين، الفقري واكل ناسه طلقني. يا خراب بيتك يازنه، يا خراب
بيتك من بعد راجلك وضناكي.

- يا حول الله يا ولاد.

- يا اختي تعالي معايا انتي والعيال، نامو في أوضتي.

- أوضة إيه يا ام رامي. والنبي يارب اشوف فيك يوم يا علوه، يا
واد عمي، أشوفك مفضوح، تتفرج عليك البت في خباها والام في
خشاها، ويكون يوم الجمعه يا قادر يا كريم. عوضي عليك يا
صاحب العوض. عوضي عليك يا رب.

يا عيني يا خالتي زنه، مشيتي والدنيا ليل.

- إلا قوللي يا سعد، هيا مابلغتش ليه؟
- ياهيله، تبلغ عن جوزها. ابوعيالها. بكره هاتلف عليه زي الحربايه، وتاخذ تارها.
- يالهوري يا سعد انت قاسي ليه كدا!
- اسكتي يا خاييه اسكتي، انتي ما تعرفيش، زنه دي جامده، ساعات كنت باخاف منها لما كانت، تشوفنا واحنا مع بعض. تعرفي يابت يا أوفه، أحسن حاجه ان أنا وأنتي نطلع هنا، بعيد، فوق السطح، لا حد شايف ولا حد عارف.
- أنا خايفه قوي، امي تدور عليا، وبعدين دي لو عرفت اني بالعب معاك، كانت تطين عيشتي. لا يا عم أنا نازله، واقعد العب لوحديك انت.
- غوري وانتني قد الحماره، وبتخافي، أنا ما باحيش الخوافين.
- لأ يا خويا أنا سمعت امك وامي، بيقولو أنهم هايجييو ام سعود الدايه الصبح وهايظاهرو بطه وعصفوره وولاد زنه، قوللي يا سعيد، انت ماكنتش خايف؟
- أنا راجل، عارفه يعني إيه راجل، يعني اشدك كدا، واحطك ع الأرض، وانتني لو جدعه فلفصي.

- يالهوي، إوعى، إوعى كدا. انت قليل الأدب.
- يابت. يابت انتي خايفه من إيه. أنا باهزر معاكى.
- لا يا خويا انت عايز تضحك عليا. انت قليل الأدب. أنا مش هالعب
وياك تاني، أنا نازل.

* * *

اسم الله عليك يا عصفوره.

- (الأوله باسم الله، والثانيه باسم الله، والثالثه لا حول ولا قوه إلا بالله.
- جاره بتقول للجاره يا حاسده يا مكاره، ياجاره ما تيش في خساره، اسم الله عليك يا عصفوره، اسم الله يا اختي.)
- مالها يا حسنه.
 - أبدا يا ام رامي من ساعه ما راحت ورانا الترب ندفن الواد ابن زنه، والكلب طلع عليها وهيا نار قايده، واريحه راس في راس وعماله ترتعش.
 - البت انطربت يا حسنه. ما كانش لازم تاخديها معاك.
 - انا خدت، ولا اتتيلت، ما هيا اللي جريت ورانا، وطرت وراها بالطوب، هيا ونبويه الفحل، رجعتهم من قرب المسله مرتين، ولا فيش قايده.
 - يا حبيتي يا بتي. لو ام عكاشه هنا، كانت شافتها، ولا كانت جابت لها طاسة الخضه. هاتي يا اختي هاتي. باسم الصليب. إخص عليك يا حسنه، دا البت نار، وبتترعش.
 - غلبت وغلب غلبي. كإن البت اتبدلت، أو كإن عفريت ركبها.
 - مايمكن يا حسنه، ما انتي عارفه يا اختي الأرض مش لينا لوحدنا. والترب واعره ومسكونه.
 - أعمل إيه، أعمل إيه بس يا ربي، أطلع من هدومي، ولا أطلع من ديني.

- استغفر الله.
- قومي استغفري ربك.
- البت هاتروح مني يا ولاد.
- ياختي باكيه على بت. دا موت البت يا هنا، لوكان عطرها على القنا. أمال زنه تعمل إيه اللي ابنها راح في دقيقه، ولا ام عكاشه اللي ابنها مش عارفه طريقه.
- اسكتي يا ام رامي دول هما اللي مفتحين عينيا على الدنيا فكرك يعني انا حاطه امل على الولدين، أبداً وحياتك، بكره تاخدهم واحده ع الجاهز. انما البت هيا اللي حبيبة أمها، بكره هيا اللي تجري ورا النعش وتقول يا حبيبتي يا امه.
- كل واحد بياخد من جنتنا راق، وكلهم غلاوه واحده.
- ما ترقبها يا ام رامي، انتي نفسك طاهر، وبنت ناس طيبين خدي قولي شالله ياعدرا تشيلي عنها يا شباله الحمول.

* * *

نكسه ما بعدها نكسه.

- نكسه كبيره وانتكسناها، زنه ابنها راح، وجوزها طفش، وام عكاشه يا ولدها ضناها ضاع، وحسنه بنتها راحت منها. من شاف بلوة الناس هانت عليه بلوته.

- آه يا خرابي يابا.. آه يا خرابي يامه.. عاجبك كذا يارب يرضيك كدا. بقى أنا حسنه الغلبانه، اللي طول عمري راضيه بقليله، يجرى لي كدا، يكون ده جزاتي. دانا عابده، حامده، شاكراه، صايمة قايمه سهرانه اسبح باسمك، ولا عمري عملت حاجه تغضبك. تعمل فيا كدا! يرضيك كدا! فردت حجري لكل اللي تدوولي انا راضيه بيه، واللي يرضيك يرضيني. بس بلاش تقرص عليا كدا. عوضني عليك يا صاحب العوض. عوضني عليك يا رب.

- يا أختي حرام عليك فرهضتي، ماتعمليش في روحك كدا، الدنيا حر.

أعمل إيه يا لوزه؟ أعمل إيه يا ولاد دلوني؟ دى نكسه... نكسه كبيره، وانتكسناها.

أم فيفي، جنب ام رامي، جنب حسنه، جنب ام عكاشه، جنب زنه.

كلهم جنب بعض، كلهم حزاني، الدنيا ضلمت، والليل دخل،
قومي يا بدر، قومي خشي أوضتك لا الناس تدهسك، قومي يا اختي
هاتي إيدك. القلب محروق، والجسم ما عدش فيه، ولساكي بتلمني
الخيوط وتغزلي، لساكي فاكهه ان اللي راح هيرجع، لساكي بتستتي
وتحلمي. الورد دبل، والعين نورها انطفى، وابنك ضناكي مرمى ع
الأرض، والعيال عماله تشيل وتحط فيه، قومي يا ضنايا، قومي يا
قلبي. يا واد يا حسن، يا سعد، تعالو معايا يا ولاد شيلوا .. الوليه
تقلت عليا.

- نعم يا خالتي لوزه

- خد يا واد يا حسن شيل، شيل يا بني الواحد اتهد من صباحية ربنا
ما قعدش على حيله، والناس ضفه داخله وضفه خارجه. لميت
حصر الشارع وفرشتهم ولاهماش مقضيين، الناس أمم، أمم وقلبها
محروق.

أخويا في دير الملاك

وانا في شبرا. وكان كل يوم رايح جاي، رايح جاي. اقوللله:
ياخويا كفايه، تعبتي، وانت صاحب عيال وصاحب مرض، يقوللي:
دي كلها فرقة كعب، وكمان افرك السكر. وفي يوم كنا في موسم
زي اليومين دول، وكنت لسه والده الواد رفعت، بصيت لقيته جاي
في عز طلقة القباله، ومن بره وعمال ينده: يارامي. يارامي. قلت له:
ادخل يا خويا. مالك. اسم الصليب عليك ضحك وقال: أنا دبحت
النهارده، خدي اطبخي، كل سنه وانت طيبه، النهارده مولد العدرا،
إبقي هاتي العيال وتعاللي. حببت على إيدته، ربنا يخليك يا خويا،
ومايقطع لك عاده. خدي امسكي يا بوحه لفة اللحم وشيلة العضم خلي
العيال ياكلو، قلت له: خيرك سابق يا خويا: أنا طابخه، والحله ع
النار، قام فارد نفسه، وراح منتور، ودخل الدروه اللي ورا السرير
وراح كاشف الحله اللي ع الوابور، ومسك المعلقه وفضل يقلب
ويطلع.. يقلب ويطلع. وراح خارج عليا. بتكدي يابنت أبويا، طابخه
بساريه، وبتضحكي عليا. طب والعدرا ما انا ماشي إلا لما تطبخي
الأكل وتنادي ع العيال ياكلو قدامي. رفعت يا خويا، أحب على إيدك
انت صاحب عيا والسهر مر عليك وحياة اختك عندك، روح لحالك
وانا من صباحية ربنا هبدر على سوق سميكه واجيب طبيخ واطبخ.
تعرفوا ياولاد فضل قاعد لحد ما سويت اللحم، وأكلت انا والعيال،
ونامو كمان، وقام ساكك علينا الباب وراح خارج. الله يرحمك ياخويا
ويقدس روحك. عمري يا ولاد ما شفت حنيه زي دي. اللي حش

ضهري، وشق قلبي انه مات. مات من غير ما اشوفه. ثاني سنه وفي
مولد العدرا، كات الدنيا مغارب والعيال بيلعبو، بصيت لقيت قلبي
راح دب، وعيني رفت، وكبس عليا العياط، قلت الله اما اجعله خير.
وقمت ادور ع العيال وجمعتهم، وسألت نسوان اخواتي، آمال
فين رفعت ياولاد مش باين، فين ابو طارق مش شايفاه. طب فين
مراته. خبو عليا، الله يسامحهم، انه تعب وراح المستشفى، قالو الدنيا
مولد وبلاش ننكد على حد. اربع رجاله بنسوانهم وعيالهم، وانا
وجوزي وعيالي، غير لعمام والأهل. راح في شربة ميه. راح في
دقيقه واحده. راح وخد كل حاجه حلوه معاه. آه يا حبيب اختك يا
خويا، وحشتني.

- يا اختي مجدي سيدك.

- قدوس اسمه.

- هو ده طريقنا، ورايحين له، آمال امك فين، وابوكي فين؟

- آه يا حسنه آه. ما راح الصغير راخر ياولاد، نكسه، أخين يحشو
القلب ويقطمو الضهر.

- وهو مين النهارده مالوش حد راح. طب اللي مات وعرفنا مكانه،
الدور والباقي على ام عكاشه اللي نار ابنها ما راح تنطفي أبدا. كلنا
حزاني يا اختي، كلنا حزاني، دا يوم حزن كبير، حزن ما بعده
حزن.

الحرب كنست الجدعان كنس.

النكسة صابتنا كلنا.

الواحد ما بقاش عارف يعزى مين ولا مين!

- الدنيا متبهده. اللي ما في بيت ولا في الشارع إلا وانصاب.

روقي يا حسنه بقى.

كفياكي يا ام رامى.

بووه يا خالتي ام عكاشه، روقو يا ولاد، هو أنا جايه انتك معاكو شويه ولا رايحين تقلبو عليا المواجه. دانا في نار. نار سبحان مين يطفيها؟ اللي زاد وغطى، ابن الكلب جوزي، ابو زماره، سهاني وراح اتجوز عليا، واحده في عين شمس، قال وعامللي فيها ولي، اندروش وربما لي دقنه، انا ام الرجاله يسبيني! وياريت متجوز واحده عدله، إلا واحده من دور ابنه اللي في الاعداديه.

- يا اختي هم بيكي وهم يضحك. جوزك ابو سنان واقع، وحنك مطبق، ورجل بره، ورجل جوه، يتجوز عليك، قولي كلام غير ده يا ام فيفي.

- طب وحياء الشده اللي انتي فيها يا ام رامى، والله وما ليكي عليا يمين، أنا كنت واخداه بتاع ببربور، كان طول النهار يشن، والناس في الحاره كانوا مسميينه أبو شنه، شوفي بقى، خليت له بيت، وبقى راجل، وراح اتجوز.

- ما يمكن إشاعه، ولا مغرز وحد عمله فيكي.

- قلت زيك كدا في الأول، وما صدقتش، لحد ما ف مره كبست عليهم الصبح، قبل ما يصحو من النوم، بقى مكسوف مني ومش

عارف فين يتدراى. الأدهى والأمر يا بت يا ام رامى انه بانى لها بيت لا له أول ولا آخر. حتة أرض كان شاريها من زمان، وغلاوتك كله من تحويش إيدي. انا امسك على العيال في المصروف وادبر، وهو يروح يمتع بيها غيرنا. شفتي الهنا اللي انا فيه، وبتزعلو، على اللي بيموتو، انا عندي كان مات، كان اهون من اني اشوفه، واشوف خيرى رايح لوحده تانيه.

- اسكتي يا اختي ما تقوليش كدا، حسه في الدنيا ويخليه لعياله.
- يعني هو الموكوس كان عمل حسابهم، دا عنده رجاله عايزين يتجوزو، دا فيهم اللي خلص جامعه.
- ما يمكن ياختي العيال كبرو، والراجل مش عارف ياخذ راحته ما تأخذنيش يعني في دي الكلمه، يمكن بيتكسف منهم، إكمنهم ماشاء الله حواليه، رجاله طول بعرض.
- طب يتكسف ويخلي عنده دم، ويقول يا واد اعمل لعيالك، دول بقو رجاله، وبعدين هو فيه حاجه، دا وحياتك كله لعب صغار، هيه.. فوتكو بعافيه.

* * *

ابن اختي راح في دقيقه واحده.

كان صغير، وابوه مدله ع الآخر، ما كانش يقول إلا روح يا سبع،
تعالى يا سبع. كان بيحيي يقعد معايا بالساعات ويحكي لي.

يقوللي: يا خالتي الحرب دي أهوال، واللي شفناه في اليمن معقول
نشوفه تاني!! كنا بنضرب في بعض مش عارفين مين مع مين؟
والجينا اندارو علينا وبقو يضربونا.

حرب ملهاش معنى، كنا لما نزهق نذك البلد باللي فيها دك. نجيب
عاليها واطيها. كنا بنموت بالميات. كنا بنشوف الواحد فينا بيموت
ومانقدرش نعمل له حاجه، وفي مره كنا اربعه عطاشى جعانين
والدنيا نار والشمس قاده. وكانوا لو شافو واحد منا يضربوه،
فضلنا بعطشنا لحد ما جينا مصر، مصر اللي ربنا دعي لها.
شفتي يا خالتي ام عكاشه مش انتي بس اللي مجروحه. انا ساييه
اختي في البلد عماله تهبر، ولا حدش قادر عليها. فرشت جنب
طربته ونامت. النار كاويه الكل.

- طب انتي يا حسنه، واختك عارفه طرية ابنها، الدور والباقي عليا
اللي ماعرفاله قرار. إن كان حي ولا ميت. هاروح بنارك يا ولدي،
حزينه عليك ليوم الدين.

- روقي يا خالتي، ما هم بينجو من الحرب ويموتو موته تانيه كله
بتاع ربنا. يعني ابن اختي رجع من اليمن، لكنه راح في دقيقه

واحدة. كان مسطح على القطر، وقام وقف وماخذش باله. طب وقع
والقطر فرمه. روقي.. روقي، وحياة الغالي لا تهدي. والفاتحه لكل
الميتين، اقري لهم الفاتحه اقري، ربنا يكرمنا زيهم.

* * *

مادريتوش؟

- ايه يا وحيد وقعت قلبنا.
- بيقولو عروسه اخذت في اسكندريه. الأرض انشقت وبلعتها وهيا ماشيه في الزفه مع عريسها.
- يا ساتر يارب.
- وبيقولو نزل وراها الرجاله، مالقوش حاجه، غير فردة جزمه.
- يالهو بالي.
- استر يارب.
- يا حفيظ...
- وبعدين يا وحيد يا بني كمل.. كمل.
- بيقولو الحكومه قالبه الدنيا. وما حدش عارف حاجه.
- وده سمعته فين؟
- شفته في الجرنان، بص يا ابو سعد، تعالو بصو، بصي يا زنه، أهه أدي الشق، وأدي الناس.
- دا بير غويط، شوفو يا ولاد.
- طب انتو ماعرفتوش إيه اللي حصل امبارح. بيقولوا واحده قتلت ابنها هيا وعشيقها.
- وي.. وي: كيف تقتل ضناها. وهان عليها، وجالها قلب.
- آمال ايه بكره يا زنه نسمع عن اللي قتل امه، واللي قتل ابوه.

- آه يا اخي، قلة ايمان، شوف يا أبو سعد. الدنيا خيرها قل، والناس نسيت ربنا.
- حقه يا ولاد، لو ده حصل تبقى القيامة هاتقوم.
- دي علامات الساعة. حسان اليماني قال الدنيا جت على كفر، وهاتروح على كفر. (يا خفي الألفاظ نجنا مما نخاف. يا لطيف. يا لطيف لك في كل البلاوي تصرف).
- إلحقي يا حسنه جوزك اندروش.
- ما هيا حاجه تشيب لقرع يا ولاد، جد يصدق ان ده يحصل. بقى مصر ام الدنيا، اللي الرسول دعى لها، يحصل فيها كل ده.
- لا ومن مين يا حسنه من شويه يهود لا عندهم ذمه ولا دين.
- يارب نزل عليهم نجمه تحرقهم ولا فيضان يغرقهم قادر يا كريم.

* * *

الشتا ييجي والبيبان تتقفل على بلادي.

والليل يطول، والسهر يحلى قدام الراكيه، والشاي السخن. والحواديت
تتحكي والكلام يزيد، وحبل الكلام مالوش آخر. والسهر ايه تطول،
ونتونس بالحكايات ونقلب في اللي راح واللي جاي، والعيال، يتدفسو تحت
اللحاف، اللي يذاكر، واللي ينام، واللي يلعب وهو قاعد. والله الأيام الحلوه يا
ولاد بتخلص، والضحك غلي. طب من قد ايه ماضحكناش، ولا عملنا
حلاوه. فاكركه يا بت يا ام رامي، لما كات زنه تعمل، حلة حلاوه قد كدا،
وتدور تفرقها علينا، كنا بنبقى زي اللي في عيد، ولما زنه تعمل كاكما،
وصويتها يطلع الشارع والعيال تهيص، ويخطفوها، ويدورو ياكلوها، وف
الآخر يلزقو بعض بيها.

- ولا فاكركه يا حسنه لما مسكو، الواد ابن ام فيفي ودهكو راسه،
والواد راح لامه يعيط زي العبيط، وهيا فضلت تصوت، ولمت
علينا الشارع.
- ما هو واد عبيط وعامل زي البنات. هو كدا الواد في وسط بنات
يبقى بنوته، والبت في وسط صبيان تبقى ذكر.
- حقه يا حسنه، البت أوفه، بنتي المخفيه، ساعات باحس أنها بت
ذكر، وما فيهاش من الأنوثة شيء.

- انتي بنتك دكر، وانا بنتي هايجه، وزنه بناتها عفشين، والله ما احنا عارفين هاي تجوزو ازاي دول.
- يا اختي بكره خراط البنات يخرطهم. واللي جوز زنه، يجوزهم.
- دا كان زمان يا ام حسن، النهارده، الراجل عايز واحد متعلمه زيه زيه، ويمكن يكون عايزها موظفه كمان.
- حقه يا ام رامي ده كوم، والوظيفه اللي طالعين فيها الايام دي كوم ثاني. امبارح رحت اقدم للبننت بطه في مدرسة المسله إلا ولقيت لك مين هناك.
- مين؟
- تصدقي بالله انا ما عرفتها حطه لحرر وليبيض وعمله شعرها السد العالي وهيا اللي عرفتني، وجابت لي شاي كمان. البت الكبيره بنت ام فيفي.
- مين؟ أفكار، فيفي.
- قال ايه بتشغل سكرتيره في المدرسه. وراحت واخده مني الورق وهيا اللي ملته، وقدمته. وسألتنني ليها اخوات هنا. قلت لها لا. اخواتها كلهم في شجرة مريم. بس انا عايزاها تبعد عنهم، عايزاها تبقى لوحدها، أصلهم بايظين، وكمان العيال ولاد اللامون بينطو من السور وينزلو الوحش ويضربوهم، وياخدو منهم الأكل. وانا خايفه عليهم، وكمان هناك سوق سميكة، خليها عندكم احسن. يمكن تغلج.
- يخيبيك ربنا يا حسنه، انتي ما سمعتيش، يا مره، عن عفارييت المسله.
- عفارييت؟

- ايوه بيقولو فيه عفاريت ساكنه الأرض، اللي فيها المساخيط، هناك عند زرايب الخنازير، عند الطرب، في الغرب. قال إيه الأرض بتتشق وبيطلع عفريت يخطف العيال وينزل ثاني تحت الأرض. دا الدنيا هايجه، والحكومہ قلبه الدنيا هناك، قال بيقولو لقو اشارات هناك بيفتحو.

- يالهو بالي نروح فين ونيجي منين.

- أنا عن نفسي يا حسنه بعمل إيه، كل يوم بودي البت ألفت المدرسه وانا رايحه السوق، وارجع اجيبها بنفسي، ما بقتش آآمن عليها المخفي رامي. كان بيسيبيها ويروح يركب عجل، وهي ترجع لوحدها.

- إحنا احسن حاجه يا صباح نقعد العيال من المدارس ونريح دماغنا، بلا تعليم بلا وجع قلب.

- ومين سمعك يا حسنه انا عن نفسي، قلت لبنبت الشرموطه أوفه، لو ما نجحتيش السنه دي في سنه رابعه، هاقعدك، خصوصا المخفي رامي طالع وراها، والمصاريف تقلت علينا، وكمان المخفي وديع هيخش. السنه دي هو كمان. الواحد مش عارف يلاقيها منين ولا منين، من المدارس، ولا من الحرب، ولا من الغلا.

- آه يا اختي الواحد غلب وغلب غلبه. مش عارف يلاقيها منين ولا منين؟

* * *

من يوم ما المهجرين جم والحاجه زادت الطاق طاقين.

- والدنيا غلبت علينا.
- آه يا ام رامي، ما هو حدايه من الجبل تيجي تطرد أهل الوطن.
 - جبل إيه، ووطن إيه، يازنه!! دول أهلنا واخواننا.
 - يووه يازنه، سدك كدا واقفالي ع الواحد.
 - اسكتي، اسكتي، وانتني مش عارفه حاجه.
 - طب إيه رأيك من يوم ماجت الوليه ام جلامبو، والدنيا بقت نار، والعيشه مش طايقيها.
 - دي مين دي اللي بتنده عليا.
 - عاوزه حاجه يا زنه نيجي، تحبي اقوم لك.
 - شفتي آهي جات ع السير، مبسوطه يا حسنه عاجبك كدا.
 - جرى إيه يا مره، تحبي نقوم لك ولا إيه.
 - لأ يا اختي فضلة خيرك، دي زنه، هيا كدا لسانها متبري منها، وبتحب تهزر.
 - تهزر ولاضابحه تقول ياشر اشتر.
 - ما احنا آهوه كافيين خيرنا شرنا، قاعدين، سينا دارنا، وسينا وطننا، تركنا الجمل بما حمل، وطلعنا يا مولاي كما خلقتني.
 - اسم الله يا اختي، جيتي وسط أهلك وناسك، والله يا شيخه لا انتني ساكنه، وكفاكي بكا، يا حول الله يارب، يجازيكي يا زنه ع الصبح، قلبتي المواجه.

- جوزي كان راجل بمبوطي قد الدنيا، وكنا ساكنين في حي لربعين، وابويا كان بيشتغل في الكنال. انضربنا، واتبهدلنا، قمنا شيلنا العيال هبلا بيبلا، وهاجرنا. أنا جيت المطريه، وأمي سافرت بلدها عند اخواتها، واختي راحت الصعيد عند أهل جوزها. يعني اتفرقنا وكل واحد راح في يمه. ابويا وجوزي قالو مانسبش الأرض، لازم حد يفضل. فضلت الرجاله، وجاءت الحريم.
- حريم مين يا امه، أمال الرجاله اللي مالين سوق السمك، واللي بيتاجرو في كل حاجه، واللي دايرين يهلبو، بيقو مين؟
- تاني يا زنه تاني. إحنا هلبيه؟ طب والله دي ما هيا معديه لك بالساهل، واما يجي جوزك، راح نقول له على كل حاجه، يا ناشفه، يا خباصه.
- يووه يا زنه اكنمي واخترشي أمال، انتي شبطه يا اختي، نار ماتتطفيش.
- آه يا ولاد لو شفتو اللي شفناه، ولا عشتو اللي عشناه، لما نار جهنم تبقى فوق روسنا، وطيارات العدو ماليه السما زي المطره، وترخ على روسنا كنابل، تبقى حاسس إن القيامة قامت. اللي بيوتهم اتهدت، واللي تجارتهم راحت، واللي عيالهم ماتو، كل ده، ومش طايقنا وسطيكم، وانتو هنا نايمين وسط عيالكم، ولا خسرتوش حاجه. واحنا اللي خسرنا الجلد والسقط. وعشان كذا جاين تنشطرو علينا، وكل يوم والتاني عيالكم يضربو العيال، وبعدين الحراميه والنور كترو اليومين دول.

- عالم صابغه ولا شغله ولا مشغله، طول النهار متلطحين ف الشوارع زي الدبان.
- عيب يا زنه اكده.
- اكده! هو انت صعيديه؟
- أبويا من سوهاج، جه السويس ورا أكل عيشه. انتي يا زنه لو كنتي شفتينا قبل الحرب ماكنتيش قلتي اكده.
- إيه، كنتي السفيره عزيزه؟
- واكثر. كان الرزق بيطف من الحيطان، ومغرق الدنيا. وبنلعب بالفلوس لعب. وفي يوم وليله، كله راح. الفلوس، والبيت، والأرض، والعيال.
- يووه يا زنه، مافيش فايده، حتى لو قطعو من جنتك بالحته، انتي هو انتي، واللي فيه داء عمره مايسبلاه. الوليه في حالها، كافيه خيرها شرها، مالك ومالها. وبعدين دول ضيوفنا ولازم نشيلهم على راسنا من فوق.
- والله يا حسنه انت حماره، وناقص بطلع لك ديل، وما انتي فاهمه حاجه. صح يا رامي ولا لا، حتى اسألي لوزه مرات عبيد، دا حتى بدر المجنونه شافت، وسمعت، وانتي كدا هتتك كدا على نياتك، جاتك خيبه مره.
- ماتز عيش يا ست أم جلامبو، زنه دي طيبه وقلبها ابيض. وانا من سوهاج من إدفو، وياما سافرت السويس مع المرحوم ابويا، كان لينا قرايب هناك. وزنه دى، من القصر، بس هيا كدا، لسانها متبري منها.

- أبوه، كلكم طلعتو قرايب ومافيش غريب في البلد الا احنا.
- أبوه، يا حسنه انتم تبتون على تانتن، طلو لتتين انتن وانتن.
- حوش يا علوه عنا مراتك.
- فيه إيه يا مَرّه. مراتي دي مش هانتلم، إلا لما اسمّها، زي الفيران.
- يا اخويا انت راخر، وانا مالي. ما هيا البلد هيا اللي فيها كلام، والكل بيتكلم، اللي يقول عليهم حراميه، واللي يقول نشفو علينا الميه في الزير، والحاجه غليت، وبقت بالغلا والكوا. امبارح جيت أجيب كيلو قوطه، كنت باجيبه بتعريفه، وسواعي لتتين بقرش. النهارده رحت أجيب، البياح مارضيش بخليني احط ايدي، وقاللي الكيلو بقرشين. ولما قلت: والغلابه يجيبو منين؟ قاللي: بلاش تاكلو قوطه، كلو مش.
- بتقولي إيه يا زنه.
- هو ده والله يا ام رامي اللي حصل، وجيت افهم فيكم من الصبح، مش عايزين تفهمو.
- يعني الدنيا ولعت. واللي زينا يجيبو منين. يا ساتر استر يا رب. أَلطف بعبيدك يا لطيف. يعني بكره الرغيف يبقى بقرش والرتل الجاز يبقى بقرشين.
- أبوه يا حسنه. انا سمعت ع القهوه امبارح ان الجاز هابقي بالكوبون على التموين.
- يا لطيف يا لطيف، لك في كل البلاوى تصريف، وإيه يا علوه، سمعت إيه كمان؟
- سمعت حاجات كتير. بيقولو كل حاجه هتبقى على البطاقه. الزيت،

- والسكر، والرز، واللحمه، حتى القماش هابقى بالبطاقه.
- يالهوي. على كذا الواحد يلم الحنتين العيال، ويطلع بيهم ع البلد، آهو يرمحو في الأرض، وياكلو.
- ياحسنه يعني الغلا هنا وبس. الغلا هتلاقيه في كل حته.
- آهو يا علوه حتى نبعد عن الضرب حبه، وكل شويه طفو النور، والغاره تضرب، حتى المدارس ياريتهم يقفلوها.
- المدارس مش مهم. الخوف لا إسرائيل تضربنا زي ما ضربت الكنال.
- انا سمعت امبارح من العيال ان يقولو لهم في المدارس. خلى أهاليكم يدهنو الإزاز ازرق، وكل بيت يبني قدامه حيطه. وانهم لو لقيو حاجه في الشارع أو على الأرض، ما حدش يوطي وياخذها. شوكلاته، بسكويت، قلم، لعبه، أي حاجه. بيقولو دي متفجرات، الطيارات بترميها.
- حقه يا حسنه. الواد رامي ابني، بيقوللي، دول لقيو واحد اسرائيلي عند القسم نازل بالبراشوت، ومسكوه.
- اسكتي، طب إيه رأيك ان البت نبويه بتقوللي، أنهم مسكو اتنين في سوق سميكه، عاملين نفسهم شحاتين، وبيخطفو العيال، ويدبحوهم عند العرب. قال إيه في المسله كنز، ومش هايطلع، الا بدم اربعين عيل. ولازم يكونو ولاد.
- آه ممكن. الطرب هناك، يدفنوهم ولا من شاف ولا من دري.
- طب إيه رأيكم، انا سمعت، من واحد صاحبي في الفرن بيقول أن عندهم في البلد واحد اسمه محمد الميت. ده مات وبعد ما اندفن،

وقعد في الطربه اسبوع بيفتحو الطربه لقوه صاحي وعمال يلعب.
وسموه محمد الميت.

- يا اختي، يا اختي. علامات القيامة يا ولاد. القيامة قربت.
- طب إيه رأيكم بقي، والكلام دا في سركم، ان امبارح، ابو رامي قاللي حاجه غريبه، وانا افكرته سكران وببخرف. قال بيقول إيه، إن العدرا طلعت له وهو ماشي جنب سور الكنيسه، في الزاتون.
- العدرا طلعت، آدي اللي كان ناقص. مش باقول لكم ان القيامة هتقوم. طالما العدرا ظهرت، يبقى المسيح هينزل ويقتل المسيح الدجال. يبقى الدجال ظهر يا ولاد. واحنا مش عارفين. مش يمكن هو واحد من اللي عاملين شحاتين وببخطفو العيال.
- لأ يا حسنه. المسيح ده لسه بدري عليه شويه، لكن دي علامته، احنا سمعنا في الكنيسه كدا.
- يا لطيف اللطف. يا خفي الألفاظ نجنا مما نخاف. يا لطيف الطف بنا دا حنا غبيدك كلنا.
- إيه يا حسنه. كدا تتجنني.
- أتجنن يا علوه؟ هو فيه اكثر من كدا جنان.
- اسكتو يا ولاد اسكتو. مادريتوش.
- إيه يا ابو رامي، وإيه اللي جايك بدري كدا، وجاي قاطع النفس، حد بيجري وراك.
- حد إيه. الدنيا مقلوبه بره، والناس ماليه الشوارع بيقولوا العدرا ظهرت في مسطرد. وفيه ناس شافت راجل أعور بعين واحدة شايل على ظهره قربه ميه، وماشي في سوق سميكه يسقي الناس.

- يالهي. هو المسيح الدجال. زمان الشيخ قال لنا في الجامع، انه
هايظهر ويبقى شابل على ظهره قرية ميه. واللي يشرب منه، ينسجى
امه، وابوه، والدنيا كلها ويمشي وراه. لغاية لما يبقى مفيش غير
عشره هما اللي ها يرفضو يشربو. وهما اللي هتفضل في قلوبهم
كلمه لا إله إلا الله. وزى الدنيا مانشات على كفر هاتروح على
كفر،

والناس هتقتل بعضها، والحروب تملأ البلد. والميه تخلص من
ع الأرض، يقوم المسيح ينزل ويقتل المسيح الدجال. وتقوم القيامة.
حسان اليماني قال كذا. قال: زى ما نشئت على كفر، هاتذهب على
كفر.

- يالهو بالي يا ام جلامبو. واحنا هانعيش لما نشوف كل ده.
- لا.. إحنا فين. ولا احنا، ولا عيالنا، ولا عيال عيالنا. ده هايحصل
في آخر الزمان.

* * *

.....

ماما جاتيلي أشارب حرير

نيمتني على السرير

والسرير طوح طوح

ما يخلش حد يروح

إلا جمال ومراته

والناس تحلق بحياته

حياته تمر حنه

أكبش منها واتحني

- من يوم ما مدرسة بحر البقر انضريت، وقعدو العيال من المدرسه،
والعيال فرحانه، وماقاش وراها لا شغلته، ولا مشغله غير اللعب،
وتصديع الدماغ.
- وياريت على كدا وبس يا حسنه. إلا في الآخر يلعبو، يلعبو،
ويروحو غادرين على بعض، وهاتك يا ضرب.
- صدقتي يا ام رامي، عمرهم كانوا كدا، إلا دايمن كانوا اخوات
وحبايب، واللي في ايده حاجه بيدي الثاني.
- هما عيال ام جلامبو، اللي علموهم القساوه، عيال غدارين،
وخطافين، دايمن يخطفو اللعب من إيد العيال. والغرابه يبقو
ضاربين العيل من دول ويروحو يشتكو، ويعيطو لامهم.

- ما هو ضربني وبكى، وسبقني واشتكي.
- حقه يا زنه، عامله زي الغراب هيا وعيالها، وتطلع من طلعتها لغطستها، ما حدش عارف بتروح فين، ولا بتسوي ايه.
- بصو يا ولاد معايا كدا. مش دي لوزة اللي قاعده جنب الحيطه هناك، عند أوضتها عماله تعيط وقاطعه خس.
- آه صحيح يا حسنه، دي باينها بتبكي.
- أيوه يازنه، وحاطه إيدها على خدها.
- بصي يا ام رامي معايا كدا، اندهي عليها.
- يا لوزة، يابت، كفى الله الشر، قاعده بين لعتاب كدا ليه؟
- اسكتي يا ام رامي وسبيني في حالي الله لا يسئلك.
- قربي يا حسنه قربي، البت صدغها بيخر دم. يالهو بالي يا ولاد، شوفي بُن يازنه عند ام فيفي، ولاحد من الجيران، اجري با بت شهيلي، البت خدها ببشلب دم.
- بت يا لوزة. مين اللي عمل فيكي كدا يا فقريه.
- الله يخيبه راجل من دون الرجاله، المخفي جوزي، اتمكن مني امبارح، وراح قاطم خدي.
- يخيك مرّه. وتسببيه يابت لما ياكل خدك بالشكل ده، يا عرة النسوان.
- اعمل ايه يا ولاد. ماهو غصب عني. امي وابني نايمين معانا ع السرير، وابن الكلب عايز...، اجيبه شمال، اجيبه يمين، مافيش فايده. خفت يصحو، سكت.
- يخيك، تسكتي لما ياكلك بالشكل ده؟.

- أعمل إيه عايز يتشطف. وامي وابني راكبين على نفسنا، ومافيش حد عنده دم. تعرفو انا ساعات بانزل تحت السرير واستخبي، المخفي عفي وانا غلبانه، هو برضو مش عارف ياخذ راحته.
- وإيه باين عليه قاعد.
- قاعد يا اختي.
- قعد على قلبه حجر، من يوم ما عرف اني باشتغل وهو مطيز لها، ونايم في الخط.
- البن آهه. لفيت لحد ما لقيته.
- هاتي يا زنه هاتي. وياريت تجيبي مرايه من عندك.
- المرايه أهه في صدري.
- بصي يا حزينه بصي. شوفي القهران.
- بس لحسن امي تسمع.
- تسمع ! ما هاتشوفك.
- أمي نظرها على قدها، ولما تعرف، يبقى يحلها ربنا.
- طب وابنك؟

* * *

جرجس العسكري، اشترى أرض في المرح وهينيه

- اسمع يا سراج، احنا ما بقاش لنا قعاد هنا، لا زم نعزل، العيال كبرت، والأوضه ضيقه، ورب هنا، رب حته تانيه. اسمع انا من الصبح هاساعدك.
- تساعديني ازاي يا صباح، ما انتي بتخطي معايا الجزم. وانا بادق مسمار ولا مسمارين، آهي ماشيه.
- الجزم في المحلات ماليه الدنيا، انا هتاجر، الرزق يحب الخفيه. هاشتري كام فوطه، على كام ملايه، وهابيعهم بالقسط.
- منين يا صباح داحنا يا دوبك، انتي فاكراه، اني مش عارف انتي بتعلمي إيه، بتروحي السوق آخر النهار، وابو قرشين تجيبه بقرش، بتشتري الخضار شروه.
- على العموم وحياة رامي وألفت ما انا ساكته، ألا لازم اسأل وانتطقس، واروح للوليه مرات جرجس العسكري اللي بيع لك بيادات العساكر. وأسألها. اصل انا باحلم ببيت ملك. امبارح وانا باندده على أم أحمد الدايه، شفت بيتها، حاجه إيه ترد الروح، واحنا ماشيين نتكلم عن الدنيا والغلا اللي نازل يرخ.
- قامت قالت لي: اسمعي يا بت يامرات الجزماتي انتي شاطره ومدبره، وجوزك على قده فيه أرض في المرح، رخيصه، اشترى حته كذا وروحي فيها، انشاله تبني عشه بالصفيح وتقعدي. أهه اسمه ملك. وحياتك انا عامله البيت ده من تدبير إيدي، هو عمك ابو أحمد إيه؟ حته عسكري في القسم.

- صحيح يا صباح.
- آه والله، الدنيا كلها على كذا. والبت نبويه محوشه معايا قرشين.
- آخدهم ابيع واشتري، ولما تفرج ارجعهم، ولا من شاف، ولا ومن
دري، ويمكن اسأل ام فيفي على جمعيه صغيره، بريال في الاسبوع
كدا ولا حاجه.
- اعلمي اللي تعرفيه، أنا خارج.
- يرزقك برزق غيبي، لايتحد، ولايترد، ولايكون له في الدنيا قد. يا .
سراج يا ابن دميانه.

* * *

ساخیر یا ولاد.

- مین خالتي ام عكاشه، هل هلاك شهر مبارك.
- ازيك يا حسنه يا بنتي.
- ازيك انتي.
- إيه يا وليه غطستي مره واحده، كدا ليه؟ كنتي فين؟ اتفضلي ادخلي.
- آه يا بنتي. لفيتها عزب وبلاد، ماخلتش مطرح إلا لما لفيت فيه. ما خلتش باب إلا لما دقيته.
- حكاية ابنك برضه.
- هو حد واجع قلبي غيره.
- يا حبيبتي يا اختي.
- زرت أوليا الله الصالحين. فتحت المنديل، شفت الأكثر. ولا حس ولا خبر. ولدي ضاع يا ناس، ابني ضاع يا خلق، ابني راح ولا رجعش.
- إلهي يصبر قلبك. إرخي عليها الصبر من عندك يا رب. ماجابهمش قلب واستريح. وولادك يا خالتي. يدورو معاك؟
- ولادي! كل واحد ملهي على أكل عيشه. هما منا، لكن احنا مش منهم. ابنك طول ما انتي بتأكله ومحتاجلك. لكن أول ما يستلم له على مرّه، قولي ياللا السلامه. آه ربت الخايبة للغايه.
- ربك مسيره يعدلها، هو اللي لا يغفل ولا ينام. قادر يرجع ابنك هو وغيره.

- مالك يا حسنه يابنتي، عمرى ما شفتك حزينه كدا.
- أقول إيه يا خالتي، واعد إيه. الراجل اتدروش، وبقي يغيب بليام والليالي وأسأل، يقوللي كنت مع الإخوان في حضره عند زميلنا. مره فلان، ومره علان. مره في البركه، ومره في بلقس، ومره ف الشرقيه ف مولد ابو مسلم وأهو داير يعط، وسايب الجمل بما حمل، واللي زاد وغطي، مابيرو حش الشغل، وكل ما اسأل عليه حد، يقوللي ما جاش، أدور أنا، ادور عليه مره في المرح، ومره في القلج.
- من إمتى يا بنتي؟ دا طول عمره راجل دوغري وفي حاله، إخوان إيه؟ وحضرة إيه؟ شايفنا فايقين ورايقين.
- البت نبويه الفحل، رخره من امبارح ما رجعتش، وسمعت طراطيش كلام وانا باجيب العيش من الفرن الصبح، انها متلمييه على واد فحل زيه، ودابيرين ينكشو في الزبايل سوا.
- ودا واد مين ده؟
- أنا أعرف، بيقولو، واد أسود كدا، من العيال المهجرين، اللي طلعلونا في البخت، كنا ناقصينهم روخرين.
- مش عارفه ارواح فين؟ ولا آجي منين؟ دبريني يا خالتي.
- التدبير لله يا بنتي، تبات نار تصبح رماد. تعالي نلف عليها، نسأل العيال.
- سألت. حتى الواد ابن ام لالو العبيط. رحت لامه الدكانه وسألتها. بس امه قالت حاجه غريبه، قالت بتبيع سمك في السوق مع العيال السوايسيه.

- طب ما تروحي تسألني عليها.
- بيه، رحت، وخوضت في زفارة السمك، ما خليتتش مطرح. جيبته من عزبة العقاد، للميدان لشارع المطراوى، للامون، لمسكن شجرة مريم، لسوق سميكة. ولفيت من ورا الكنيسة وعديت رحت أرض البلسم والخارجة، ومحطة القطر، ولفيت ورجعت عين شمس ع المسله على شارع التروولي، ورجعت تاني ع الميدان. رحت القفاصين والزاتون. ماخلتش، لحد وابور الميه، ورجعت من عند سيدى ابراهيم لفيت المطريه لف. أنا قلقانه، الراجل والببت، هجو مره واحده.
- أمال فين العيال، انا شايفه البيت فاضي؟
- أم رامي وعيالها راحوا يمّه، ولوزه وحسن راحوا يمّه، وسعيد وام فيفي وعيالها راحوا يمّه. الشارع كله ببلف، الناس كلها بتدور حتى وحيد خد دبله في سنانة وراح طالع ع القسم يبلغ. وقال هايطلع على مستشفى شكري والدمرداش.
- روقي، روقي. والغايب مسيره يرجع. ما انا اهه، سنين وأيام. فين من أيام النكسه وانا بالف.
- الله يصبر قلبك. يرجعه لك سالم غانم هو وكل اللي زيه.
- اسمعي يا حسنه، خشي اتوضي، واستغفري ربك كدا، وتعالى اما نصلي ركعتين لله في سيدك المطراوى. واحنا ان شاء الله هنرجع نلاقيهم، ولا اقولك، قولي شالله يا اهل الله، واندرى ندر للسيدة. ولا قولي شالله يا عدرا، يا ام المسيح ترجعي الغايب، واندرى لها ندر، قولي لها، ياللي المطريه حمتك وقوتك، انتي وابنك. وابقى روحى عند الشجره وملسي عليها، يمكن ربنا

يفك عنك. تعرفي يا بت يا حسنه ف المولد بتاع العدرا اللي فات، انا رحت
وحطيت في الصندوق اللي فيه النصيب، ولقيت حواليتها. وانا باقول لها
وبابوس اعتابها: أنا سايقه عليكى حبيبك، خرجي اليهود ولاد الكلب،
اللي خدوا ضناكي، واللي طفشوكي من بلدك، وجيتي حدانا يا عدرا،
رجعي الغايب، رديهولي. وحياة المسيح حبيبك اللي اتكلم في المهد، وحياة
من رفع السبع سموات وحما ولدك ورفعته عنده، إوعي تنسيني يا عدرا.

- إيه يا خالتي. مابقاش الا النصارى اللي نطلب منهم.
- اسكتي يا بت ما تخيبيش. طب إيه رأيك، أنا رجعت من عندها
حاسه كإن هم كان على قلبى. وانزاح، وان ربننا مش هاخيب
رجايا. وندرن عليا، والندر يوفي الدين، إن جاني خبر عن ابني،
سوى حي أو ميت، لأعمل ليله لأهل الله، وودي للعدرا اللي فيه
النصيب، طب والنبي لودي لها خروف، وادبحه ع العتبه، وافرقه
عندها ع الغلابه. اسكتي يا بت اسكتي. خصيمك النبي ما تعيبي
فيها، اندري لها حاجه وشوفي. كله عشان الضنا يهون، قومي يا
بت قومي، نلحق المغرب في سيدك المطراوي، المغرب غريب.
وادعي وقولي: يا رب نزل عليهم نجمه تحرقهم، ولا فيضان
يغرقهم، اليهود ولاد الكلب. ادعي يابت. وقولي يا عدرا، يا أم
المسيح، يا طاهرة، رجعي الغايب، وقولي يا بت قولي.

* * *

اللي جوزها غايب، تاكل الطبخ ني وتقول عليه طايب.

- مالك يا حسنه قاعده بين لعتاب ليه؟ دا مش كويس عليكى والدنيا مغارب.
- أبدا يا لوزه. العيال لحد دلوقتي ما رجعوش، وقلقانه.
- برضو ما حدش رجع.
- أبدا. لا الرجاله رجعو. ولا البت جت. ولا اللي خرجو يدورو حد رجع وبل ريتي.
- معقوله؟!؟
- طب الوليه ام جلامبو فين هيا وعيالها؟
- قال إيه، راحو مولد العدرا، خدو فسيخ وبصل، وراحو مسطرد يتفسحو.
- طب إيه رأيك يا حسنه ما تيجي نروح، مش يمكن نلاقيهم هناك. تكون بنتك خدت حاجه كدا ولا كدا، وراحت تبيعها في المولد. ما انتي عارفاه، تحب القرش زي عينها، وتحبيه من تحت طقاطيق الأرض.
- آه والنبي ازاي فاتتني الحكايه دي. طب استتي خالتك ام عكاشه بتعمل كبنيه وجايه، كنا هنروح المطراوي نصلي وندعي.
- مطراوي إيه، سيبك من الوليه الخرفانه دي، قومي، قومي، بلاش كسل.
- ولا يكون حد من العرايشيه لاف عليها.

- عرايشيه.
- أبوه.
- فيه واد كدا، بببيع امشاط وفلايات بيقف على ناصية ابو شراقي،
شفته كذا مره واقف وياها، بيقولو له يا ملهم.
- يا نكدي. انتي تقولي عرايشيه، وام لالو تقولي سوايسيه.
- اسكتي باينك خاييه يامرّه، ولا تعرفي التره من الفرّه. كله من.
الوليه ام جلامبو جلابه المصايب، هيا اللي فتحت عينها على
الفرش، وطمعتها، ودابره تحوم حواليتها، عايزه تاخذها للواد
اخوها، واد فحل وابيضاني ودمه سم، باشوفه في سوقه سميكه
كثير، بببيع فسيخ وملوحه. دا حتى ام جلامبو اتخانقت مره مع
العيال العرايشيه اللي في الشارع اللي ورانا، وقامت مجزره، بين
السوايسيه بتوع السمك، والعريشيه بتوع الفسيخ والملوحه، وبتك
كانت وياهم.
- وماقولتيش ليه يا لوزه من ساعتها.
- انا باحسبك عارفه.
- كدا سايباني على عمايا، وأكل في روجي. منك لله يا ابو سعد،
منك لله يا اخويا سايب الفحولا بتوعك عليا وهاجج، الدنيا اتغيرت،
والوحوش كترت، والعيال هتروح مني.
- ولا هاتروح ولا حاجه. انتي بس اللي قاعده، مابتخرجيش، ياللا،
ياللا نروح المولد ام رامي والعيال رايعين.

* * *

بتخافي يا ألفت بتخافي؟

- طبعا باخاف، باخاف قوي، إبعد بقى يا سعد، لحسن أهلي كلهم في المولد وحد يشوفنا، يقول لخالي، وانت خالي ده ماتعرفوش. امي بتقول خالك ماهر، واعر قوي. انا هامشي لحسن شافيه طارق ابن خالي بيبص علينا، آهو قرب آهه.
- سقفو، سقفو، خلي العدرا تظهر، سقفو جامد، مالكم كدا خايفين، آهه هتظهر، إوعو كدا وانتو عيال خيخه.
- عدرا إيه اللي هاتظهر، باين الواد ابن خالك ده عبيط، ولا فيه عدرا ولا حاجة.
- إوعى تقول كدا، ولا حد يسمعك، لحسن يطروونا بره، آهو سقف، واعمل زي ما بيعملو.
- ياشيخه روجي باين عليكي هبله زيهم، انتي مصدقه، دي تخاريف.
- اسم الله عليك، إوعى كدا وانت باين عليك خايب ومش عارف حاجه، الله مين اللي جايه هناك دي؟
- إيه. دي البت البيضة التخينه بنت ام فيفي، إيه اللي جابها هنا؟
- البت دي أنا مباحبهاش، الواد رامي أخويا بيقول إنها معاهم في الفصل، بت أليطه وطالعه فيها، على إيه ما عرفش!
- اسكتي يا هبله اسكتي، دا الواد حسن أخويا بيقول عليها بت لهلوبه، وشاطره والمدرسين بيحبوها، ويمكن تطلع الأوله السنه دي في سنه رابعه، دا بيقول إنها أشطر منك.

- اشطر مني، روح، روح، وانت عبيط زي اخوك، دي لا شاطره
ولا حاجه، دي حتى دمها سم، انا هامشي مش عايزه اسلم عليها.
- هدي يا بت يا ألفت خدي. والله صدق اللي قال عليكى هبله
بصحيح. أما نروح نشوف الوز المزغط، اللي زي القشطه ده، قال
دمها سم قال، دي غيره وحقد وخابه.

* * *

الدنيا غريبه وكبيره.

زنه ابنها يموت، وتمشي بالليل، وانا ابويا طول الاسبوع بره
ما بنشفهوش، وعمي زمر طول النهار يدق مسامير في الجزم، وانا قاعد فوق
السطح اسمع دقه فيها. وعمي وحيد حمار كل همه السيا وهو حمار، فاكر
نفسه فريد شوقي. وخالتي لوزه جوزها غلبان عواطي، وبدر جوزها يموت.
ويغرق في الحلوه عند معدية عثمان، وامي، امي دي غلبانه، فاكراني صغير
مش عارف حاجه. ناسيه اني اكبر من نبويه الفحله.

- يا معار، دا انت يا حسن قد رامي عندك تمن سنين.
- رامي مين ابو شخه، روجي، يا تخينه روجي، انتي مش عارفه
حاجه. انا عندي عشر سنين، يعني قربت ابقى راجل، طب احسبي
كام سنه، من ستين لسنه سابعين، يبقى كام.

- عشر سنين.

- آهه شفتي اني كبير.

- شفت.

- قوليلي بقي انتي عندك كام؟

- زيك. عشره. آه، آخر السنه ببقى عندي عشره.

- ها، انا اكبر منك. انا تميت العشره من زمان.

- انت أهيل، حد يطلع لسانه زي الكلب كده؟

- انتي لهلويه. يالهلويه، يا تخينه.

- انا اسمي سمانه يا عبيط. يا بليد الفصل يا حسن انت وألفت ورامي، حتى الواد اخوك سعد، خايب وكل يوم يتضرب علقه من الأستاذ.
- يا تخينه طظ فيكي.

* * *

في مسرى تموت الحمير العسره.

اسكتي يا بت يا ام رامي اما اضحكك. احنا طلعلنا الميدان زى الجراد،
كل اللي في بيتكم، على عيال الشارع، على السواد ابني والبت بنتي، ووقفنا.
شويتين وعرييه كركبيره جات، وفضل العربجي ينادى: العدرا، العدرا.
ياللي راح تزور. وفضل يركب، يركب، لحد ما ملا العربيه ع الآخر. وامشي يا
حمار، مش راضي بمشي، يا حمار امشي، قال راسه والف سيف ماهو طالع،
والحمار يتمرغ ع الأرض، ويتلعبط زي القرموط السمك. والراجل يضرب
فيه بالزخمه اللي معاه. وبعدين نزلنا. قام الحمار فارد نفسه وفضل يقطع،
والعيال تجري، واحنا نجري، والعربجي يجري. والأكل وقع مننا والميه
اندلقت، وخالتك ام عكاشه وقعت، وفضلت حسنه ولوزه يشدوا فيها، هما
فوق العربيه وهي تحت. وانا اجري، وراهم. وأول ما طلعلنا، راح الحمار بارك
ع الأرض ثاني. شويه وقرب مسطرد كدا، عند الكوبري، قالوا إيه دا فيه
رجال من الشفخانه، بياخدو الحمير التعبانه. والعربجي يصرخ في الحمار،
ويلهلب فيه عشان يجري زي الرهوان. وقعد يقولو ادعو يا جماعه نعدي
بالسلامه. فضلت خالتك حسنه وام عكاشه يدعو والعيال يردو عليهم، بقو
زي اللي بيشحتو في السيده، هما يقول: يا كريم يا رب سهل لنا العاصي.
والعيال يقولو: يارب، يا عدرا نعدي بسلام. آمين يارب. فرجو علينا الناس
الله يجيبهم، وانا ولوزه دافسين بوزنا في عينا وهات يا ضحك.

- والله ليكي وحشه يا ام فيفي، يا مرحب.
- اسكتي يا بت يا صباح، قلبنا شعوط من الملوحة اللي البت ام جلامبو بتبيعها، وشوفي لنا حاجه نبرد قلبنا.
- على حظكم أخويا لسه دابح النهارده وفاتين. ادخلوا اما أغرف لكم. ولمي العيال وهاتيهم، وقولو: شالله يا عدرا.

* * *

فحلہ، وہیلہ، وقال بتلم إزاز قال!

- عایزہ تبقي زبالہ، ہیا قالت لی کدا.
- تعرف یا لہ یا حسن الزبالہ ڊي کنز، مرہ تلاقي معلقہ، ومرہ شوکہ، مرہ حلق، بس شوف انا لقيت إيه. ده أول تحویشہ حلق دهب.
- دي فرده، وبعدين تلاقيه دهب قشره.
- دا دهب ابن دهب، انا وريته للصايغ اللي عند المطراوي وکان عایز يشتریه وانا مارضيتش، ومرہ لقيت جنيہ.
- لقيتي جنيہ، بنت القحبه مفكراني عبيط، وهي سارقاه من لوزہ، آمال دکھا کانت نار قايدہ فيھا ليہ؟ وجوزھا دېھا علقہ بسببہ نسوان وسخه عایزہ الحرق.
- مين، مين اللي طالع؟
- أنا، أنا یا واد یاحسن.
- مين عمي وحيد. إيه اللي جابک هنا.
- یا واد هو دا مکاني، انت إيه اللي جابک في البرد ده؟ دا احنا في طوبه یا ولہ.
- طوبه إيه والله مانا حاسس ببرد ولا حاجه. تعرف یا عمي وحيد أنا مش بردان، انا عایز افهم، فيه نار في صدري، تقدر تقوللي. ليہ انت کدا؟ واحنا، وامي، ونبويه، وأم رامي، ولوزہ، وبدر، حتی ام جلامبو. زمان امي وزنه يتخانقوه، وبعدين يرجعو یا کلو مع بعض، عم علوه يولع في الأوضه ويمشي، وابنه يموت.

بدر قاعده على الباب تلم قصاقيص وتخطيها، وتوديتها لقريبها
يعملهم سجاجيد ويبيعهم، وسايه ابنها طول النهار العيال حاطينه في
قفص ويجروه في الشارع، عاملينه الفسيخه الميته. وبعدين. ليه يا
عمي وحيد، مش انت بتروح السيماء وعارف كل حاجه؟.

- مش يمكن تعرف انت عني. انت في مدرسه وبتتعلم ومعاك
مدرسين، إوعى يا حسن تسبب المدرسه. إوعى تعمل كده وتخب.
النهارده انا باضرب نفسي ألف جزمه، اني سيبت المدرسه. كنت في
تالته اعدادى، وسقطت، كان المدرس صعب، وأبويا أصعب، وانا
طايش، اهرب واروح السيماء، سيماء النهضه، والزاتون وسهير، وناديه،
ولما كبرت لفيت العتبه وشارع عماد الدين. شفت أفلام، وعشقت
ناس، حبيت ابقى فريد شوقى، واقعد ابص في المرايه واقول هو
احسن مني في إيه. نفسي اكسر، واضرب، واحب، واشرب، واولع
سجائر، ببقى معايا فلوس، وابوس بنات حلوين، السيماء دي عالم، عالم
يدخلك جواه، ويطلعك مولع، زي السيجاره. تعرف أول مره شربت
سيجاره، بعث كتاب الإنجليزى لواحد صاحبي كتابه ضاع، ورحت
السيماء، وكبرت على العيال، وسموني الوحش. وابويا سماني الخايب.
روح يا ساقط تعالى يا ساقط، لما طهقت، وقاللي: يا بغل يا ابن
الكلب، عرفتلي طريق السيماء، آهي دقني آهيه لو فلتحت، ابقى شخ
على قبيري زي ابوك، دوخ وانتلطم عند ده وعند ده يا بغل.

اتعلم يا حسن، وابعد عن الشر، ما تبقاش زيكي زيي الحمار.
بص، بص يا حسن شايف الجرح اللي في صدغي ده، أبويا السبب،
كان نفسه ابقى متعلم، زي البهوات، لا بس بدله، وببتي نضيف.

يقوللي اتجوز واحده حلوه، مش زى امك ريحتها سبله من ريحة
الحمار، وايديها مقرمطه من كتر الغسيل. وطلعت بغل وما سمعتش
كلامه، كان الشيطان بيدو ف وداني وصدقته.

- تعرف يا عمي وحيد، انا ساعات باحس اني عايز اسيب
المدرسه، لكن كل يوم باعرف حاجات كثير، وباسمع حاجات كثير،
الأستاذ في الفصل بيحكي لنا عن حرب 67 والاستنزاف والضرب،
والسد العالي، وقناة السويس، ساعات باحس انها حاجات صعبه، لكن
باحب اسمعها. البت البيضه التخينه بنت ام فيفي، باشوفها تقف تحكي
مع الأستاذ عن خطب عبدالناصر، والأستاذ بيبقي مبسوط منها،
ويقول لها شاطره يا لهلوبه. بنت الكلب دي بتعرف الحاجات الكثير
دي منين؟ وعشان كذا انا باغير منها.

- نفسك تبقى زيها!

- نفسي افهم، الأستاذ ببشده حيلنا وبيدفعنا، الأستاذ بيقول لولا
عبدالناصر، كان زمن اللي زيكم في الشوارع، وعلى الارصفه، أنا
باحب عبدالناصر وعايزكم تحبوه. وجاب لنا فيلم عن الجهاز الدورى
(القلب يعني) انحشرت وسط العيال، والأستاذ عمل نفسه مش واخد
باله لإنني ما دفعتش فلوس. وقعدت اتفرج وفي الآخر جابو صورة
جمال عبدالناصر، العيال هيصو، والمدرسين قعدو يسقفو، والأبلوات
تزغرد، وعبدالحليم بيغنى، كنا هانبي وأدي احنا بنينا السد العالي،
واحنا نغني معاه، وجمال يضحك ويشاور بإيديه للعمال، أنا مديت

إيدي كنت قاعد في الصف الأول، كنت عايز اسلم عليه، ألمسه، شفته
وهو بيمد إيدته ويسلم، انا باحب عبدالناصر .
- هيه سمعتكم، سمعت كل حاجه .
- مين أنت يا مخفي النقا يا سعد .
- امي بتقول لك انزل من ع السطح لا تبرد يا بغل .

* * *

اسمع يا خويا انا هاحكي لك عن كل حاجه.

- أنا عايزه اعيش، عايزه فلوس، تعرف انا محوشه فلوس كثير مع خالتك صباح من الشغل، رحت أقول لها عليهم، قالت: يا عيني يانبويه، ما تصبري عليا ياختي كدا قد كام يوم، وأنا اعمل لك جميعه واديهم لك.
- كام يا نبويه كام؟
- قول بيحي عشرين جنيه أو اكثر، مش عارفه بالظبط.
- وهي وديتهم فين؟
- بتقول اشتريت بيهم حبتين بضاعه، فوط على ملايات على طرح، ودفعت تقديمه حته أرض في المرح، وهاتتقسط كل شهر اتنين جنيه. وطول النهار مسرحه عيالها يلمو طوب، خشب، صفيح، اللي يلاقوه، تقول علشان نبني البيت.
- بنت الرفضي. تبني البيت علي حسك.
- والنبي ورحمة عصفوره يا خويا ما تقول. لامك تزرعل، وتقول البت استخسرت تديني الفلوس.
- وامك عايزه الفلوس ليه؟
- لوزه غاوتها وقالت لها فيه أرض ناحية العرب، عند المسله رخيصه، تعالى نشوف لنا حته نشترها.
- وأمك معاها فلوس منين؟
- اقول لك ولا تزرعلش.

- امك بتبيع عيش، عند الفرن. بتقعد بالعيش البايث والسحله اللي طالع من الفرن، تبيع الرغفين بتعريفه، وساعات التلاته بقرش.
- ازاي من غير ما اعرف.
- بتطلع الصبح بدري. الفجر واحنا نايمين، تروح لحد الساعه سابعه وبعد كذا تجيب العيش والطعميه وتصحينا، آمال احنا بنصرف منين، ومصاريف الكتب والمدارس. والواد سعد عارف وساعات بيروح معاها.
- سعد عارف، وانتي عارفه. وانا طيشه.
- وطى حسك، لحسن تسمعك.
- ماتسمع.
- ايه هو عيب ولا حرام، التجاره شطاره.
- وانتي عرفتي الكلام ده منين؟
- ام جلامبو.
- دايمن تقول كدا. تقول الواحده الشاطره، تعرف تجيب القرش منين، وتحافظ على نفسها، مش طول النهار قاعده طيزها تسف تراب من الأرض.
- يا حسن.. يا حسن.
- مين؟ عمي وحيد؟
- تعالى عايزك شويه.
- تعالى انت أنا اللي عايزك. اعملي كوباتين شاي، فزي، قومي.
- اسمع يا حسن، انا ماشي، هاسبب لك الأوضه شهر ولا اتنين، اقعد فيها وذاكر، لما ارجع يحلها ربنا.

- رايح فين؟
- الفنانين عاملين حفلات للجيش، وانا رايح هناك.
- تعمل إيه.
- ما انا خلاص اشتغلت في السيماء، دا خلاص بقى زي المرض.
- فريد شوقى برضه؟!
- دا عشق، زي ما انت بتعشق عبدالناصر. حلوه صورته دي وسط عياله. خالد وعبدالحكيم وعبدالحميد، ودي صورته لوحده ربنا يخليك يا ريس.
- هاتسيبنا يا عمي. هاتسيب نبويه.
- نبويه دي فحله.
- بس أوفه قالت...
- أوفه دي صغيره وسهله، لكن نبويه دي طوفان، نار تحرق من بعيد، واللي يقرب منها يولع.
- قوللي يا عمي انت تعرف إيه عنها.
- أعرف حاجات كتير. كانت تحكي لي عن كل حاجه، الزباله، والفلوس، والعيال اللي ضربتهم، وسرقة العيش من الفرن، والواد لالو، ومليم وسردينه.
- سردينه مين؟
- فحل حاول مره يتهم عليها في السوق. مسكته عجنته. قلت لها: وقدرت عليه يا نبويه. "قالت انت ناسي يا عم وحيد اني اتولدت في الزباله". اختك قاسيه قوي، قلبها حجر.
- ما حاولتش مره...

- آحاول إيه، ممكن اكون بوستها، ضمتها، لكن ما وصلتش زي ما أوفه بتقول. انت فاكر إيه لسه بدري عليك يا حسن.
- إيه؟
- أمال انت فاهم إيه؟
- انت ببتوس الصور وتضحك عليا. انت لا تعرف فريد شوقي، ولا حد، ولا بتروح السميا من أصله، انت حيلتك مليم احمر.
- طابخ.
- انت بتضربني.
- واموتك كمان، امشي اطلع بره ومش هديك الأوضة، هسكها ع الفاضي. عبيط ومش عارف حاجه. وانا اللي افكرتك راجل صدقت حسنه لما قالت عليك فحل.

* * *

السطح لين، لين، خفيف، والأرض ناعمه.

والسما زي الحرير، والقمم فوق باصص، طبق مدور كبير، والقفص
الجريد في الركن مكانه زي امبارح، وأول، وكل يوم، وهي باصه لفوق،
وسرحانه. وبالراحه بالراحه قوي، رحت ماشي، بشويش على أقل من مهلي.
وناطط مره واحده....

لنتي بتعملي إيه، بخ.

— يابن الكلب يا بعبع. إخص عليك يا سعد خضيتني. إيه اللي طلعتك
هنا؟

— مش احنا متفقين نلعب عروسه وعريس.

— إنزلي يا مخفية النقا يا ألفت، مش قلت لك بطلي تطلعي ع السطح.
وانت ياد انت، إبعد عنها أحسن لك، بدل ما اطلع لك رامي يموتك.

* * *

انا اتجوزت، كانت شاديه وفايزه وصباح. طالعين جداد.

والراديو كان قليل، كل كام بيت تلاقي راديو، بنتي الأولى،
اتولدت يوم ما عبد الحليم كان بيغني (قوللي حاجه). كانت إيه مفرقه
قوي، تمشي في الشوارع وعلى القهاوى، تلاقي الرادوى على
الآخر.

- انا كمان يا ام فيفي اتجوزت سنتها تقريبا، كانت صباح بتغني (ع
البساطه). ياه الدنيا جريت قوي، فين (الغاوي ينقط بطاقيته)، ولا
(ما تزوقيني يا ماما). انا بنتي بتحبتها موت.

- يا سلام يا ام رامي الدنيا راحت فين. الضحك غلي، والحياء غليت،
وما رخص إلا البنى آدم.

- ومين سمعك يا ام فيفي، هتديني الجمعيه الكام. انا هادخل بنفريين،
عايزه الأول والآخر.

- وماله يا اختي، خدي اللي عايزاه.

تصبحي على خير.

- وانتي من أهله يا ام رامي، سلمى لي على العيال، امسكي خدى
دول، حتتئين جنبه من البلد خديهم، يا اختي خدي.

- يا خد عدوينك، بكفيكي شر اللي ما تطبقي شره، يا ام فيفي.

- اسمي تهاني، قولي يا تهاني يا بت مسعده عشان الدعوه تجوز.

* * *

أنا تغيرت، واتمرمطت، لفيت وشفيت

الخوف، والجوع، والحب، ووقعت، وقمت.

اتكفيت على وشي ياما. ولا حد سأل، الكل ضحك حتى فريد شوقي ضحك عليا. ف يوم عرفت أنه له فيلم جديد في سيما مترو، رحت وفتفت، وهلت عاش الوحش، عاش الملك. عاش ملك الترسو. بصيت لقيت شوية طلبه جاينين من آخر قصر النيل يجرو بالشوطة، والعساكر يجزو وراهم، لكنهم كانوا عمالين يهتفوا، بالروح بالدم نفديك يا جمال، هنجارب، هنجارب، يا اسرائيل يا أرانب. والعربيات عماله تلم وتعبي. فريد بيه راح داخل جوه عربيته. بصيت عليه من الإزاز، وقلت له: خدني معاك، دا انا اعجبك قوي. قاللي: بعدين، بعدين.

راحو شايلىنى هيللا بيلا جوه العربيه ما عرفتش انا فين؟ إلا لما جه واحد جنبي وقاللي: انت في كلية إيه. ساعتها استغربت وعرفت بعد كدا انا فين؟

- يا عيني عليك ياخويا، بيتك ومطرحك وكله يهون، خد اشرب، شوية اللمون دول.

- تسلم، تسلم إيداك يا ام حسن.

- قول يا حسنه، انت نسييت ولا إيه ؟ إحنا اخوات. وانا يا عتبرك زي اخويا بالظبط.

- وانا كمان. ربنا يعلم اللي في القلوب.

* * *

أجر وعافيه يا خالتي ام عكاشه.

- والله يا حسنه يا بنتي هاودع. ياللا حسن الختام.
- شويه برد يا وليه يعملو فيكي كذا؟ تعالي يا ام رامي وادخلي.
- خدي يا خالتي شربة الملح آهه بالهنا والشفاء.
- يا اختي اللي يديها حلة محشي ولا نابت تقعد بيها في الميدان، تقوم تبرطع على طول.
- يووه يا حسنه الوليه مش حملك.
- طب اسكتي. خالتي ام عكاشه الصعايده في ميدان المطريه بيسألوا . عليكى، واحشهم العدس السخن.
- والله ما حأيشني عنهم إلا الشديد القوي، جنبى هيفرتك منى ما عرفش ليه؟
- ما تقومي نوديكى للدكتور.
- الشافي هو الله. دلوقتي آخذ شربة الملح، وبطني تمشي، واقوم زي الحصان.
- خدي يا ام رامي، نقي شوية الفول دول وبليهم.
- على فكره يا خالتي، لو عايزه عدس ولا فول، ولا زيت، الوليه ام جلامبو عندها جوه اكوام، اكوام. أنا شوفتها واقفه ف طابور الجمعيه، هي وام لالو البقاله وعمالين يحولو. والراجل ابو وش احمر، قلع الحزام ونزل في الناس ضرب. وبتوع اللامون هجمو، وبقت خناقه لرب السما. واللي تصوت، الفلوس اتسرقت منها،

- واللي زيتها انكب منها. انا شفت كذا رحت راجعه. راح الواد
السويسى اللي بيقولوله يا سردينه، قريب الوليه ام جلامبو، هو
والواد ملیم العرايشی، دخلو الجمعیه وقفلوها من جوه.
- وانتي إيه اللي وداكي يا ام رامي.
- قلت اجيب إزازه زيت، العيال نفسهم في المحشي، شافوه في إيد
الواد ابن ام فيفي.
- آه منها الوليه ام جلامبو، تلم الحاجات من الجمعیه، وتبيعها الطاق
طاقين، أنا شفت ام فيفي بتاخذ منها.
- آه يا حسنه، منهم لله بقي، غلو علينا الميه وسدو عنا الهوا. كل ده
ومش مقضيها، بتلف قراطيس شاي وسكر وتبيعها بقرش وقرشين.
اللي غايطني الراجل ابو واش احمر اللي واقف في الجمعیه، انا
شافه العربيه وهي بتنزل الشاي والسكر، وانا في البلكونه عند ام
داود في المساكن. وعلى ما نزلت ورحت، يقول اللي معاه بطاقه
يقف، واللي معاهوش يمشي. واتحایل على الراجل انه يديني إزازه
زيت ما رضي ابداء. رغم انه عارفني وبامه جه صلح عندنا جزم،
وكننت ساعات ما ارضاش آخذ منه فلوس، وأقول آهو غلبان.
- هي الدنيا كذا أنتشئت على حرب وهتروح على حرب. قومي من
بين لعتاب، قاعدة لعتاب وحشه، الملايكة ماتحبهاش، قومي يا اختي
قومي.

* * *

حسان اليماني قال: الدنيا نشئت على كفر وها تروح على كفر.

وهاتكثر فيها الحروب، والناس هتاكل بعضيها.

- جبتي الكلام ده منين يا خالتي ام عكاشه؟

- زمان أيام ما كان الببال رايق، كنت احب اروح الجوامع اسمع الأحاديث،
كان فيه يوم الجمعة في الحسين، والتلات في ابو السعود، والخميس في
السيدة. وغيرها وغيرها. كانت حماتي تاخدني من إيدي، وتفضل تلف،
تاخذها جوله من أول السيدة، لنفيسة العلم، للسيدة عيشه، للجيشوشي،
للحسين، وتلف طول النهار على رجلينا. وفي الآخر نرجع على سيدك
المطراوي. نصلي العشا وننام. ما هو بيقولك سيدي المطراوي ده من نسل
النبي، وسيدي زين العابدين، ابن الحسين، والسيدة زينب اخته، ونفيسة
العلم يقولك كانت متبحره في العلم وتقعده مع العلماء وتجالسهم. ياه كان
الزمن غير الزمن، والببال غير الببال. كان ممكن الواحد يلف مصر كلها على
كعبه، كانت الصحه هبله، والعافيه بتغر صاحبها. وعمك ابو عكاشه كان
يتكل على الله يروح الشغل واحنا تلف: اليومين دول مش عارفه حماتي
عماله تحوم عليا ليه؟ وعماله اشوف ناس ماشفتهمش من زمن، حتى حمايا
اللي مات قبل ما اتجوز ولا عمري شفته. لقيته جاي. وناس راحو، وناس
قاعدين.

- قلبي مقبوض يا بت يا حسنه، وعيني الشمال بترف، الله ما اجعله
خير.

- كله على مراده يا ام رامي، ربنا يستر .
- حاسه بزعل كبير جوه قلبي، وطول النهار منكده، وزى ما اكون عايزه اعيط، تصدقي بالله يا حسنه، انا انا حاسه، نفس الإحساس ده بالظبط يوم ابويا ما مات، وامبارح شفته في المنام زعلان، ولا بس جلابيه سوده، ومعفره زى اللي يكون جاي من سفر، أنه عليه مايردش. زى ما يكون حزين وواحد على خاطره.
- الأموات قلبهم بيحس باللي هايحصل.
- أبويا كان يقوللى الروح الطاهره بتخبر أهلها أول بأول. تصدقي يا بت يا ام رامي لو قلت لك أن انا ما معايش ولا تعريفه، تقولي كدابه، ومش عارفين نتعشى إيه؟
- يا حبيبة اختك يا اختي. اسمعي، انا عندي شوية ملوخيه ناشفه، وحتة دهن ضانى من بتاع العدرا. والله آخر حته، مش مهم، خديهم يا اختي وعلى شوية ميه وكترى لهم الفص التوم وطشيه عليهم، وآهو العيال ياكلوه، وبكره ربنا بفرجها. ولا أقولك اقوم انا اعملهم واحط لهم حباية قوطه، آهم يطعموهم شويه، وخدي شويه وانا شويه والعيال يتعشو. ولا اقولك أنا هالم العيال كلهم واعشيهم مع بعض.
- يطعمك ما بحرملك. يا ام رامي يابنت ألا، هي امك اسمها إيه ! يابنت حوا و آدم.

* * *

انا حربجي وصابع، ولا ليا شغله ولا مشغله

- ولا أهل يسألو عليا. أنا مقطوع وقعدت لكم آهه.
- إيه الطيطه اللي بره دي يا حسن؟
 - إلحقي يامه، الواد العبيط، لالو جاي ومعاه عيال كتير، وعمال يزقل بالطوب.
 - إيه ياولاد، إيه الهوجه دي كلها، مش خلاص المدارس قربت، روجو شوفو حالكم.
 - خالتي حسنه، خالتي حسنه، مالكيش انتي دعوه. انا عايز الوليه ام، ام جلامبو الحراميه سرقت، سرقت الزيت والسكر بتاعنا.
 - معلش يالالو، خد يا خويا الجرمق اللي انت جاييه وراك، وانا هاكلماها،
 - تكلمي مين يا امه. إوعي من سكتي، روجي، روجي إن كان هو لالو العبيط فانا ام جلامبو، فاكرايني هاخاف من الطوب والكلام الخايب ده. وسعي وسعي. خد قرش آهه وروح لامك يا شاطر.
 - زفوه يا عيال وقولوا: العبيط آهه. العبيط آهه.

* * *

وكانت ليله، انقلبت الدنيا.

جه العالي في الوطي، اللي راح، واللي دمه ساح، واللي مش مصدق اللي حصل. احنا قلنا القيامة قامت. بصينا يا حبيبتني لقينا جراد نازل علينا، وعلى خوانه، وراحو داخلين دب... دب، طاخ.. طاخ. بالطوب والعصي والأزايير ما بقناش عارفين الداهيه دي جايه مين؟ أنا ري الواد لالو، فضلوا عيال ام جلامبو يزفوه لحد الدكان، هناك في شارع البحار. انا قلت دي غاره، واسرائيل نزلت دب زي ما بنسمع، او يمكن تكون رمت علينا قنابل زي مصنع ابو زعبل. المهم يا ستي، ولا ستك إلا انا. فضل الموال ده يجي ساعه، الضرب شغال، والتكسير على ودنه، والصوات داير، ومابقناش عارفين مين بيضرب مين. أم لالو وعيالها وقرايبها، والواد سردينه لم الصيع بتوعه، بتوع السمك وجم، وام لالو، لت شارع البحار وشارع عيسى وشارع العبايطه، وكثير من البقالين بالشوم والنبايت، وكانت مجزره، فضلت لأدان المغرب شغال،ه ولا حد استجري يروح القسم.

- يا حزن قلبي، والله يا حسنه بقينا منططه، وملطشه للي يسوى واللي ما يسواشي.

- أمال إيه بالوزه، ماهو كلابها سابيت على ديابها. من يوم ام جلامبو ما جات وجه خيرها، وكل ده علشان الفلوس، والزيت والسكر، اللي نازلين فيه نهب من الجمعيه، وتندار تبيعه بالغلا والكوا.

- أَلطّف بِنّا يارب. الطّف بعبيدك. حبه، حبه، يخش بيتنا نُور.
- والحراميه، وقطاعين الطرق.
- ولايهكم يا لوزه. انا سمعت انها هاتعزل خدت شقه في عماره ام
- ليله اللي في عين شمس، وبكره تغور.
- اسمعي يا حسنه ما تيجي نعمل زي الوليه ام رامي ونشتري أرض
- بالقسط، يعني هي اشطر منّا في إيه؟
- أم رامي عرفت تجيب القرش منين. وما تفرقش عن ام لالو،
- تشتري الفوط والملايات من الجمله رخيص، وتبعها بالغلا والكوا
- للناس. دي حتى حاجتها حراقه. خدت منها مريلتين للعيال، عايزه
- تاخذ بزيه قسط على كل واحده.
- اسمعي يا حسنه البت نبويه سرها مع ام رامي، دحليها وسبيها
- لحد ما تعرفي تاهديهم منها. وام فيفي بتعمل جمعيه ادخلي معاها،
- المهم لمي لك قرشين، قد عشرين جنيه، وانا هابيع السرير، على
- حله وطشطية نحاس ومعايا قرشين، وتعالى نرهم لراجل في
- المسله بيقولو طيب قوي، ونتفق معاها على حته قولي مية متر
- ونقسمها. وآهو كله بيروح زي مصاريف، إيه يعني اتنين جنيه في
- الشهر؟
- يا اختي، اسكتي، اسكتي، انتي فكرك حكايه العيش الرجوع
- بتكسب، أبدا وحياتك، دا حتى فيه وليه بتيجي من العرب كل يوم
- الصبح بتعبي من الفرن عربيه كارو، بيقولو بتاخذها وتبيعها هناك.
- بخبيك مره، وسبتيها تاخذ منك العيش.
- آهو ربك اللي بيرزق، تلاقها صاحبة عيال.

* * *

يخبيك وليه، تعالي يا نبويه، شوفي خيبة أمك.

- خيبة إيه يا لوزه، انتي ها تعددي.
- اسكتي يا حسنه يا بايظه، يا ام عيش. دا انا لو منك أكل مصارينها أكل. مش شايفه الوليه أم جلامبو وعبالها عاملين ازاي.
- اسمعي يالوزه كدا اسمعي.
- إيه الصويت اللي مالي الدنيا ده. ياساتر يا رب. قومي شوفي إيه، قومي، طلي من الباب كدا.
- باينها حريقه جامده قوي يا حسنه. شايفه الناس طالعهم يمة القسم، وعماله تجري بالشوط.
- اسألني يا بت حد كدا ولا كدا. رجليا منمله، مش قادره أقوم، عامله زي ما اكون اتشليت. اسألني ام فيفي، سامعها بتصوت.
- إيه يا ام فيفي. إيه يا ولاد سيبتو ركبي.
- صوتو يا ولاد صوتو. صوتي يا بت انتي وهيا. الرئيس مات.
- اسكتي يا بت اسكتي. تقي من بقلك، الشر بره وبعيد. يا لهوتي، الشر بره وبعيد.
- الشر بره وبعيد.

* * *

اسم الله عليك يا جسرنا العالي.

اسم الله عليك يا ابو اسم غالي. الدنيا اسودت وضلعت بعدك. يا ترى
سهم مين اللي صابك وكان طايش. آه يا حبيب اختك يا خويا.
يا عامود بيتي والعامود هدوه، يا هل ترى في بيت مين نصبوه؟
يا عامود بيتي والعامود رخام، يا هل ترى في بيت مين انتقام؟
آه يا غالي يا ابوضحكه حلوه يا خويا، يا ابو هله وطله، يا ابو كلام رايق،
يا طول بعرض يا غالي.

- كفايكي يا حسنه يا ندابه، عنيكى بقو كاسات دم.
- اسكتي يا بت اسكتي. دا الحزانه تحزن عليه العمر كله.
دا كان ابونا واخونا.
- ومين لينا من بعده يا لوزه؟ دا الدنيا كلها حزينه، والناس وشها
اسود.

- حقه يا ام رامي، الوليه ام عكاشه من ساعة ما سمعت الخبر
الشوم، وهي نازله لطم وبكا تقوليش ابنها. فضلت تجعر وتولول،
وشانقه رقيتها بالشاش وعلى قوله يا ولدي.. يا ولدي اسمعو آهه
صوتها.

نادى المنادي وطوح النبوت.

روح بلادك يا غريب لا تموت.

نادى المنادي وطوح الحربه.

روح بلادك يا غريب أولى.

- لا حول ولا قوة إلا بالله. الوليه فاكره ابنها. بصي.. شوفي يا
حسنه ازاي خارجه، وشانقه نفسها. الوليه هاتفطس حَلَقِي عليها يا
حسنه، حَلَقِي يا ام فيفي. الوليه خارجه...

جاني الخبر من بعيد وانجر

اسم الله عليك ألف بعد الشر.

جاني الخبر من بعيد مجرور

اسم عليك ما حد يقول

- دا حتى العيال الصغيره، ماسكه أعلام سوده ودابره تلف في
الشوارع، والواد المخفي النقا ابني سعد، لأول مره يمسك في خناق
اخواته ويزعق معاهم، قال إيه عشان راحو المدرسه. قال لهم:
ازاي الدنيا خارجه وانتو ولا همامكم. تفنكروا المدرسه فاتحه.

عشان خاطر كم. مصر كلها ف حداد يا بقر.

وسايباه يعمل في أعلام سوده ويفرقها على العيال كل ما يعدو.

وحتى عيالكم لمحتهم بياخدو منه ويفرقو على العيال.

- حقه يا ام فيفي ساعة النكسه قلنا دا أكبر حزن ممكن نحزنه، أتاري
فيه الحزن اللي أكبر منه.

- هيا دي حال الدنيا يالوزه، هيا دامت لمين. ما دايم إلا وجه الله.

- اسمعو.. اسمعو الشباب معدي بيقول إيه:

- اسكتوا.. اسكتو يا بنات او عو تقول الرئيس مات.

- اسكتوا.. اسكتو يا بنات او عو تقول الرئيس مات.

- يالهوى. يا خرابي.

-
- صوتي يا بت صوتي. إدي جامد يابت يالوزه.
- يووه روقو كده يا ولاد. أمال بكره هانعمل إيه، وبعده وبعده، دي
الأيام طويله.
- لا فيه رجال قبله ولا بعده. هو راجل والرجال تشهد له.
- هو راجل والرجال تشهد ليه. ولا فيه رجال قبله ولا بعده.
- عددي يا معدده وقولي. قولي باحسنه كأن أبوكي هو اللي مات. يا
لهوتي.
- ياخراي. إدي يا بت يا ام فيفي إدي. صوتو يا ولاد صوتو.

* * *

ما حد عارف دي مظاهره، ولا هوجه.

الناس هاجت من بيوتها، ودابره تلف وتعدد حتى العيال، ماحد عارف دا بكا ولا نواح. اسمعي كده يا حسنه اسمعي.
- سامعه يابو سعد سامعه. حزن كبير يا خويا. حزن كبير واتلفحنا بيه.

- يا ترى الأيام اللي جايا مخبيه لنا إيه؟
- اسمع العيال بيقولو إيه: (ساب لك إيه يا صبيه حبيبك لما مات...)
هاجت الناس هاجت. وكل البيت خرج صغير مع كبير والناس نسيت الحرب والنكسه. وما افتكرت إلا حبيبها اللي مات. غنوا يا ولاد، قولو (ساب لك إيه يا صبيه حبيبك لما مات...)

* * *

تمت

5 يونيه 1998

صدر للكاتبة:

- حكايات الليل (مجموعة قصصية مشتركة) 1984.
- تلك القاهرة (ديوان قصص) 1990.
- أشياء صغيرة وأليفة - (قصص) - أصوات أدبية - 1996.
- بنات في بنات (قصص) - كتابات جديدة - 2001.
- من حلاوة الروح (رواية بالعامية) - رؤى - طبعة أولى - 2002.
- ربح السموم (رواية) - مكتبة الأسرة - 2003.
- أغاني وألعاب شعبية للأطفال - دراسات شعبية - 2004.

تحت الطبع:

- سيدة المكان (قصص).
- في الليل ما خلى (رواية).
- حكايات بجوار السلطان (رواية).
- داية وماشطة (دراسة).
- صورة المرأة في المثل الشعبي (دراسة).
- أغاني أفراح (جمع ميداني).

من إصدارات "دارسنا بل"

- أن تعيش لتحكي
السيرة الذاتية للكاتب العالمي:
جابريل جارتيا ماركيز
ترجمة: د. طلعت شاهين
- ليالى القصف السعيدة
نصوص وقصص
محسن الرملي
- ليلة شهر زاد الأخيرة
شعر
مقداد رحيم
- جماليات الرفض
في مسرح أمريكا اللاتينية
دراسة
د. طلعت شاهين
- القرمية
رواية
سمحية خريس
- طلسمات مصرية
دراسة
محمد حسين يونس

• نضارة شمس

شعر

عطية حسن

• ذكريات

(الطبعة الثانية)

جابريل جارشيا ماركيز

ترجمة: د. طلعت شاهين

• رصيف يصلح لقضاء الليل

شعر

سامي الغباشي

• كتاب العشق والدم

(باللغتين العربية والأسبانية)

شعر

د. طلعت شاهين

• قطرات الماء

للكاتب الياباني:

ميدوروما شون

ترجمة: د. أحمد فتحي

والآن فى المكتبات
الطبعة الثانية



حكاية أيرنديرا البريئة
للكاتب العالمي: جابريل جارتيا ماركيز